

萬 有 文 庫

第 二 集 七 百 種

王 雲 五 主 編

駢 體 文 鈔

(三)

李 兆 洛 編

商 務 印 書 館 發 行



駢體文鈔

(三)

李兆洛編

國學基本叢書

駢體文鈔卷二十

【論類】

賈生過秦論○○○學傳左氏時近短長竟無一語出入其間故奇○以駢體爲名不當入此文既收此冠論體亦得不必拘於著書非文章之說文章豈有不源於著書者舒對策○韓潮蘇海皆溝滄耳○左思云著論準過秦題去論字而錄

文之次第當從史記秦亡於子嬰故首責子嬰之不善救敗而歸諸壅蔽傷國正意具于此矣下乃補出形勢之不足特以圓險阻難犯之說末乃暢言取與守不同術見秦不亡于子嬰而亡于始皇二世

以補注遂過不變暴虐重禍二語而意則側重始皇故前後以救敗正傾相呼應李氏云次第當從史皇二世子嬰層遞而下而結束以先王知壅閉之傷國云云秦之盛也以下總攝上要亦遷就之言始

文爲後王正告是著書本義史公則以子嬰猶可全秦故移其前後觀典引可見

秦并兼諸侯山東三十餘郡繕津關據險塞脩甲兵而守之然陳涉以戍卒散亂之衆數百奮臂大呼不用弓戟之兵鉏耰白梃望屋而食橫行天下秦人阻險不守關梁不闔長戟不刺彊弩不射楚師深入戰于鴻門曾無藩籬之艱于是山東大擾諸侯並起豪傑相立秦使章邯將而東征章邯因以三軍之衆要市于外以謀其上羣臣之不信可見于此矣子嬰立遂不寤藉使子嬰有庸主之材僅得中佐山東雖亂秦之地可全而有宗廟之祀未當絕也秦地被山帶河以爲固四塞之國也自繆公以來至于秦王二十餘君常爲諸侯雄豈世世賢哉其勢居然也且天下嘗同心并力而攻秦矣當此之時賢智並列良將行其師賢相通其謀然困于阻險而不能進秦乃延入戰而爲之開關百萬之徒逃北而遂壞豈勇力智慧

不足哉。形不利。勢不便也。秦小邑并大城守。險塞而軍。高壘無戰。閉關據阨。荷戟而守之。諸侯起于匹夫。以利合。非有素王之行也。其交未親。其下未附。名爲亡秦。其實利之也。彼見秦阻之難犯也。必退師安土。息民以待其敝。收弱扶罷。以令大國之君。不患不得意于海內。貴爲天子。富有天下。而身爲禽者。其救敗非也。秦王足已不問。遂過而不變。二世受之。因而不改。暴虐以重禍。子嬰孤立無親。危弱無輔。三主惑而終身不悟。亡不亦宜乎。當此時也。世非無深慮知化之士也。然所以不敢盡忠拂過者。秦俗多忌諱之禁。忠言未卒於口。而身爲戮沒矣。故使天下之士傾耳而聽。重足而立。搘口而不言。是以三主失道。忠臣不敢諫。智士不敢謀。天下已亂。奸不上聞。豈不哀哉。先王知壅蔽之傷國也。故置公卿大夫士。以飾法設刑。而天下治。其彊也。禁暴誅亂。而天下服。其弱也。五伯征而諸侯從。其削也。內守外附。而社稷存。故秦之盛也。繁法嚴刑。而天下振。及其衰也。百姓怨望。而海內畔矣。故周五序得其道。而千餘歲不絕。秦本末並失。故不長久。由此觀之。安危之統。相去遠矣。野諺曰。前事之不忘。後事之師也。是以君子爲國。觀之上古。驗之當世。參以人事。察盛衰之理。審權勢之宜。去就有序。變化有時。故曠日長久而社稷安矣。秦孝公據殽函之固。擁雍州之地。君臣固守。而窺周室。有席卷天下。包舉宇內。囊括四海之意。并吞八荒之心。當是時。商君佐之。內立法度。務耕織。修守戰之備。外連衡而鬪諸侯。于是秦人拱手而取西河之外。孝公既沒。惠王武王蒙故業。因遺冊。南兼漢中。西舉巴蜀。東割膏腴之地。收要害之郡。諸侯恐懼。會盟而謀弱秦。不愛珍器重寶肥美之地。以致天下之士。合從締交。相與爲一。當是時。齊有孟嘗。趙有平原。楚有春申。魏有信陵。此四君者。皆明智而忠信。寬厚而愛人。尊賢重士。約從離衡。并韓魏。燕楚齊宋衛中山之衆。于是六

國之士有甯越、徐尙、蘇秦、杜赫之屬爲之謀。齊明、周最、陳軫、昭滑、樓緩、翟景、蘇厲、樂毅之徒通其意。吳起、孫臏、帶佗、兒良、王廖、田忌、廉頗、趙奢之朋制其兵。常以十倍之地，百萬之衆，叩關而攻秦。秦人開關延敵，九國之師，逡巡遁逃而不敢進。秦無亡矢遺鏃之費，而天下諸侯已困矣。於是從散約解，爭割地而奉秦。秦有餘力而制其敵，追亡逐北，伏尸百萬，流血漂鹵。因利乘便，宰割天下，分裂河山。強國請服，弱國入朝。延及孝文王、莊襄王，享國日淺，國家無事。及至秦王，續六世之餘烈，振長策而御宇內，吞二周而亡諸侯，履至尊而制六合，執殳拊以鞭笞天下，威振四海。南取百越之地，以爲桂林象郡；百越之君，俛首係頸，委命下吏。乃使蒙恬北築長城而守藩籬，却匈奴七百餘里。胡人不敢南下而牧馬，士不敢彎弓而報怨。于是廢先王之道，焚百家之言，以愚黔首；墮名城，殺豪俊，收天下之兵，聚之咸陽，銷鋒鑄鏑，以爲金人十二，以弱黔首之民。然後斬華爲城，因河爲津，據億丈之城，臨不測之谿，以爲固。良將勁弩守要害之處，信臣精卒陳利兵而誰何。天下以定，秦王之心，自以爲關中之固，金城千里，子孫帝王萬世之業也。秦王既沒，餘威振于殊俗。陳涉，甯陽繩樞之子，疋隸之人，而遷徙之徒，材能不及中人，非有仲尼、墨翟之賢，陶朱、猗頓之富，躡足行伍之間，而倔起什伯之中，率罷散之卒，將數百之衆，而轉攻秦，斬木爲兵，揭竿爲旗，天下雲集響應，贏糧而景從。山東豪俊遂並起而亡秦族矣。且夫天下非小弱也，雍州之地，殽函之固，自若也。陳涉之位，非尊于齊、楚、燕、趙、韓、魏、宋、衛、中山之君；鋤耰棘矜，非鏃于句戟長鎗也。適戍之衆，非抗于九國之師；深謀遠慮，行軍用兵之道，非及鄉時之士也。然而成敗異變，功業相反。試使山東之國與陳涉度長絜大，比權量力，則不可同年而語矣。然秦以區區之地，千乘之權，招八州而朝同列，百有餘年矣。然後以

六合爲家。殺函爲宮。一夫作難。而七廟墮。身死人手。爲天下笑者。何也。仁義不施。而攻守之勢異也。秦并海內。兼諸侯。南面稱帝。以養四海。天下之士。斐然鄉風。若是者何也。曰。近古之無王者久矣。周室卑微。五霸既歿。令不行于天下。是以諸侯力政。彊侵弱。衆暴寡。兵革不休。士民罷敝。今秦南面而王天下。是上有天子也。既元元之民。冀得安其性命。莫不虛心而仰上。當此之時。守威定功。安危之本。在于此矣。秦王懷貪鄙之心。行自奮之智。不信功臣。不親士民。廢王道。立私權。禁文書。而酷刑法。先詐力而後仁義。以暴虐爲天下始。夫并兼者。高詐力。安定者。貴順權。此言取與守不同術也。秦離戰國而王天下。其道不易。其政不改。是其所以取之守之者異也。孤獨而有之。故其亡可立而待。借使秦王計上世之事。並殷周之迹。以制御其政。後雖有淫驕之主。而未有傾危之患也。故三王之建天下。名號顯美。功業長久。今秦二世立。天下莫不引領而觀其政。夫寒者利短褐。而飢者甘糟糠。天下之嗷嗷。新主之資也。此言勞民之易爲仁也。鄉使二世有庸主之行。而任忠賢。臣主一心。而憂海內之患。縞素而正先帝之過。裂地分民。以封功臣之後。建國立君。以禮天下。虛囹圄。而免刑戮。除去收帑汙穢之罪。使各反其鄉里。發倉廩。散財幣。以振孤獨。窮困之士。輕賦少事。以佐百姓之急。約法省刑。以持其後。使天下之人。皆得自新。更節修行。各慎其身。塞萬民之望。而以威德與天下。天下集矣。卽四海之內。皆謹然各自安樂其處。唯恐有變。雖有狡猾之民。無離上之心。則不軌之臣。無以飾其智。而暴亂之奸。止矣。二世不行此術。而重之以無道。壞宗廟。與民更始。作阿房宮。繁刑嚴誅。吏治刻深。賞罰不當。賦歛無度。天下多事。吏勿能紀。百姓困窮。而主弗收恤。然後奸僞並起。而上下相遁。蒙罪者衆。刑戮相望于道。而天下苦之。自君卿以下。至于衆庶。人懷自危之心。親處

窮苦之實。咸不安其位。故易動也。是以陳涉不用湯武之賢。不藉公侯之尊。奮臂于大澤。而天下響應者。其民危也。故先王見始終之變。知存亡之機。是以牧民之道。務在安之而已。天下雖有逆行之臣。必無響應之助矣。故曰。安民可與行義。而危民易與爲非。此之謂也。貴爲天子。富有天下。身不免于戮殺者。正傾非也。是二世之過也。

班叔皮王命論

○起伏結撰。盡言盡意。遂成東京文體。匡劉而後。此其轉。○所謂頓之山立。導之泉流。○言在此而意在彼。

安徐重固

匡劉以下之文。此評盡之。而子政嫫姚矣。

昔在帝堯之禪。曰。咨爾舜。天之歷數在爾躬。舜亦以命禹。暨于稷契。咸佐唐虞。光濟四海。奕世載德。至於湯武。而有天下。雖其遭遇異時。禪代不同。至於應天順人。其揆一焉。是故劉氏承堯之祚。氏族之世。著於春秋。唐據火德。而漢紹之。始起沛澤。則神母夜號。以彰赤帝之符。由是言之。帝王之祚。必有明聖顯懿之德。豐功厚利積累之業。然後精誠通于神明。流澤加於生民。故能爲鬼神所福饗。天下所歸往。未見運世無本。功德不紀。而得崛起在此位者也。世俗見高祖興於布衣。不達其故。以爲適遭暴亂。得奮其劍。遊說之士。至比天下於逐鹿。幸捷而得之。不知神器有命。不可以智力求。悲夫。此世之所以多亂。臣賊子者也。若然者。豈徒闕於天道哉。又不覩之於人事矣。夫餓饉流隸。飢寒道路。思有短褐之襲。擔石之蓄。所願不過一金。終於轉死溝壑。何則。貧窮亦有命也。況乎天子之貴。四海之富。神明之祚。可得而妄處哉。故雖遭罹厄會。竊其權柄。勇如信布。彊如梁籍。成如王莽。然卒潤鑊伏鑕。烹醢分裂。又況么麼不及數子。而欲闢干天位者乎。是故鷲蹇之乘。不騁千里之塗。鷲雀之疇。不奮六翮之用。棗稅之材。不荷棟梁之任。斗筲之

子不乘帝王之重。易曰：鼎折足，覆公餗，不勝其任也。當秦之末，豪傑並起，共推陳嬰而王之。嬰母止之曰：自吾爲子家婦，而世貧賤，今卒富貴，不祥，不如以兵屬人。事成，少受其利，不成，禍有所歸。嬰從其言，而陳氏以寧。王陵之母亦見項氏之必亡，而劉氏之將興也。是時陵爲漢將，而母獲於楚。有漢使來，陵母見之，謂曰：願告吾子，漢王長者，必得天下，子謹事之，無有二心。遂對漢使伏劍而死，以固勉陵。其後果定於漢。陵爲宰相封侯，夫以匹婦之明，猶能推事理之致，探禍福之機，全宗祀於無窮，垂策書於春秋，而況大丈夫之事乎？是故窮達有命，吉凶由人。嬰母知廢陵，母知興審，此二者，帝王之分決矣。蓋在高祖，其興也有五：一曰帝堯之苗裔，二曰體貌多奇異，三曰神武有徵應，四曰寬明而仁恕，五曰知人善任使，加之以信誠好謀，達於聽受，見善如不及，用人如由己，從諫如順流，趣時如響起，當食吐哺，納子房之策，拔足揮洗，揖酈生之說，悟成卒之言，斷懷土之情，高四皓之名，割肌膚之愛，舉韓信於行陣，收陳平於亡命，英雄陳力，羣策畢舉，此高祖之大略，所以成帝業也。若乃靈瑞符應，又可略聞矣。初劉媪妊高祖，而夢與神遇，震電晦冥，有龍蛇之怪，及長而多靈，有異於衆，是以王武感物而折契，呂公覩形而進女。秦皇東遊，以厭其氣，呂后望雲而知所處，始受命則白蛇分，西入關則五星聚，故淮陰留侯，謂之天授，非人力也。歷古今之得失，驗行事之成敗，稽帝王之世運，考五者之所謂，取舍不厭斯位，符瑞不同斯度，而苟昧權利，越次妄據，外不量力，內不知命，則必喪保家之主，失天年之壽，遇折足之凶，伏斧鉞之誅。英雄誠知覺寤，畏若禍戒，超然遠覽，淵然深識，收陵嬰之明分，絕信布之覬覦，距逐鹿之瞽說，審神器之有授，無貪不可冀，爲二母之所笑，則福祚流於子孫，天祿其永終矣。

李蕭遠運命論 ○ ○ 知其不可奈何而安之若命。是此文注脚。○ 希世苟合一節。與感所由。○ 處處卽束逐客督責二篇亦相出入。

可謂浩乎沛然矣。

夫治亂運也。窮達命也。貴賤時也。故運之所隆。必生聖明之君。聖明之君。必有忠賢之臣。其所以相遇也。不求而自合。其所以相親也。不介而自親。唱之而必和。謀之而必從。道德元同。曲折合符。得失不能疑。其志讒構不能離其交。然後得成功也。其所以得然者。豈徒人事哉。授之者天也。告之者神也。成之者運也。夫黃河清而聖人生。里社鳴而聖人出。羣龍見而聖人用。故伊尹有莘氏之媵臣也。而阿衡於商。太公渭濱之賤老也。而尙父於周。百里奚在虞而虞亡。在秦而秦霸。非不才於虞。而才於秦也。張良受黃石之符。誦三略之說。以遊於羣雄。其言也。如以水投石。莫之受也。及其遭漢祖也。其言也。如以石投水。莫之逆也。非張良之拙說於陳項。而巧言於沛公也。然則張良之言一也。不識其所以合離。合離之由。神明之道也。故彼四賢者。名載於錄圖。事應乎天人。其可格之賢。愚哉。孔子曰。清明在躬。氣志如神。嗜欲將至。有開必先。天降時雨。山川出雲。詩云。惟嶽降神。生甫及申。惟申及甫。惟周之翰。運命之謂也。豈惟興主。亂亡者亦如之焉。幽王之惑。褒女也。妖始於夏庭。曹伯陽之獲。公孫彊也。徵發於社宮。叔孫豹之暱。豎牛也。禍成於庚宗。吉凶成敗。各以數至。咸皆不求而自合。不介而自親矣。昔者聖人受命。河洛曰。以文命者。七九而衰。以武興者。六八而謀。及成王定鼎於郊。鄒卜世三十。卜年七百。天所命也。故自幽厲之間。周道大壞。二霸之後。禮樂陵遲。文薄之弊。漸於靈景。辯詐之僞。成於七國。酷烈之極。積於亡秦。文章之貴。棄於漢祖。雖仲

尼至聖。顏冉大賢。揖讓於規矩之內。闔闔於洙泗之上。不能遏其端。孟軻孫卿。體二希聖。從容正道。不能維其末。天下卒至於溺而不可援。夫以仲尼之才也。而器不用於魯衛。以仲尼之辯也。而言不行於定哀。以仲尼之謙也。而見忌於子西。以仲尼之仁也。而取讎於桓魋。以仲尼之智也。而屈厄於陳蔡。以仲尼之行也。而招毀於叔孫。夫道足以濟天下。而不得貴於人。言足以經萬世。而不見信於時。行足以應神明。而不能彌綸於俗。應聘七十國。而不一獲其主。驅驟於蠻夏之域。屈辱於公卿之門。其不遇也如此。及其孫子思。希聖備體。而未之至。封已養高。勢動人主。其所遊歷。諸侯莫不結駟而造門。猶有不得賓者焉。其徒子夏。升堂而未入於室者也。退老於家。魏文侯師之。西河之人。肅然歸德。比之於夫子。而莫敢間其言。故曰。治亂運也。窮達命也。貴賤時也。而後世君子。區區於一主。歎息於一朝。屈原以之沉湘。賈誼以之發憤。不亦過乎。然則聖人所以爲聖者。蓋在乎樂天知命矣。故遇之而不怨。居之而不疑也。其身可抑。而道不可屈。其位可排。而名不可奪。譬如水也。通之斯爲川焉。塞之斯爲淵焉。升之於雲。則雨施。沉之於地。則土潤。體清以洗物。不亂於濁。受濁以濟物。不傷於清。是以聖人處窮達如一也。夫忠直之迂於主。獨立之負於俗。理勢然也。故木秀於林。風必摧之。堆出於岸。流必湍之。行高於人。衆必非之。前鑒不遠。覆車繼軌。然而志士仁人。猶蹈之而弗悔。操之而弗失。何哉。將以遂志而成名也。求遂其志。而冒風波于險塗。求成其名。而歷謗議於當時。彼所以處之。蓋有算矣。子夏曰。死生有命。富貴在天。故道之將行也。命之將貴也。則伊尹呂尚之興於商周。百里子房之用於秦漢。不求而自得。不徼而自遇矣。道之將廢也。命之將賤也。豈獨君子恥之而弗爲乎。蓋亦知爲之而弗得矣。凡希世苟合之士。籛除戚施之人。俛仰尊貴之顏。逶迤勢

利之間意無是非。讚之如流。言無可否。應之如響。以闕看爲精神。以向背爲變通。勢之所集。從之知歸。市勢之所去。棄之如脫。遺其言曰。名與身孰親也。得與失孰賢也。榮與辱孰珍也。故遂絜其衣服。矜其車徒。冒其貨賂。淫其聲色。脉脉然。自以爲得矣。蓋見龍逢比干之亡其身。而不惟飛廉惡來之滅其族也。蓋知伍子胥之屬鏹於吳。而不戒費無忌之誅夷於楚也。蓋譏汲黯之白首於主爵。而不懲張湯牛車之禍也。蓋笑蕭望之跋躓於前。而不懼石顯之絞縊於後也。故夫達者之算也。亦各有盡矣。曰。凡人之所奔競於富貴。何爲者哉。若夫立德。必須貴乎。則幽厲之爲天子。不如仲尼之爲陪臣也。必須勢乎。則王莽董賢之爲三公。不如揚雄仲舒之闕其門也。必須富乎。則齊景之千駟。不如顏回原憲之約其身也。其爲實乎。則執杓而飲河者。不過滿腹。棄室而灑雨者。不過濡身。過此以往。弗能受也。其爲名乎。則善惡書于史策。毀譽流于千載。賞罰懸乎天道。吉凶灼乎鬼神。固可畏也。將以娛耳目。樂心意乎。譬命駕而遊五都之市。則天下之貨畢陳矣。褰裳而涉汶陽之邱。則天下之稼如雲矣。椎紵而守敖庾。海陵之倉。則山坻之積在前矣。扱衽而登鍾山藍田之上。則夜光璵璠之珍可觀矣。夫如是也。爲物甚衆。爲己甚寡。不愛其身。而嗇其神。風驚塵起。散而不止。六疾待其前。五刑隨其後。利害生其左。攻奪出其右。而自以爲見身名之親疎。分榮辱之客主哉。天地之大德曰生。聖人之大寶曰位。何以守位曰仁。何以正人曰義。故古之王者。蓋以一人治天下。不以天下奉一人也。古之仕者。蓋以官行其義。不以利冒其官也。古之君子。蓋恥得之而弗能治也。不恥能治而弗得也。原乎天人之性。核乎邪正之分。權乎禍福之門。終乎榮辱之算。其昭然矣。故君子舍彼取此。若夫出處不違其時。默語不失其人。天動星迴。而辰極猶居其所。璣旋輪轉。而衡軸猶執其

中既明且哲。以保其身。貽厥孫謀。以燕翼子者。昔吾先友嘗從事於斯矣。

曹元首六代論○文無今古。以有隱顯射激者爲高深。○正喻始終一意。所以鬪亂不亂。然蹊徑存焉。○摹擬長沙。轍迹太顯。

一氣奔放。尙是西漢之遺。往復過多。則利害切身。不觀言之灌灌耳。義門辦此爲陳思之文。信然。

昔夏殷周之歷世數十。而秦二世而亡。何則。三代之君與天下共其民。故天下同其憂。秦王獨制其民。故傾危而莫救。夫與人共其樂者。人必憂其憂。與人同其安者。人必拯其危。先王知獨治之不能久也。故與人共治之。知獨守之不能固也。故與人共守之。兼親疏而兩用。參同異而並進。是以輕重足以相鎮。親疏足以相衛。并兼路塞。逆節不生。及其衰也。桓文帥禮。苞茅不貢。齊師伐楚。宋不城周。晉戮其宰。王綱弛而復張。諸侯傲而復肅。二霸之後。寢以陵遲。吳楚憑江。負固方城。雖心希九鼎。而畏迫宗姬。姦情散於胸懷。逆謀消於唇吻。斯豈非信重親戚。任用賢能。枝葉碩茂。本根賴之。與自此之後。轉相攻伐。吳并於越。晉分爲三。魯滅於楚。鄭兼於韓。暨乎戰國。諸姬微矣。唯燕衛獨存。然皆弱小。西迫彊秦。南畏齊楚。救於滅亡。匪遑相卹。至於王赧。降爲庶人。猶枝幹相持。得居虛位。海內無主。四十餘年。秦據勢勝之地。騁譎詐之術。征伐關東。蠶食九國。至於始皇。乃定天位。曠日若彼。用力若此。豈非深根固蒂。不拔之道乎。易曰。其亡其亡。繫于苞桑。周德其可謂當之矣。秦觀周之弊。將以爲小弱見奪。於是廢五等之爵。立郡縣之官。棄禮樂之教。任苛刻之政。子弟無尺寸之封。功臣無立錐之土。內無宗子。以自毗輔。外無諸侯。以爲蕃衛。仁心不加於親戚。惠澤不流於枝葉。譬若芟刈股肱。獨任胸腹。浮舟江海。捐棄楫櫂。觀者爲之寒心。而始皇晏然。自以爲關中之固。金城千里。子孫帝王萬世之業也。豈不悖哉。是時淳于越諫曰。臣聞殷周之王。封子弟功

臣千有餘人。今陛下君有海內。而子弟爲匹夫。卒有田常六卿之臣。而無輔弼。何以相救。事不師古。而能長久者。非所聞也。始皇聽李斯偏說。而絀其義。至身死之日。無所寄付。委天下之重於凡夫之手。託廢立之命於姦臣之口。至於趙高之徒。誅鋤宗室。胡亥少習刻薄之教。長遵凶父之業。不能改制易法。寵任兄弟。而乃師謨申商。咨謀趙高。自幽深宮。委政讒賊。身殘望夷。求爲黔首。豈可得哉。遂乃郡國離心。衆庶潰叛。勝廣唱之於前。劉項斃之於後。向使始皇納淳于之策。抑李斯之論。割裂州國。分王子弟。封三代之後。報功臣之勞。十有常君。民有定主。枝葉相扶。首尾爲用。雖使子孫有失道之行。時人無湯武之賢。姦謀未發。而身已屠戮。何區區之陳項。而復得措其手足哉。故漢祖奮三尺之劍。驅烏集之衆。五年之中。而成帝業。自開關以來。其興功立勳。未有若漢祖之易者也。夫拔深根者。難爲功。摧枯朽者。易爲力。理勢然也。漢鑒秦之失。封植子弟。及諸呂擅權。圖危劉氏。而天下所以不能傾動。百姓所以不易心者。徒以諸侯彊大。磐石膠固。東牟朱虛。授命於內。齊代吳楚。作衛於外。故也。向使高祖踵亡秦之法。忽先王之制。則天下已傳非劉氏有也。然高祖封建。地過古制。大者跨州兼域。小者連城數十。上下無別。權侔京室。故有吳楚七國之患。賈誼曰。諸侯強盛。長亂起姦。夫欲天下之治安。莫若衆建諸侯。而少其力。令海內之勢。若身之使臂。臂之使指。則下無背叛之心。上無誅伐之事。文帝不從。至於孝景。猥用晁錯之計。削黜諸侯。親者怨恨。疏者震怒。吳楚唱謀。五國從風。兆發高祖。釁成文景。由寬之過。制急之不漸。故也。所謂末大必折。尾大難掉。尾同於體。猶或不從。況乎非體之尾。其可掉哉。武帝從主父之策。下推恩之令。自是之後。齊分爲七。趙分爲六。淮南三割。梁代五分。遂以陵遲。子孫微弱。衣食租稅。不豫政事。或以耐金免削。或以無後國除。至

於成帝。王氏擅朝。劉向諫曰。臣聞公族者。國之枝葉。枝葉落。則本根無所芘蔭。方今同姓疏遠。母黨專政。排擯宗室。孤弱公族。非所以保守社稷。安固國嗣也。其言深切。多所稱引。成帝雖悲傷歎息。而不能用。至乎哀平。異姓秉權。假周公之事。而爲田常之亂。高拱而竊天位。一朝而臣四海。漢宗室王侯。解印釋綬。貢奉社禩。猶懼不得爲臣妾。或乃爲之符命。頌莽恩德。豈不哀哉。由斯言之。非宗子獨忠孝於惠文之間。而叛逆於哀平之際也。徒以權輕勢弱。不能有定爾。賴光武皇帝。挺不世之姿。禽王莽於已成。紹漢嗣於旣絕。斯豈非宗子之力邪。而曾不見秦之失策。襲周之舊制。踵亡國之法。而僥倖無疆之期。至於桓靈。奄豎執衡。朝無死難之臣。外無同憂之國。君孤立於上。臣弄權於下。本末不能相御。身手不能相使。由是天下鼎沸。姦凶並爭。宗廟焚爲灰燼。宮室變爲秦藪。居九州之地。而身無所安處。悲夫。魏太祖武皇帝。躬聖明之資。兼神武之略。恥王綱之廢絕。愍漢室之傾覆。龍飛譙沛。鳳翔兗豫。掃除凶逆。翦滅鯨鯢。迎帝西京。定都潁邑。德動天地。義感人神。漢氏奉天。禪位大魏。大魏之興。于今二十有四年矣。觀五代之存亡。而不用其長策。觀前車之傾覆。而不改其轍迹。子弟王空虛之地。君有不使之民。宗室竄於閭閻。不聞邦國之政。權均匹夫。勢齊凡庶。內無深根不拔之固。外無磐石宗盟之助。非所以安社稷。爲萬代之業也。且今之州牧郡守。古之方伯諸侯。皆跨有千里之士。兼軍武之任。或比國數人。或兄弟並據。而宗室子弟。曾無一人間廁其間。與相維持。非所以強榦弱枝。備萬一之慮也。今之用賢。或超爲名都之主。或爲偏師之帥。而宗室有文者。必限以小縣之宰。有武者。必置於百人之上。使夫廉高之士。畢志於衡轆之內。才能之人。恥與非類爲伍。非所以勸進賢能。褒異宗族之禮也。夫泉竭則流涸。根朽則葉枯。枝繁者蔭根。條落者本孤。故

語曰百足之蟲。至死不僵。扶之者衆也。此言雖小。可以譬大。且墉基不可倉卒而成。威名不可一朝而立。皆爲之有漸。建之有素。譬之種樹。久則深固。其根本茂盛。其枝葉若造次徙於山林之中。植於宮闕之下。雖饗之以黑墳。暖之以春日。猶不救於枯槁。何暇繁育哉。夫樹猶親戚。士猶士民。建置不久。則輕下慢上。平居猶懼其離叛。危急將如之何。是以聖王安而不逸。以慮危也。存而設備。以懼亡也。故疾風卒至。而無摧拔之憂。天下有變。而無傾危之患矣。

阮嗣宗達莊論

○文有首尾。故嗣宗不失爲至慎。○上接東方。與抱樸同其規格。

約文子及道德指歸論而爲之。文亦相似。通易論佳於此。而散漫無紀。晉宋文弊。問答之體。與解嘲客難略相似。而用意自不同。晉以後著論。每多此類。

伊單闕之辰。執徐之歲。萬物權輿之時。季秋遙夜之月。先生徘徊翱翔。迎風而遊。往遵乎赤水之上。來登乎隱盆之丘。臨乎曲轅之道。顧乎泱泱之州。恍然而止。忽然而休。不識曩之所以行。今之所以留。悵然而無樂。愁然而歸。白素焉。平晝閒居。隱几而彈琴。於是縉紳好事之徒。相與聞之。共議撰辭合句。啓所常疑。乃闕鑿整飭。嚼齒先引。推年躡踵。相隨俱進。奕奕然步。臆臆然視。投跡蹈階。趨而翔至。差肩而坐。恭袖而檢。猶豫相臨。莫肯先占。有一人。是其中雄桀也。乃怒目擊勢。而大言曰。吾生乎唐虞之後。長乎文武之裔。遊乎成康之隆。盛乎今者之世。誦乎六經之教。習乎吾儒之迹。被袞衣。冠飛翮。垂曲裾。揚雙鬣。有日矣。而未聞乎至道之要。有以異之於斯乎。且大人稱之。細人承之。願聞至教。以發其疑。先生曰。何哉。子之所疑者。客曰。天道貴生。地道貴貞。聖人脩之以建其名。吉凶有分。是非有經。務利高勢。惡死重生。故天下安而

大功成也。今莊周乃齊禍福而一死生。以天地爲一物。以萬類爲一指。無乃激惑以失真。而自以爲誠是也。於是先生乃撫琴容與。慨然而歎。俛而微笑。仰而流眄。噓噲精神。言其所見曰。昔人有欲觀於閩峯之上者。資端冕服。驂騶。至乎崑崙之下。沒而不反。端冕者常服之飾。驂騶者凡乘之耳。非所以矯騰增城之上。遊元圃之中也。且燭龍之光。不照一堂之上。鐘山之口。不談曲室之內。今吾將墮崔巍之高。杜衍謾之流言子之所由。幾其寤而獲及乎。天地生於自然。萬物生於天地。自然者無外。故天地名焉。天地者有內。故萬物生焉。當其無外。誰謂異乎。當其有內。誰謂殊乎。地流其燥。天抗其溼。月東出。日西入。隨以相從。解而後合。升謂之陽。降謂之陰。在地謂之理。在天謂之文。蒸謂之雨。散謂之風。炎謂之火。凝謂之冰。形謂之石。象謂之星。朔謂之朝。晦謂之冥。通謂之川。回謂之淵。平謂之土。積謂之山。男女同位。山澤通氣。雷風不相射。水火不相薄。天地合其德。日月順其光。自然一體。則萬物經其常。入謂之幽。出謂之章。一氣盛衰。變化而不傷。是以重陰雷電。非異出也。天地日月。非殊物也。故曰。自其異者視之。則肝膽楚越也。自其同者視之。則萬物一體也。人生天地之中。體自然之形。身者陰陽之積氣也。性者五行之正性也。情者遊魂之變欲也。神者天地之所以馭者也。以生言之。則物無不壽。推之以死。則物無不夭。自小視之。則萬物莫不小。由大觀之。則萬物莫不大。殤子爲壽。彭祖爲夭。秋毫爲大。泰山爲小。故以死生爲一貫。是非爲一條也。別而言之。則鬚眉異名。合而說之。則體之一毛也。彼六經之言。分處之教也。莊周之云。致意之辭也。大而臨之。則至極無外。小而理之。則物有其制。夫守什五之數。審左右之名。一曲之說也。循自然性。天地者寥廓之談也。凡耳目之官。名分之施。處官不易。司舉奉其身。非以絕手足。裂肢體也。然後世之好異者。不顧

其本各言我而已矣。何待於彼。殘生害性。還爲讎敵。斷割肢體。不以爲痛。目視色而不顧耳之所聞。耳所聽而不待心之所思。心欲奔而不適性之所安。故疾病萌則生意盡。禍亂作則萬物殘矣。至人者。恬於生而靜於死。生恬則情不惑。死靜則神不離。故能與陰陽化而不易。從天地變而不移。生究其壽。死循其宜。心氣平治。消息不虧。是以廣成子處空同之山。以入無窮之門。軒轅登崑崙之阜。而遺元珠之根。此則潛身者。易以爲活。而離本者。難以永存也。馮夷不遇海。若則不以己爲小。雲將不失於鴻濛。則無以知其少。由斯言之。自是者不章。自建者不立。守其有者有據。持其無者無執。月弦則滿。日朝則襲。咸池不留陽谷之上。而懸車之後。將入也。故求得者喪。爭明者失。無欲者自足。空虛者受實。夫山靜而谷深者。自然之道也。得之道而正者。君子之實也。是以作智造巧者。害於物。明著是非者。危其身。修實以顯潔者。惑於生。畏死而榮生者。失其真。故自然之理。不得作。天地不泰。而日月爭隨。朝夕失期。而晝夜無分。競逐趨利。舛倚橫馳。父子不合。君臣乖離。故復言以求信者。梁下之誠也。克己以爲人者。郭外之仁也。竊兵雉經者。亡家之子也。刳腹割肌者。亂國之臣也。曜菁華。被沆瀣者。昏世之士也。履霜露。蒙塵埃者。貪冒之民也。潔己以尤世。修身以明洿者。誹謗之屬也。繁稱是非。背質追文者。迷罔之倫也。成非媚悅。以容求孚。故被珠玉以赴水火者。桀紂之終也。含菽采薇。交餓而死。顏夷之窮也。是以名利之塗。開則忠信之誠薄。是非之辭著。則醇厚之情燦也。故至道之極。混一不分。同爲一體。得失無聞。伏羲氏結繩。神農教耕。逆之者死。順之者生。又安知貪洿之爲罰。而貞白之爲名乎。使至德之要。無外而已。大均淳固。不貳其紀。清淨寂寞。空豁以俟。善惡莫之分。是非無所爭。故萬物反其所。而得其情也。儒墨之後。堅白並起。吉凶連物。得失在心。結徒

聚黨辯說相侵。昔大齊之雄。三晉之士。嘗相與瞋目張膽。分別此矣。咸以爲百年之生難致。而日月之蹉無常。皆盛僕馬。修衣裳。美珠玉。飾帷牆。出媚君上。入欺父兄。矯厲才智。競逐縱橫。家以慧子殘。國以才臣亡。故不終其天年。而大自割繫。其於世俗也。是以山中之木。本大而莫相吹。萬數竅相和。忽焉自己。夫鷹之。不存。無其質。而濁其文。死生無變。十字而龜之見寶。知吉凶也。故至人清其質。而濁其文。死生無變。而未始有云。夫別言者。壞道之談也。折辯者。毀德之端也。氣分者。一身之疾也。二心者。萬物之患也。故夫裝束馮軾者。行以離支。慮在成敗者。坐而求敵。踰阻攻險者。趙氏之人也。舉山填海者。燕楚之人也。莊周見其若此。故述道德之妙。敍無爲之本。寓言以廣之。遐物以延之。聊以娛無爲之心。而逍遙於一世。豈將以希咸陽之門。而與稷下爭辯也哉。夫善接人者。導焉而已。無所逆之。故公孟季子。衣繡而見墨子。弗攻中山子。牟心在魏闕。而詹子不距。因其所以來。用其所以至。循而秦之。使自居之。發而開之。使自舒之。且莊周之書。何足道哉。猶未聞夫太始之論。元古之微言乎。直能不害於物。而形以生。物無所毀。而神以清。形神在我。而道德成。忠信不離。而上下平。茲客今談。而同古。齊說而意殊。是心能守其本。而口發不相須也。於是二三子者。風搖波蕩。相視臆脈。亂次而退。蹉跌失迹。隨而望之。耳後頗亦以是。知其無實喪氣。而慙愧於衰僻也。

嵇康養生論

○積然自放

此等文自論衡出。時有牙慧可取。

世或有謂神仙可以學得。不死可以力致者。或云上壽百二十。古今所同。過此以往。莫非夭妄者。此皆兩

失其情。試粗論之。夫神仙雖不見。然記籍所載。前史所傳。較而論之。其有必矣。似特受異氣。稟之自然。非積學所能致也。至於導養得理。以盡性命。上獲千餘歲。下可數百年。可有之耳。而世皆不精。故莫能得之。何以言之。夫服藥求汗。或有不獲。而愧情一集。渙然流離。終朝未餐。則囂然思食。而曾子銜哀。七日不饑。夜分而坐。則低迷思寢。內懷殷憂。則達旦不瞑。勁刷理鬢。醇醴發顏。僅乃得之。壯士之怒。赫然殊觀。植髮衝冠。由此言之。精神之於形骸。猶國之有君也。神躁於中。而形喪於外。猶君昏於上。國亂於下也。夫爲稼於湯世。偏有一溉之功者。雖終歸於燋爛。必一溉者後枯。然則一溉之益。固不可誣也。而世常謂一怒不足以侵性。一哀不足以傷身。輕而肆之。是猶不識一溉之益。而望嘉穀於旱苗者也。是以君子知形恃神以立。神須形以存。悟生理之易失。知一過之害生。故修性以保神。安心以全身。愛憎不棲於情。憂喜不留於意。泊然無感。而體氣和平。又呼吸吐納。服食養身。使形神相親。表裏俱濟也。夫田種者。一畝十斛。謂之良田。此天下之通稱也。不知區種。可百餘斛。田種一也。至於樹養不同。則功收相懸。謂商無十倍之價。農無百斛之望。此守常而不變者也。且豆令人重。榆令人瞑。合歡蠲忿。萱草忘憂。愚智所知也。薰辛害目。豚魚不養。常世所識也。蝨處頭而黑。麝食柏而香。頸處險而瘦。齒居晉而黃。推此而言。凡所食之氣。蒸性染身。莫不相應。豈惟蒸之使重。而無使輕。害之使闇。而無使明。薰之使黃。而無使堅。芬之使香。而無使延哉。故神農曰。上藥養命。中藥養性者。誠知性命之理。因輔養以通也。而世人不察。惟五穀是見。聲色是耽。目惑元黃。耳務淫哇。滋味煎其肺腑。醴醪煮其腸胃。香芳腐其骨髓。喜怒悖其正氣。思慮消其精神。哀樂殃其平粹。夫以蕞爾之軀。攻之者非一塗。易竭之身。而外內受敵。身非木石。其能久乎。其自用甚者。飲食

不節以生百病。好色不勸。以致乏絕。風寒所災。百毒所傷。中道夭於衆難。世皆知笑悼。謂之不善持生也。至於措身失理。亡之於微。積微成損。積損成衰。從衰得白。從白得老。從老得終。悶若無端。中智以下。謂之自然。縱少覺悟。咸嘆恨於所遇之初。而不知慎衆險於未兆。是猶桓侯抱將死之疾。而怒扁鵲之先見。以覺痛之日爲受病之始也。害成於微。而救之於著。故有無功之理。馳騁常人之域。故有一切之壽。仰觀俯察。莫不皆然。以多自證。以同自慰。謂天地之理盡此而已矣。縱聞養生之事。則斷以所見。謂之不然。其次狐疑。雖少庶幾。莫知所由。其次自力服藥。半年一年。勞而未驗。志以厭衰。中路復廢。或益之以畝澮。而泄之以尾閘。而欲坐望顯報者。或抑情忍欲。割棄榮願。而嗜好常在耳目之前。所希在數十年之後。又恐兩失。內懷猶豫。心戰於內。物誘於外。交賒相傾。如此復敗者。夫至物微妙。可以理知。難以目識。譬猶豫章生七年。然後可覺耳。今以躁競之心。涉希靜之塗。意速而事遲。望近而應遠。故莫能相終。夫悠悠者。既以未效不求。而求者以不專喪業。偏恃者以不兼無功。追術者以小道自溺。凡若此類。故欲之者。萬無一能成也。善養生者。則不然矣。清虛靜泰。少私寡欲。知名位之傷德。故忽而不營。非欲而強禁也。識厚味之害性。故棄而不顧。非貪而後抑也。外物以彛心不存。神氣以醇泊獨著。曠然無憂患。寂然無思慮。又守之以一。養之以和。和理日濟。同乎大順。然後蒸以靈芝。潤以醴泉。晞以朝陽。綏以五絃。無爲自得。體妙心元。忘歡而後樂足。遺生而後身存。若此以往。庶可與羨門比壽。王喬爭年。何爲其無有哉。

陸士衡五等論○問架遂成○須尋其論議營陣與元首同異處乃識文章升降之故立言先後之法○何嘗不闔闢盡能而不能執規矩以爲方圓措意欲挽昔人之偏

運思極密細意極多然亦以此累氣

夫體國經野。先王所慎。創制垂基。思隆後葉。然而經略不同。長世異術。五等之制。始於黃唐。郡縣之治。創自秦漢。得失成敗。備在典謨。是以其詳可得而言。夫先王知帝業至重。天下至曠。曠不可以偏制。重不可以獨任。任重必於借力。制曠終乎因人。故設官分職。所以輕其任也。並建五長。所以宏其制也。於是乎立其封疆之典。財其親疎之宜。使萬國相維。以成磐石之固。宗庶雜居。而定維城之業。又有以見綏世之長。御識人情之大方。知其爲人不如厚己。利物不如圖身。安上在于悅下。爲己在乎利人。故易曰。說以使民。民忘其勞。孫卿曰。不利而利之。不如利而後利之。利也。是以分天下以厚樂。而已得與之同憂。饗天下以豐利。而我得與之共害。利博則恩篤。樂遠則憂深。故諸侯享食土之實。萬國受世及之祚矣。夫然。則南面之君。各務其治。九服之民。知有定主。上之子愛。於是乎生下之體信。於是乎結世治。足以敦風道。衰足以御暴。故強毅之國。不能擅一時之勢。雄俊之士。無所寄霸王之志。然後國安。由萬邦之思治。主尊賴羣后之圖身。譬如衆目營方。則天網自昶。四體辭難。而心膂獲乂。三代所以直道。四王所以垂業也。夫盛衰降弊。理所固有。教之廢興。繫乎其人。愿法期於必涼。明道有時而闕。故世及之制。弊於彊禦。厚下之典。漏於末折。侵弱之釁。造自三季。陵夷之禍。終於七雄。昔者成湯親照夏后之鑒。公旦目涉商人之戒。文質相濟。損益有物。故五等之禮。不革于時。封畛之制。有隆焉爾者。豈玩二王之禍。而闕經世之算乎。固知百世非可懸御。善制不能無弊。而侵弱之辱。愈於殄祀。土崩之困。痛於陵夷也。是以經始權其多福。慮終取其少禍。非謂侯伯無可亂之符。郡縣非致治之具也。故國憂賴其釋位。主弱憑其翼戴。及承微積弊。王室遂卑。猶保名位。祚垂後嗣。皇統幽而不輟。神器否而必存者。豈非置執使之然與。降及亡秦。棄道任術。懲周

之失。自矜其得。尋斧始於所庇。制國昧於弱下。國慶獨饗其利。主憂莫與其害。雖速亡趨亂。不必一道。顛沛之釁。實由孤立。是蓋思五等之小怨。亡萬國之大德。知陵夷之可患。閹土崩之爲痛也。周之不競。有自來矣。國乏令主。十有餘世。然片言勸王。諸侯必應。一朝振矜。遠國先叛。故彊晉收其請隧之圖。暴楚頓其觀鼎之志。豈劉項之能闕關。勝廣之敢號澤哉。借使秦人因循周制。雖則無道。有與共弊。覆滅之禍。豈在曩日。漢矯秦枉。大啓侯王。境土踰溢。不遵舊典。故賈生憂其危。晁錯痛其亂。是以諸侯阻其國家之富。憑其士民之力。勢足者反捷。士狹者逆遲。六臣犯其弱網。七子衝其漏網。皇祖夷於黥徒。西京病於東帝。是蓋過正之災。而非建侯之累也。然呂氏之難。朝士外顧。宋昌策漢。必稱諸侯。逮至中葉。忌其失節。割削宗子。有名無實。天下曠然。復襲亡秦之軌矣。是以五侯作威。不忌萬邦。新都襲漢。易於拾遺也。光武中興。纂隆皇統。而猶遵覆車之遺轍。養喪家之宿疾。僅及數世。姦軌充斥。卒有強臣專朝。則天下風靡。一夫縱橫。則城池自夷。豈不危哉。在周之衰。難興王室。放命者七臣。干位者三子。嗣王委其九鼎。凶族據其天邑。鉦聲震於闔宇。鋒鏑流乎絳闕。然禍止畿甸。害不覃及。方天下晏然。以治待亂。是以宣王興於共和。襄惠振於晉鄭。豈若二漢階鬪。暨擾而四海已沸。孽臣朝入。而九服夕亂哉。遠惟王莽篡逆之事。近覽董卓擅權之際。億兆悼心。愚智同痛。然周以之存。漢以之亡。夫何故哉。豈世乏曩時之臣。士無匡合之志。與蓋遠績。屈於時異。雄心挫於卑勢耳。物烈士扼腕。終委寇讎之手。中人變節。以助虐國之桀。雖復時有鳩合同志。以謀王室。然上非奧主。下皆市人。師旅無先定之班。君臣無相保之志。是以義兵雲合。無救劫弑之禍。民望未改。而已見大漢之滅矣。或以諸侯世位。不必常全。昏主暴君。有時比迹。故五等所以多亂。今之牧守

皆以官方庸能。雖或失之。其得固多。故郡縣易以爲治。夫德之休明。黜陟日用。長率連屬。咸述其職。而淫昏之君。無所容過。何則。其不治哉。故先代有以之興矣。苟或衰陵。百度自悖。鬻官之吏。以貨準才。則貪殘之萌。皆如羣后也。安在其不亂哉。故後王有以之廢矣。且要而言之。五等之君。爲己思治。郡縣之長。爲利圖物。何以徵之。蓋企及進取。仕子之常志。修己安民。良士所希及。夫進取之情。銳而安民之譽。遲。是故侵百姓以利己者。在位所不憚。損實事以養名者。官長所夙夜也。君無卒歲之圖。臣挾一時之志。五等則不然。知國爲己土。衆皆我民。民安己受其利。國傷家嬰其病。故前人欲以垂後。後嗣思其堂構。爲上無苟且之心。羣下知膠固之義。使其並賢居治。則功有厚薄。兩愚處亂。則過有深淺。然則八代之制。幾可以一理貫。秦漢之典。殆可以一言蔽矣。銜銖稱量而出。字句皆有氣。類于古爲散朴。于後爲指南。

潘正叔安身論

于平鈍。理勝。○傷。

蓋崇德莫大乎安身。安身莫尚乎存正。存正莫重乎無私。無私莫深乎寡欲。是以君子安其身而後動。易其心而後語。定其交而後求。篤其志而後行。然則動者吉凶之端也。語者榮辱之主也。求者利病之幾也。行者安危之決也。故君子不妄動也。動必適其道。不徒語也。語必經乎理。不苟求也。求必造於義。不虛行也。行必由於正。夫然用能免或擊之凶。享自天之祐。故身不安則殆。言不從則悖。交不審則惑。行不篤則危。四者行乎中。則憂患接于外矣。憂患之接。必生於自私。而興於有欲。自私者不能成其私。有欲者不得濟其欲。理之至也。欲苟不濟。能無爭乎。私苟不從。能無伐乎。人人自私。家家自欲。衆欲並爭。羣私交伐。爭則亂之萌也。伐則怨之府也。怨亂旣構。危害及之。得不懼乎。然棄本要末之徒。知進忘退之士。莫不飾才

銳智抽鋒擢穎。傾側乎勢利之交。馳騁乎當塗之務。朝有彈冠之朋。野有結綬之友。黨與熾於前。榮名扇其後。握權則赴者鱗集。失寵則散者瓦解。求利則託芻頸之權。爭路則構刻骨之隙。於是浮僞波騰。曲辯雲沸。寒暑殊聲。朝夕異價。鴛鴦希奔放之跡。鉛刀競一割之用。至於愛惡相攻。與奪交戰。誹謗噂沓。毀譽縱橫。君子務能。小人伐技。風頹於上。俗弊於下。禍結而恨爭。也不強。患至而悔伐之未辯。大者傾國喪家。次則覆身滅祀。其故何耶。豈不始于私欲。而終于爭伐哉。君子則不然。知自私之害公也。故後外其身。知有欲之傷德也。故遠絕榮利。知爭競之遭災也。故犯而不校。知好伐之招怨也。故有功而不德。安身而不爲私。故身正而私全。慎言而不適欲。故言濟而欲從。定交而不求益。故交立而益厚。謹行而不求名。故行成而名美。止則立乎無私之域。行則由乎不爭之塗。必將通天下之理。而濟萬物之性。天下猶我。故與天下同其欲。己猶萬物。故與萬物同其利。夫能保其安者。非謂崇生之厚。而耽逸豫之樂也。不忘危而已。有其進者。非謂窮貴寵之榮。而藉名位之重也。不忘退而已。存其治者。非謂嚴形政之威。而明司察之禁也。不忘亂而已。故寢蓬室。隱陋巷。披短褐。茹藜藿。環堵而居。易衣而出。苟存乎道。非不安也。雖坐華殿。載文軒。服黼繡。御方丈。重門而處。成列而行。不得與之齊榮。用天時。分地利。甘布衣。安藪澤。沾體塗足。耕而後食。苟崇乎德。非不進也。雖居高位。饗重祿。執權衡。握機祕。功蓋當時。勢侔人主。不得與之比逸。遺慮沒才智。忘肝膽。棄形器。貌若無能。志若不及。苟正乎心。非不治也。雖繁計策。廣術藝。審刑名。峻法制。文辯流離。議論絕世。不得與之爭功。故安也者。安乎道者也。進也者。進乎德者也。治也者。治乎心者也。未有安身而不能保國家。進德而不能處富貴。治心而不能治萬物者也。然思危所以求安。慮退所以能進。懼亂

所以保治戒亡所以獲存也。若乃弱志虛心，曠神遠致，徒倚乎不拔之根，浮遊乎無垠之外，不自貴於物而物宗焉，不自重於人而人敬焉，可親而不可慢也，可尊而不可遠也，親之如不足，天下莫之能狎也，舉之如易勝，而當世莫之能困也，達則濟其道而不榮也，窮則善其身而不悶也，用則立于上而非爭也，舍則藏于下而非讓也。夫榮之所不能動者，則辱之所不能加也，利之所不能勸者，則害之所不能嬰也。譽之所不能益者，則毀之所不能損也。今之學者，誠能釋自私之心，塞有欲之求，杜交爭之原，去矜伐之態，動則行乎至通之路，靜則入乎大順之門，泰則翔乎寥廓之宇，否則淪乎渾冥之泉，邪氣不能干其度，外物不能擾其神，哀樂不能盪其守，死生不能易其真，而以造化爲工匠，天地爲陶鈞，名位爲糟粕，勢利爲埃塵，治其內而不飾其外，求諸己而不假諸人，忠肅以奉上，愛敬以事親，可以御一體，可以牧萬民，可以處富貴，可以安賤貧，經盛衰而不改，則庶幾能安身矣。

晉升晉紀總論○

雄駿縝密皆未滿量製過秦一節爲謀篇之疏○晉紀亡佚昭明選文著書降爲單簡○厚集其陳使轉處有力有神佳篇也

雄駿類賈生縝密似子政晉文之傑也

縝密則有之雄駿則未盡

史臣曰：昔高祖宣皇帝以雄才碩量，應運而仕，值魏太祖創基之初，籌畫軍國，嘉謀屢中，遂服輿軫，驅馳三世，性深阻，有如城府，而能寬綽以容納，行任數以御物，而知人善采拔，故賢愚咸懷，小大畢力，爾乃取鄧艾於農瑣，引州泰於行役，委以文武，各善其事，故能西禽孟達，東舉公孫淵，內夷曹爽，外襲王淩，神略獨斷，征伐四克，維御羣后，大權在己，屢拒諸葛亮節制之兵，而東支吳人輔車之勢，軍旅屢動，邊鄙無虧，於是百姓與能，大象始構矣。世宗承基，太祖繼業，元豐亂內，欽誕寇外，潛謀雖密，而在幾必兆，淮浦再擾。

而許洛不震。咸黜異圖。用融前烈。然後推轂鍾鄧。長驅庸蜀。三關電掃。劉禪入臣。天符人事。於是信矣。始當非常之禮。終受備物之錫。名器崇於周公。權智嚴於伊尹。至於世祖。遂享皇極。正位居體。重言慎法。仁以厚下。儉以足用。和而不弛。寬而能斷。故民詠惟新。四海悅勸矣。聿修祖宗之志。思輯戰國之苦。腹心不同。公卿異議。而獨納羊祜之策。以從善爲衆。故至於咸寧之末。遂非羣議。而杖王杜之決。汎舟三峽。介馬桂陽。役不二時。江湘來同。夷吳蜀之壘垣。通二方之險塞。掩唐虞之舊域。班正朔於八荒。太康之中。天下書同文。車同軌。牛馬被野。餘糧棲畝。行旅草舍。外閭不閉。民相遇者如親。其匱乏者。取資於道路。故於時天下有無窮人之諺。雖太平未洽。亦足以明吏奉其法。民樂其生。百代之一時矣。武皇旣崩。山陵未乾。楊駿被誅。母后廢黜。朝士舊臣。夷滅者數十族。尋以二公。楚王之變。宗子無維城之助。而闕伯實沈之卻。歲構師尹。無具瞻之貴。而顛墜戮辱之禍。日有。至乃易天子以太上之號。而有免官之謠。民不見德。唯亂是聞。朝爲伊周。夕爲桀跖。善惡陷於成敗。毀譽脅於勢利。於是輕薄干紀之士。役姦智以投之。如夜蟲之赴火。內外混淆。庶官失才。名實反錯。天網解紐。國政迭移於亂人。禁兵外散於四方。方岳無鈞石之鎮。關門無結草之固。李辰石冰。傾之於荆揚。劉淵王彌。撓之於青冀。二十餘年。而河洛爲墟。戎羯稱制。二帝失尊。山陵無所。何哉。樹立失權。託付非才。四維不張。而苟且之政多也。夫作法於治。其弊猶亂。作法於亂。誰能救之。故于時。天下非暫弱也。軍旅非無素也。彼劉淵者。離石之將兵。都尉王彌者。青州之散吏也。蓋皆弓馬之士。驅走之人。凡庸之才。非有吳先主諸葛孔明之能也。新起之寇。烏合之衆。非吳蜀之敵也。脫未爲兵。裂裳爲旗。非戰國之器也。自下逆上。非鄰國之勢也。然而成敗異效。擾天下如驅羣羊。舉二都如拾遺。

芥將相侯王。連頭受戮。乞爲奴僕。而猶不獲。后嬪妃主虜辱於戎卒。豈不哀哉。夫天下大器也。羣生重畜也。愛惡相攻。利害相奪。其勢常也。若積水于防。燎火於原。未嘗暫靜也。器大者。不可以小道治。勢動者。不可以爭競擾。古先哲王。知其然也。是以扞其大患。而不有其功。禦其大災。而不尸其利。百姓皆知上德之生己。而不謂浚己以生也。是以感而應之。悅而歸之。如晨風之鬱北林。龍魚之趨淵澤也。順乎天而享其運。應乎人而和其義。然後設禮文以治之。斷刑罰以威之。謹好惡以示之。審禍福以喻之。求明察以官之。篤慈愛以固之。故衆知向方。皆樂其生。而哀其死。悅其教。而安其俗。君子勤禮。小人盡力。廉恥篤於家閭。邪僻銷於胸懷。故其民有見危以授命。而不求生。以害義。又況可奮臂大呼。聚之以干紀作亂之事乎。基廣則難傾。根深則難拔。理節則不亂。膠結則不遷。是以昔之有天下者。所以長久也。夫豈無僻主。賴道德典刑以維持之也。故延陵季子。聽樂以知諸侯存亡之數。短長之期者。蓋民情風教。國家安危之本也。昔周之興也。后稷生於姜嫄。而天命昭顯。文武之功。起於后稷。故其詩曰。思文后稷。克配彼天。又曰。立我蒸民。莫匪爾極。又曰。實穎實粟。卽有郃家室。至於公劉。遭狄人之亂。去郃之豳。身服厥勞。故其詩曰。乃裹糗糧。于囊于囊。陟則在巘。復降在原。以處其民。以至於太王。爲戎翟所逼。而不忍百姓之命。杖策而去之。故其詩曰。來朝走馬。帥西水滸。至于岐下。周民從而思之。曰。仁人不可失也。故從之者如歸市。居之一年。成邑。二年。成都。三年。五倍其初。每勞來而安集之。故其詩曰。乃慰乃止。乃左乃右。乃疆乃理。乃宣乃畝。以至於王季。能貊其德音。故其詩曰。克明克類。克長克君。載錫之光。至於文王。備修舊德。而惟新其命。故其詩曰。惟此文王。小心翼翼。昭事上帝。聿懷多福。由此觀之。周家世積忠厚。仁及草木。內睦九族。外尊事黃耆。

養老乞言以成其福祿者也。而其妃后躬行四教。尊敬師傅。服澣濯之衣。修煩辱之事。化天下以婦道。故其詩曰。刑於寡妻。至於兄弟。以御于家邦。是以漢濱之女。守潔白之志。中林之士。有純一之德。故曰。文武自天保以上。治內采薇。以下治外。始於憂勤。終於逸樂。於是天下三分有二。猶以服事殷。諸侯不期而會者八百。猶曰。天命未至。以三聖之智。伐獨夫之紂。猶正其名教。曰。逆取順守。保大定功。安民和衆。猶著大武之容。曰。未盡善也。及周公遭變。陳后稷先公風化之所由。致王業之艱難者。則皆農夫女工衣食之事也。故自后稷之始。基靜民。十五王而文始平之。十六王而武始居之。十八王而康克安之。故其積基樹本。經緝禮俗。節理人情。恤隱民事。如此之纏綿也。爰及上代。雖文質異時。功業不同。及其安民立政者。其揆一也。今晉之興也。功烈於百王。事捷於三代。蓋有爲以爲之矣。宣景遭多難之時。務伐英雄。誅庶桀。以便事。不及修公劉太王之仁也。受遺輔政。屢遇廢置。故齊王不明。不獲思庸於亳。高貴沖人。不得復子明辟。二祖逼禪代之期。不暇待三分八百之會也。是其創基立本。異於先代者也。又加之朝寡純德之士。鄉乏不二之老。風俗淫僻。恥尚失所。學者以莊老爲宗。而黜六經。談者以虛薄爲辯。而賤名檢行身者。以放濁爲通。而狹節信。進仕者以苟得爲貴。而鄙居正。當官者以望空爲高。而笑勤恪。是以目三公以蕭杌之稱。標上議以虛談之名。劉頤屢言治道。傅咸每糾邪正。皆謂之俗吏。其倚杖虛曠。依阿無心者。皆名重海內。若夫文王日昃不暇食。仲山甫夙夜匪懈者。蓋共嗤點以爲灰塵。而相詬病矣。由是毀譽亂於善惡之實。情慝奔於貨慾之途。選者爲人擇官。官者爲身擇利。而秉鈞當軸之士。身兼官以十數。大極其尊。小錄其要。幾事之失。十恆八九。而世族貴戚之子弟。陵邁超越。不拘資次。悠悠風塵。皆奔競之士。列官千百。無讀

賢之舉子。眞著崇讓而莫之省。子雅制九班而不得用。長虞數直筆而不能糾。其婦女莊櫛織紝。皆取成於婢僕。未嘗知女工絲枲之業。中饋酒食之事也。先時而昏。任情而動。故皆不恥淫佚之過。不拘妒忌之惡。有逆于舅姑。有反易剛柔。有殺戮妾媵。有黷亂上下。父兄弗之罪也。天下莫之非也。又況責之聞四教於古。修貞順於今。以輔佐君子者哉。禮法刑政。於此大壞。如室斯構。而去其鑿契。如水斯積。而去其隄防。如火斯畜。而離其薪燎也。國之將亡。本必先顛。其此之謂乎。故觀阮籍之行。而覺禮教崩弛之所由。察庾純賈充之爭。而見師尹之多僻。考平吳之功。知將帥之不讓。思郭欽之謀。而悟戎狄之有覺。覽傅元劉毅之言。而得百官之邪。核傅咸之奏。錢神之論。而覩寵賂之彰。民風國勢如此。雖以中庸之才。守文之主。治之。辛有必見之於祭祀。季札必得之於聲樂。范燮必爲之請死。賈誼必爲之痛哭。又況我惠帝以蕩蕩之德。臨之哉。故賈后肆虐於六宮。韓午助亂於外內。其所由來者漸矣。豈特繫一婦人之惡乎。懷帝承亂。得位羈於彊臣。愍帝奔播之後。徒廁其虛名。天下之政。旣已去矣。非命世之雄。不能取之矣。然懷帝初載。嘉禾生於南昌。望氣者又云。豫章有天子氣。及國家多難。宗室迭興。以愍懷之正。淮南之壯。成都之功。長沙之權。皆卒於傾覆。而懷帝以豫章王登天位。劉向之讖云。滅亡之後。有少如水名者。得之。起事者。據秦川西南。乃得其朋。案愍帝蓋秦王子也。得位於長安。長安固秦地也。而西以南陽王爲右丞相。東以琅邪王爲左丞相。上諱業。故改鄴爲臨漳。漳水名也。由此推之。亦有徵祥。而皇極不建。禍辱及身。豈上帝臨我。而貳其心。將由人能宏道。非道宏人者乎。淳耀之烈。未渝。故大命重集于中宗元皇帝。

何承天安邊論○婉雅○指畫精鑿文事安翔由於所見旣深故無虛橋之氣

平實周盡文氣近東京

漢世言備匈奴之策。不過二科。武夫盡征伐之謀。儒生講和親之約。課其所言。互有遠志。加塞漠之外。胡敵掣肘。必未能摧鋒引日。規自開張。當由往年。冀土之民。附化者衆。二州臨境。三王出藩。經略旣張。宏圖將舉。士女延望。華夷慕義。故昧於小利。且自矜侈。外示餘力。內墜僞衆。今若務存遵養。許其自新。雖未可羈。致北闕猶足鎮靜邊境。然和親事重。當盡廟筭。誠非愚短。所能究言。若追蹤衛霍。瀚海之志。時事不等。致功亦殊。寇雖習戰。未久。又全據燕趙。跨帶秦魏。山河之險。終古如一。自非大田淮泗。內實青徐。使民有贏儲。野有積穀。然後分命方召。總率虎旅。精卒十萬。使一舉盪夷。則不足稍勤王師。以勞天下。何以言之。今遺黎習亂。志在偷安。非皆恥爲左衽。遠慕冠冕。徒以殘害剝辱。視息無寄。故緘負歸國。先後相尋。虜旣不能校勝。循理攻城。略地而輕兵掩襲。急在驅殘。是其所以速怨。召禍滅亡之日。今若遣軍追討。報其侵暴。大剪幽冀。屠城破邑。則聖朝愛育黎元。方濟之以道。若但欲撫其歸附。伐罪弔民。則駿馬奔走。不肯來征。徒興巨費。無損於彼。復奇兵深入。殺敵敗軍。苟陵患未盡。則困獸思鬪。報復之役。將遂無已。斯秦漢之末策。輪臺之所悔也。安邊固守。於計爲長。臣以安邊之計。備在史策。李牧言其端。嚴尤申其要。大略舉矣。曹孫之霸。才均智敵。江淮之間。不居各數百里。魏捨合肥。退保新城。江陵移民南涘。濡須之戍。家停羨溪。及夷陵之屯。民夷散雜。晉宣王以爲宜從江南。以北岸曹爽不許。果亡租中。此皆前代之殷鑒也。何者。斥候之郊。非畜牧之地。非耕桑之邑。故堅壁清野。以俟其來。整甲繕兵。以乘其敵。雖時有古今。勢有強弱。保民全境。不出此塗。要而歸之。有四。一曰移遠就近。二曰浚復城隍。三曰纂偶牛車。四曰計丁課仗。良守疆

其士田驍帥振其風略。蒐獵宣其號令。俎豆訓其廉恥。縣爵以糜之。設禁以威之。徭稅有程。寬猛相濟。比及十載。民知義方。然後簡將授奇。揚旌雲朔。風卷河冀。電掃嵩恆。燕弧折卻。代馬摧足。秦首斬其右臂。吳蹄絕其左肩。銘功於燕然之阿。饗徒於金微之曲。寇雖亂亡。有徵昧弱。易取若天時人事。或未盡符。抑銳俟機。宜審其算。若邊戍未增。星居布野。勤惰異教。貧富殊資。疆場之民。多懷彼此。虜在去就。不根本業。難可驅率。易在振蕩。又狡虜之性。食肉衣皮。以馳騁爲儀容。以游獵爲南畝。非有車輿之安。宮室之衛。櫛風沐雨。不以爲勞。露宿草寢。維其常性。勝則競利。敗不差走。彼來或驟。而此已奔疲。且今春踰濟。旣獲其利。乘勝忸怩。未虞天誅。比及秋末。容更送死。森騎蟻聚。輕兵鳥集。並踐禾稼。焚藝閭井。雖邊將多略。未審何以禦之。若盛師連屯。廢農必衆。馳車奔驛。起役必遲。散金行賞。損費必大。換土客戍。怨曠必繁。孰若因民所居。並修農戰。無動衆之勞。有扞衛之實。其爲利害優劣相縣也。一曰移遠就近。以實內也。今青兗舊民。冀州新附。在界首者二萬家。此寇之資也。今悉河內徙青州。民移東萊正昌北海諸郡。太山以南。南至下邳。左洙右沂。田良野沃。西阻蘭陵。北阨大峴。四塞之內。其號險固。民性重遷。闢於圖始。無虜之時。喜生咎怨。今新被鈔掠。餘懼未息。若曉示安危。居以樂土。宜其歌抃就路。視遷如歸。二曰浚復城隍。以增阻防。舊秋冬收斂。民人入保。所以警備暴客。使防衛有素也。古之城池。處處皆有。今雖頽毀。猶可修治。粗計戶數。量其所容。新徙之家。悉著城內。假其經用。爲之閭伍。納稼築場。還在一處。婦子守家。長吏爲帥。丁夫匹婦。春夏佃牧。寇至之時。一城千室。堪戰之士。不下二千。其餘羸弱。猶能登陴鼓譟。十則圍之。兵家舊說。戰士二千足抗羣虜三萬矣。三曰纂偶牛車。以飾戎誠。計千家之資。不下五百耦牛。爲車伍佰兩。參合鈎連。以

衛其衆。設使城不可固。平行趨險。賊所不能干。既已族居易。可檢括。號令先明。民知夙戒。有急徵發。信宿可聚。四曰計丁課仗。勿使有闕。千家之邑。戰士二千。隨其便能。各自有仗。素所服習。銘刻由己。還保輸之於庫。出行請以自衛。弓幹利鐵。民不辦得者。官以漸充之。數年之內。軍用粗備矣。臣聞軍國異容。施於封畿之內。兵農並修。在於疆場之表。攻守之宜。皆因其習。任其怯勇。山陵川陸之形。寒暑溫涼之氣。各由本性。易則害生。是故戊申作師。遠屯清濟。功費既重。詹怨亦深。以臣料之。未若即用彼衆之易也。管子治齊。寄令在民。商君爲秦。設以耕戰。終申威定。霸行其志業。非苟任強。實由有數。梁用走卒。其邦自滅。齊用技擊。厥衆亦離。漢魏以來。茲制漸絕。蒐山非復先王之禮。治兵徒逞耳目之欲。有急之日。民不知戰。至乃廣延賞募。奉以厚秩。發遽奔救。天下騷然。方伯刺史。拱手坐聽。自無經略。惟望朝廷遣軍。此皆忘戰之害。不教之失也。今移民實內。浚治城隍。族居聚處。課其騎射。長吏簡試。差品能不。甲科上第。漸就優別。明其勳才。表言州郡。如此。則屯部有常。不遷其業。內護老弱。外通官塗。朋曹素定。同憂等樂。情由習親。藝因事著。晝戰見貌。足相識。夜戰聞聲。足相救。斯教戰之一隅。先哲之遺術。論者必以古城荒毀。難可修復。今不謂頓便加功。整麗如舊。但欲先定民營。其閭術。墉壑存者。因而卽之。其有毀缺。權時柵斷。足以禦彼輕兵。防遏游騎。假以方將。漸就只立。牛車之賦。課仗之宜。攻守所資。軍國之要。今因民所利。導而率之。耕農之器。爲府庫之寶。田蠶之氓。兼城之用。千家總倍旅之兵。萬戶具全軍之衆。兵強而敵不戒。國富而民不勞。比於優復隊伍。坐食廩糧者。不可同年而校矣。今承平來久。邊令弛縱。弓箠利鐵。既不都斷。往歲棄甲。垂二十年。課其所住。理應消壞。謂宜申明舊科。嚴加禁塞。諸商賈往來。幢隊挾藏者。皆以軍法治之。又界上嚴

立關候。杜廢閒蹊。城保之境。諸所課仗。並加雕鐫。別造程式。若有遺鏃亡刀。及私爲竊盜者。皆可立驗。於事爲長。又鉅野湖澤廣大。南通洙泗。北連青齊。有舊縣城。正在澤內。宜立式修復。舊堵利其隸。遏給輕艦。百艘。寇若入境。引艦出戰。左右隨宜。應接其師。津毀其航。漕此以利制車。運我所長。亦微敵之要也。

劉孝標辨命論

○奇才不達。輿感之由。因以自命。故激昂憤厲。語無餘蘊。然後知蕭遠爲溫然其辭。

疎越

主上嘗與諸名賢言及管輅。歎其有奇才。而位不達。時有在赤墀之下。豫聞斯議。歸以告余。余謂士之窮通。無非命也。故謹述天旨。因言其致云爾。

臣觀管輅。天才英偉。珪璋特秀。實海內之名傑。豈日者卜祝之流乎。而官止少府丞。年終四十八。天之報施。何其寡歟。然則高才而無貴仕。饜餐而居大位。自古所歎焉。獨公明而已哉。故性命之道。窮通之數。天闕紛綸。莫知其辨。仲任蔽其源。子長闢其惑。至於鷖冠。瓿牖。必以懸天有期。鼎貴高門。則曰唯人所召。讒譖昨異。端斯起。蕭遠論其本。而不暢其流。子元語其流。而未詳其本。嘗試言之曰。夫道生萬物。則謂之道。生而無主。謂之自然。自然者。物見其然。不知其所以然。同焉皆得。不知其所以得。鼓動陶鑄。而不爲功。庶類混成。而非其力。生之無亭毒之心。死之豈虔劉之志。墜之淵泉。非其怒。昇之霄漢。非其悅。蕩乎。大乎。萬寶以之化。確乎。純乎。一作而不易。化而不易。則謂之命。命也者。自天之命也。定於冥兆。終然不變。鬼神莫能預。聖哲不能謀。觸山之力。無以抗。倒日之誠。弗能感。短則不可緩之於寸陰。長則不可急之於箭漏。至德未能踰。上智所不免。是以放助之世。浩浩襄陵。天乙之時。焦金流石。文公寃其尾。宣尼絕其糧。顏回

敗其叢蘭。冉耕歌其芣苢。夷叔斃淑媛之言。子輿困臧倉之訴。聖賢且猶若此。而況庸庸者乎。至乃伍員浮屍於江流。三閭沉骸於湘渚。賈大夫沮志於長沙。馮都尉皓髮於郎署。君山鴻漸。鏃羽儀於高雲。敬通鳳起。摧迅翻於風穴。此豈才不足而行有遺哉。近世有沛國劉瓛。瓛弟璉。並一時秀士也。瓛則關西孔子。通涉六經。循循善誘。服膺儒行。璉則志烈秋霜。心貞崑玉。亭亭高竦。不雜風塵。皆毓德於衡門。並馳聲於天地。而官有微於侍郎位。不登於執戟。相次殂落。宗祀無饗。因斯兩賢。以言古則。昔之玉質金相。英髦秀達。皆擯斥於當年。韞其才而莫用。候草木以共彫。與麋鹿而同死。膏塗平原。骨填川谷。堙滅而無聞者。豈可勝道哉。此則宰衡之與阜隸。容彭之與殤子。猗頓之與黔婁。陽文之與敦洽。咸得之於自然。不假道於才智。故曰。死生有命。富貴在天。其斯之謂矣。然命體周流。變化非一。或先號後笑。或始吉終凶。或不召自來。或因人以濟。交錯糾紛。迴環倚伏。非可以一理徵。非可以一途驗。而其道密微。寂寥忽恍。無形可以見。無聲可以聞。必御物以效靈。亦憑人而成象。譬天王之冕旒。任百官以司職。而或者覩湯武之龍躍。謂龜亂在神功。聞孔墨之挺生。謂英容擅奇響。視彭韓之豹變。謂鷲猛致人爵。見張桓之朱紱。謂明經拾青紫。豈知有力者。運之而趨乎。故言而非命。有六蔽焉爾。請陳其梗概。夫靡顏膩理。哆囁顙額。形之異也。朝秀晨終。龜鶴千歲。年之殊也。聞言如響。智昏菽麥。神之辯也。固知三者。定乎造化。榮辱之境。獨曰由人。是知二五而未識於十。其蔽一也。龍犀日角。帝王之表。河目龜文。公侯之相。撫鏡知其將刑。壓紐顯其膺祿。星虹樞電。昭聖德之符。夜哭聚雲。鬱興王之瑞。皆兆發於前期。渙汗於後葉。若謂驅貔虎。奮尺劍。入紫微。升帝道。則未達宵冥之情。未測神明之數。其蔽二也。空桑之里。變成洪川。歷陽之都。化爲魚鼈。楚師屠漢卒。

睢河鮑其流秦人坑趙士沸聲若雷震火炎崑岳礫石與琬琰俱焚嚴霜夜零蕭艾與芝蘭共盡雖游夏之英才伊顏之殆庶焉能抗之哉其蔽三也或曰明月之珠不能無類夏后之璜不能無考故亭伯死於縣長相如卒於園令才非不傑也主非不明也而碎結綠之鴻輝殘懸黎之夜色抑尺之量有短哉若然者主父偃公孫宏對策不升第歷說而不入牧豕淄原見棄州部設令忽如過隙溘死霜露其爲詬恥豈崔馬之流乎及至開東閣列五鼎電照風行聲馳海外寧前愚而後智先非而終是將榮悴有定數天命有至極而謬生妍蚩其蔽四也夫虎嘯風馳龍興雲屬故重華立而元凱升辛受生而飛廉進然則天下善人少惡人多闇主衆明君寡而薰蕕不同器梟鸞不接翼是使渾敦檣杙踵武於雲臺之上仲容庭堅耕耘於巖石之下橫謂廢興在我無繫於天其蔽五也彼戎狄者人面獸心宴安鳩毒以誅殺爲道德以蒸報爲仁義雖大風立於青邱繫齒奮於華野比於狼戾曾何足喻自金行不競天地板蕩左帶沸脣乘間電發遂覆漚洛傾五都居先王之桑梓竊名號於中縣與三皇競其氓黎五帝角其區宇種落繁熾充仞神州嗚呼福善禍淫徒虛言耳豈非否泰相傾盈縮遞運而汨之以人其蔽六也然所謂命者死生焉貴賤焉貧富焉治亂焉禍福焉此十者天之所賦也愚智善惡此四者人之所行也夫神非舜禹心異朱均才絳中庸在於所習是以素絲無恆元黃代起鮑魚芳蘭入而自變故季路學於仲尼厲風霜之節楚穆謀於潘崇成殺逆之禍而商臣之惡盛業光於後嗣仲由之善不能息其結纓斯則邪正由於人吉凶在乎命也或以鬼神害盈皇天輔德故宋公一言法星三徙殷帝自翦千里來雲若使善惡無徵未洽斯義且于公高門以待封嚴母埽墓以望喪此君子所以自彊不息也如使仁而無報奚爲修善立名乎斯

徑廷之辭也。夫聖人之言顯而晦，微而婉，幽遠而難聞，河漢而不測，或立教以進庸怠，或言命以窮性靈。積善餘慶，立教也。鳳凰不至，言命也。今以其片言，辨其要趣，何異乎夕死之類，而論春秋之變哉。且荆昭德音，丹雲不卷，周宣祈雨，珪璧斯罄，于叟種德，不逮勳華之高，延年殘穢，未甚東陵之酷，爲善一爲惡均，而禍福異其流，廢興殊其迹，蕩蕩上帝，豈如是乎。詩云：風雨如晦，雞鳴不已。故善人爲善，焉有息哉。夫食稻粱，進芻豢，衣狐貉，襲冰紉，觀窈眇之奇舞，聽雲和之琴瑟，此生人之所急，非有求而爲也。修道德，習仁義，敦孝弟，立忠貞，漸禮樂之餘潤，蹈先王之盛則，此君子之所急，非有求而爲也。然則君子居正體道，樂天知命，明其無可奈何，識其不由智力，逝而不召，來而不拒，生而不喜，死而不感，瑤臺夏屋，不能悅其神，土室編蓬，未足憂其慮，不充詘於富貴，不遑遑於所欲，豈有史公董相不遇之文乎。

劉孝標廣絕交論○尙有韓非呂覽遺意○
辭勝于理文苑之榮榮

以刻酷據其憤懷，真足以狀難狀之情，送窮乞巧，皆其支流也。

客問主人曰：朱公叔絕交論爲是乎？爲非乎？主人曰：客奚此之問？客曰：夫草蟲鳴則阜螽躍，雕虎嘯而清風起，故網緝相感，霧涌雲蒸，嚶鳴相召，星流電激，是以王陽登則貢公喜，罕生逝而國子悲，且心同琴瑟，言鬱郁於蘭茝，道叶膠漆，志婉變於塤箎，聖賢以此鏤金版而鐫盤盂，書玉牒而刻鐘鼎，若乃匠人輟成風之妙巧，伯子息流波之雅引，范張欸欸於下泉，尹班陶陶於永夕，絡繹從橫，烟霏雨散，巧歷所不知，心計莫能測，而朱益州汨彘敝，越謨訓，捶直切，絕交遊，比黔首以應鷓，媿人靈於豺虎，蒙有猜焉，請辨其惑。主人听然而笑曰：客所謂撫絃徽音，未達燥濕變響，張羅沮澤，不覩鴻鴈雲飛，蓋聖人握金鏡，闡風烈，臨

驥螭屈從道汙隆。日月聯璧贊。疊齊之宏致。雲飛電薄顯。隸華之微旨。若五音之變化。濟九成之妙曲。此朱生得元珠於赤水。謨神容而爲言。至夫組織仁義。琢磨道德。驩其愉樂。恤其陵夷。寄通靈臺之下。遺跡江湖之上。風雨急而不輟。其音霜雪零而不渝。其色斯賢遠之素交。歷萬古而一遇。逮叔世民。詛狙詐。颺起谿谷。不能踰其險。鬼神無以究其變。競羽毛之輕。趨錐刀之末。於是素交盡。利交興。天下蚩蚩。鳥驚雷駭。然則利交同源。派流則異。較言其略有五術焉。若其寵均董石。權壓梁寶。雕刻百工。鑿垂萬物。吐漱興雲雨。呼噏下霜露。九域聳其風塵。四海壘其燠灼。靡不望影星奔。藉響川驚。雞人始唱。鶴蓋成陰。高門旦開。流水接軫。皆願摩頂至踵。墮膽抽腸。約同要離。焚妻子。誓殉荆卿。湛七族。是曰勢交。其流一也。富埒陶白。貲巨程羅。山擅銅陵。家藏金穴。出平原而聯騎。居里閭而鳴鐘。則有窮巷之賓。繩樞之士。冀宵燭之末光。邀潤屋之微澤。魚貫鳧躍。颯沓鱗萃。分雁鶩之稻梁。霑玉罍之餘瀝。銜恩遇。進欵誠。援青松以示心。指白水而旌信。是曰賄交。其流二也。陸大夫宴喜西都。郭有道人倫東國。公卿貴其籍甚。縉紳羨其登僊。加以顛頤蹙額。涕唾流沫。騁黃馬之劇談。縱碧雞之雄辨。敍溫郁則寒谷成暄。論嚴苦則春叢零葉。飛沈出其顧指。榮辱定其一言。於是。有弱冠王孫。綺紈公子。道不挂於通人。聲未適於雲閣。攀其鱗翼。丐其餘論。附馭驥之旄端。軼歸鴻於碣石。是曰談交。其流三也。陽舒陰慘。生民大情。憂合驩離。品物恆性。故魚以泉涸而煦沫。鳥因將死而鳴哀。同病相憐。綴河上之悲曲。恐懼寘懷。昭谷風之盛典。斯則斷金由於湫隘。刎頸起於苦蓋。是以伍員濯漑於宰嚭。張王撫翼於陳相。是曰窮交。其流四也。馳騫之俗。澆薄之倫。無不操權衡。秉纖纊。衡所以揣其輕重。纊所以屬其鼻息。若衡不能舉。纊不能飛。雖顏冉龍幹鳳雛。曾史蘭薰雪

白舒向金玉淵海。卿雲黼黻河漢。視若游塵。遇同土梗。莫肯費其半菽。罕有落其一毛。若衡重錙銖。續微影。雖共工之蒐。匿驩兜之掩義。南荆之跋扈。東陵之巨猾。皆爲匍匐。逶迤折枝。舐痔金膏。翠羽將其意。脂韋便辟。導其誠。故輪蓋所游。必非夷惠之室。苞苴所入。實行張霍之家。謀而後動。毫芒寡忒。是曰量交。其流五也。凡此五交。義同賈鬻。故桓譚譬之於園圃。林回喻之於甘醴。夫寒暑遞進。盛衰相襲。或前榮而後悴。或始富而終貧。或初存而後亡。或古約而今泰。循環翻覆。迅若波瀾。此則殉利之情。未嘗異。變化之道。不得一由。是觀之。張陳所以凶終。蕭朱所以隙末。斷焉可知矣。而翟公方規。規然勒門。以箴客。何所見之晚乎。因此五交。是生三釁。敗德殄義。禽獸相若。一釁也。難固易攜。讎訟所聚。二釁也。名陷饕餮。貞介所羞。三釁也。古人知三釁之爲梗。懼五交之速尤。故王丹威子以檣。楚朱穆昌言而示絕。有旨哉。有旨哉。近世有樂安任昉。海內髦傑。早綰銀黃。夙昭民譽。適文麗藻。方駕曹王。英跼俊邁。聯橫許郭。類田文之愛客。同鄭莊之好賢。見一善。則盱衡扼腕。遇一才。則揚眉抵掌。雖黃出其唇吻。朱紫由其月旦。於是冠蓋輻湊。衣裳雲合。輜駟擊鞞。坐客恆滿。蹈其閭闔。若升闕里之堂。入其隩隅。謂登龍門之阪。至於顧盼。增其倍價。翦拂使其長鳴。影組雲臺者。摩肩趨走。丹墀者。疊跡莫不締恩狎。結綢繆。想惠莊之清塵。庶羊左之徵烈。及瞑目東粵。歸骸洛浦。總帳猶懸。門罕漬酒之彥。墳未宿草。野絕動輪之賓。藐爾諸孤。朝不謀夕。流離大海之南。寄命瘴癘之地。自昔把臂之英。金蘭之友。曾無羊舌下泣之仁。寧慕郗成分宅之德。嗚呼。世路險巇。一至於此。大行孟門。豈云嶮絕。是以耿介之士。疾其若斯。裂裳裹足。棄之長驚。獨立高山之頂。歡與麋鹿同羣。傲傲然絕其霧濁。誠恥之也。誠畏之也。

盧子行勞生論引○文有真氣有生氣者可以不朽正不諱

亦絕交之流而氣已涉俗

莊子曰大塊勞我以生誠哉斯言也。余年五十羸老云至。追惟疇昔。勤矣厥生。乃著此論。因言時事云爾。罷郡屏居。有客造余者。少選之頃。盱衡而言曰。生者天地之大德。人者有生之最靈。所以作配兩儀。稱貴羣品。妍蚩愚智之辯。天懸壤隔。行己立身之異。入海登山。今吾子生於右地。九葉卿族。天授俊才。萬夫所仰。學綜流略。慕孔門之游夏。辭窮麗則。擬漢日之卿雲。行藏有節。進退以禮。不諂不驕。無慍無懣。偃仰貴賤之間。從容語默之際。何其裕也。下走所欣羨焉。余莞爾而笑曰。未之思乎。何所言之過也。子其清耳。請爲左右陳之。夫人之生也。皆未若無生在。余之生。勞亦勤止。紈綺之年。伏膺教義。規行矩步。從善而登。中冠之後。濯纓受署。纒纒仁義。籠絆朝市。失翹陸之本性。喪江湖之遠情。淪此風波。溺於倒躓。憂勞總至。事非一緒。何則。地胄高華。旣致嫌於管庫。才識美茂。亦受嫉於愚庸。篤學強記。聾瞽於焉側目。清言河瀉。木訥所以疾心。豈徒蟲惜春漿。鴟恠腐鼠。相江都而永歎。傳長沙而不歸。固亦魯值臧倉。楚逢靳尚。趙壹爲之哀歌。張升於是慟哭。有齊之季。不遇休明。申脰就鞅。屏迹無地。段珪張讓。金貝是視。賈謐郭槐。腥臊可壓。淫刑以逞。禍近池魚。耳聽惡來之讒。足踐龍逢之血。周氏末葉。仍值僻王。斂笏升階。汗流浹背。莒客之踵躋焦原。匹茲非險。齊人之手執馬尾。方此未危。若乃羊腸句注之道。據鞍振策。武落雞田之外。櫛風沐雨。三旬九食。不敢稱憊。此之爲役。蓋其小小者耳。當今泰運肇開。四門以穆。冕旒司契于上。夔龍佐命于下。岐伯善卷。恥徇幽憂。卞隨務光。悔從木石。余年在秋方已。迫知命情。禮宜退。不獲晏安。一葉從風。無損

鄧林之攢植。雙鳧退飛。不虧渤澥之游泳。耕田鑿井。晚息晨興。候南山之朝雲。摩北堂之明月。汜勝九穀之書。觀其節制。崔實四人之令。奉以周旋。晨荷蓑笠。白屋黃冠之伍。夕談穀稼。霑體塗足之倫。濁酒盈罇。高歌滿席。恍兮惚兮。天地一指。此野人之樂也。子或以是羨余乎。客曰。吾子之事。既聞之矣。佗人有心。又請論其梗概。余答曰。雲飛泥沈。卑高異等。圓行方止。動息殊致。是以摩霄運海。輕屣羅于藪澤。五衢四照。忽斤斧于山林。余晚值昌辰。遂其弱尙。觀人事之隕穫。視時路之遭危。元冬修夜。靜言長想。可以累歎。悼心涕流。酸鼻人之百年。脆促已甚。奔騎流電。不可爲辭。顧慕周章。數紀之內。窮通榮辱。事無足道。而有識者鮮。無識者多。褊隘凡近。輕險躁薄。居家則人面獸心。不孝不義。出門則諂諛佞。無愧無恥。退身知足。忘伯陽之炯戒。陳力就列。棄周任之格言。悠悠遠古。斯患已積。迄於近代。此蠹尤深。范卿攜讓之風。摺紳不嗣。夏書昏墊之罪。執政所安。朝露未晞。小車盈董石之巷。夕陽且落。皂蓋填閭竇之里。皆如脂如韋。俯僂匍匐。噉惡求媚。舐痔自親。美言諂笑。助其愉樂。詐泣佞哀。恤其喪紀。近通旨酒。遠貢文蛇。豔姬美女。委如脫屣。金銑玉華。棄同遺跡。及鄧通失路。一簪之賄。無餘。梁冀就誅。五侯之貴。將起。向之求官買職。晚謁晨趨。刺促望塵之舊遊。伊優上堂之夜客。始則亡魂褫魄。若牛兄之遇獸。心戰色沮。似葉公之見龍。俄而抵掌揚眉。高視闊步。結侶棄廉公之第。攜手哭聖卿之門。華轂生塵。來如激矢。雀羅蹙設。去等絕絃。飴蜜非甘。山川未阻。千變萬化。鬼出神入。爲此者。皆衣冠上族。或有藝能不恥不仁。不畏不義。靡媿友朋。莫慙妻子。外呈厚貌。內蘊百心。繇是則紆青佩紫。牧州典郡。冠幘劫人。厚自封殖。妍歌妙舞。列鼎撞鐘。耳倦絲桐。口飫珍旨。雖素論以爲非。而時宰不之責。末俗蚩蚩。如此之敝。余則違時薄宦。屏息窮居。甚恥驅馳。深

畏乾沒心若死灰。不營勢利。家無擔石。不費囊錢。偶影聯官。將數十載。驚拙致笑。輕生所以告勞也。真人御宇。斲雕爲朴。人知榮辱。時反邕熙。風力上宰。內敷文教。方邵重臣。外揚武節。被之大道。洽以淳風。舉必以才。爵無濫授。稟斯首鼠。不預衣簪。阿黨比周。埽地俱盡。輕薄之儔。滅影竄迹。礫石變成瑜瑾。葦莠化爲芝蘭。曩之扇俗攬時。駭耳穢目。今悉不聞不見。莫余敢侮。易曰。聖人作而萬物覩。斯之謂乎。

李公輔天命論

○承華編之末流。稍思反質。所以兆初唐也。○洸洸易盡。

較王命論。便有雅鄭之別。而春容茂美。固足下開燕許。

粵若邃古。元黃肇闢。帝王神器。歷數有歸。生其德者天。應其時者命。確乎不變。非人力所能爲也。龍圖鳥篆。號諡遺跡。疑而難信。缺而未詳者。靡得而明焉。其在典文。煥乎緗素。欽明至德。莫盛於唐虞。貽謀長世。莫過於文武。大隋神功。積於文王。天命顯於唐叔。昔邑姜方娠。夢帝謂己。余命而子曰虞。將與之唐。而蕃育其子孫。及生。有文在其手。曰虞。遂以命之。成王滅唐。而封太叔。又唐叔之封也。箕子曰。其後必大。易曰。崇高富貴。莫大於帝王。老子謂域內四大。王居一焉。此則名虞與唐。美兼二聖。將令其後必大。終致唐虞之美。蕃育子孫。用享無窮之祚。逮皇家建國。初號大興。箕子必大之言。於茲乃驗。天之眷命。懸屬聖朝。重耳區區。豈足云也。有娥元鳥。商以興焉。姜姬巨跡。周以興焉。古今三代。靈命如一。本枝種德。奕葉丕基。佐高帝而滅楚。立宣王以定漢。東京太尉。關西孔子。生感遺鱣之集。沒降巨鳥之奇。累仁積善。大申休命。太祖挺生。庇民匡主。立殊勳於魏室。建盛業於周朝。啓翼軫之國。肇炎精之紀。爰受厥命。陟配彼天。皇帝載誕之初。神光滿室。具興王之表。韞大聖之能。或氣或雲。蔭映於廊廟。如天如日。臨照於軒冕。內明外順。自

險獲安。豈非萬福扶持。百祿攸集。有周之末。朝野騷然。降志執均。鎮衛宗社。明神饗其德。上帝付其民。誅
姦逆於九重。行神化於四海。于斯時也。尉迴據有齊。累世之都。乘新國易亂之俗。驅馳蛇豕。連合縱橫。地
迺九州陷三。民則十分擁六。王謙乘連率之威。憑全蜀之險。興兵舉衆。震蕩江山。鳩毒巴庸。蠶食秦楚。此
二虜也。窮凶極逆。非欲割洪溝之地。閉劍閣之門。皆將長戟強弩。睥睨宸極。從漳河而達負海。連岱岳而
距華陽。迫脅荆蠻。吐納江漢。佐鬪嫁禍。紛若蝟毛。曝骨履腸。間不容礪。爾乃奉殪戎之命。運先天之略。不
出戶庭。推轂分關。一麾以定三方。數旬而清萬國。蕩滌天壤之速。規摹指畫之神。造化以來。弗之聞也。光
熙前緒。罔有不服。烟雲改色。鐘石變音。三靈顧望。萬物影響。木運告盡。裘裳克讓。天歷在躬。推而弗有。百
辟庶尹。四方岳牧。稽圖讖之文。順億兆之請。披肝瀝膽。晝歌夜吟。方屈箕穎之高。式允幽明之願。基命宥
密。如恆如升。推帝居歆。勩業垂統。殊徽號。改服色。建都邑。敍彝倫。薄賦輕徭。慎刑恤獄。除繁苛之政。興清
靜之風。去無用之官。省相監之職。奇才間出。盛德無隱。星精雲氣。共趨走於塔墀。山海靈咸。燮理於臺
閣。東漸日谷。西被月川。教暨北溟之表。聲加南海之外。悠悠沙漠。區域萬里。蠢蠢百蠻。莫之與競。五帝所
不化。三王所未賓。屈膝頓顙。盡爲臣妾。殊方異類。書契不傳。梯山越海。貢琛奉贄。欣欣如也。巢居穴處。化
以宮室。不火不粒。訓以庖廚。禮樂合天地之同。律呂節寒暑之候。制作詳垂衣之後。淳粹得神農之前。遊
遊文雅之場。出入杳冥之極。合神謨鬼通。幽洞微羣。物歲成含生。日用飲和氣。以自得沐元澤。而不知也。
丹雀爲史。元龜載書。甘露自天。醴泉出地。神禽異獸。珍木奇草。望風觀海。應化歸風。備休祥於圖牒。罄幽
遐而戾止。猶且父天子民。兢兢翼翼。至矣大矣。七十四帝。曷可同年而語哉。若夫天下之重。不可妄據。故

唐之許由。夏之伯益。懷道立事。人授而弗可也。軒初四帝。周餘六王。藉世因基。自取而不得也。孟軻稱仲尼之德。過於堯舜。著述成帝者之事。弟子備王佐之才。黑不代蒼。泣麟歎鳳。棲棲汲汲。雖聖達而莫許也。蚩尤則黃帝抗衡。共工則黑帝勅敵。項羽誅秦。摧漢宰割神州。角逐爭驅。盡威力而無就也。其餘剋起妖妄。曾何足數。賊子逆臣。所以爲亂。皆由不識天道。不悟人謀。牽逐鹿之邪說。謂飛鳧而爲鼎。若使四凶爭八元之誠。三監同九臣之志。韓信彭越。深明帝子之符。孫述隗囂。妙識真人之出。尉迴同謳歌之類。王謙比獄訟之民。福祿蟬聯。胡可窮也。而違天逆物。獲罪人神。嗚呼。此前事之大戒矣。誅夷烹醢。歷代共尤。僭逆凶邪。時煩獄吏。其可不戒慎哉。蓋積惡旣成。心自絕於善道。物類相感。理必至於誅戮。天奪其魄。鬼惡其盈。故也。大帝聰明。羣臣正直。耳目監於率土。賞罰參於國朝。輔助一人。覆育兆庶。豈有食人之祿。受人之榮。包藏禍心。而不殲盡者也。必當執法未處其罪。司命已除其籍。自古明哲。慮遠防微。執一心。持一德。立功坐樹。上書削藁。位尊而心逾下。祿厚而志彌約。寵盛思之以懼。道高守之以恭。克念於此。則姦回不至。事乃畏天。豈惟愛禮。謙光滿覆。義在知幾。吉凶由人。妖不自作。衆星拱極。在天成象。夙沙則主。雖愚蔽民。盡知歸有。苗則始爲跋扈。終而大服。漢南諸國。見一面以從。殷河西將軍。率五郡以歸。漢故能招信順之助。保太山之安。彼陳國者。盜竊江外。民少一郡。地減半州。遇受命之主。逢太平之日。自可獻土銜璧。乞同溥天。乃復養喪家之疹。遭顛覆之軌。趨起吳越。仍爲匪民。雖時屬大道。偃兵舞劍。然國家常混一之運。金陵是殄。有命不恆。斷可知矣。防風之戮。元龜匪遙。孫皓之侯。守株難得。迷而未覺。諒可愍焉。斯故未辨昊天之心。不聞君子之論也。

駢體文鈔卷二十一

【序類】

劉子政上戰國策敍○貫以勁氣不徒渾厚

姬傳先生云不及過秦雄駿然冲溶渾厚無意爲文而自能盡意若莊子所謂木雞者此境亦賈生所無兆洛以爲如先生之言則知東漢魏晉之文所自出

護左都水使者光祿大夫臣向言所校中戰國策書中書餘卷錯亂相糅莠又有國別者八篇少不足臣向因國別者略以時次之分別不以序者以相補除復重得三十三篇本字多悞脫爲半字以趙爲肖以齊爲立如此字者多中書本號或曰國策或曰國事或曰短長或曰事語或曰長書或曰修書臣向以爲戰國時游士輔所用之國爲之策謀宜爲戰國策其事繼春秋以後訖楚漢之起二百四十五年間之事皆定以殺青書可繕寫敍曰周室自文武始興崇道德隆禮義設辟雍泮宮庠序之教陳禮樂弦歌移風之化敍人倫正夫婦天下莫不曉然論孝弟之義惇篤之行故仁義之道滿乎天下卒致之刑錯四十餘年遠方慕義莫不賓服雅頌歌詠以思其德下及康昭之後雖有衰德其綱紀尙明及春秋時已四五百載矣然其餘業遺烈流而未滅五霸之起尊事周室五霸之後時君雖無德人臣輔其君者若鄭之子產晉之叔向齊之晏嬰挾君輔政以並立於中國猶以義相支持歌說以相感聘覲以相交期會以相一盟誓以相救天子之命猶有所行會享之國猶有所恥小國得有所依百姓得有所息故孔子曰能以禮讓

爲國乎。何有周之流化。豈不大哉。及春秋之後。衆賢輔國者旣沒。而禮義衰矣。孔子雖論詩書。定禮樂。王道粲然分明。以匹夫無勢化之者。七十二人而已。皆天下之俊也。時君莫尙之。是以王道遂用不興。故曰。非威不立。非勢不行。仲尼旣沒之後。田氏取齊。六卿分晉。道德大廢。上下失序。至秦孝公。捐禮讓而貴爭戰。棄仁義而用詐譎。苟以取強而已矣。夫篡盜之人。列爲侯王。詐譎之國。興立爲強。是以轉相放効。後生師之。遂相吞滅。并大兼小。暴師經歲。流血滿野。父子不相親。兄弟不相安。夫婦離散。莫保其命。潛然道德絕矣。晚世益甚。萬乘之國。七千乘之國。五敵侔爭。權盡爲戰國。貪饕無恥。競進無厭。國異政教。各自制斷。上無天子。下無方伯。力功爭強。勝者爲右。兵革不休。詐僞並起。當此之時。雖有道德。不得施設。有謀之強。負阻而恃固。連與交質。重約結誓。以守其國。故孟子孫卿。儒術之士。棄捐於世。而遊說權謀之徒。見貴於俗。是以蘇秦張儀。公孫衍陳軫。代厲之屬。生從橫短長之說。左右傾側。蘇秦爲從。張儀爲橫。橫則秦帝。從則楚王。所在國重。所去國輕。然當此之時。秦國最雄。諸侯方弱。蘇秦結之時。六國爲一。以儗背秦。秦人恐懼。不敢窺兵於關中。天下不交兵者。二十有九年。然秦國勢便形利。權謀之士。咸先馳之。蘇秦初欲橫。秦弗用。故東合從。及蘇秦死後。張儀連橫。諸侯聽之。西向事秦。是故始皇。因四塞之國。據崤函之阻。跨隴蜀之饒。聽衆人之策。乘六世之烈。以蠶食六國。兼諸侯。并有天下。杖於詐謀之弊。終無信篤之誠。無道德之教。仁義之化。以綴天下之心。任刑罰以爲治。信小術以爲道。遂燔燒詩書。坑殺儒士。上小堯舜。下邈三王。二世愈甚。惠不下施。情不上達。君臣相疑。骨肉相疏。化道淺薄。綱紀敗壞。民不見義。而懸於不寧。撫天下十四歲。天下大潰。詐僞之弊也。其比王德。豈不遠哉。孔子曰。道之以政。齊之以刑。民免而無恥。道之以德。

齊之以禮。有恥且格。夫使天下有所恥。故化可致也。苟以詐僞。偷活取容。自上爲之。何以率下。秦之敗也。不亦宜乎。戰國之時。君德淺薄。爲之謀策者。不得不因勢而爲資。據時而爲畫。故其謀扶急持傾。爲一切之權。雖不可以臨教化。兵革救急之勢也。皆高才秀士。度時君之所能行。出奇策異智。轉危爲安。運亡爲存。亦可喜。皆可觀。護左都水使者。光祿大夫。臣向所校戰國策書錄。

許叔重說文解字序○尙是周秦諸子體勢

敍曰。此十四篇五百四十部。九千三百五十三文。重一千一百六十三解說。凡十三萬三千四百四十一字。其建首也。立一爲端。方以類聚。物以羣分。同牽條屬。共理相貫。雜而不越。據形系聯。引而申之。以究萬原。畢終于亥。知化窮冥。于時大漢聖德熙明。承天稽唐。敷崇殷中。遐邇被澤。渥衍沛滂。廣業甄微。學士知方。探賾索隱。厥誼可傳。粵在永元。困頓之年。孟陬之月。朔日甲申。曾曾小子。祖自炎神。縉雲相黃。共承高辛。太岳佐夏。呂叔作藩。俾侯于許。世祚遺靈。自彼徂召。宅此汝濱。竊印景行。敢涉聖門。其宏如何。節彼南山。欲罷不能。旣竭愚才。惜道之味。聞疑載疑。演贊其志。次列微辭。知此者希。儻昭所尤。庶有達者。理而董之。

王叔師楚辭章句敍○漢世文章無論純駁原本經術其味深長予復堂文錄甲編敍詳之

敍曰。昔者孔子。叡聖明喆。天生不王。俾定經術。乃刪詩書。正禮樂。制作春秋。以爲後王之法。門人三千。罔不昭達。臨終之日。則大義乖而微言絕。其後周室衰微。戰國並爭。道德陵遲。譎詐萌生。於是楊墨鄒孟。孫韓之徒。各以所知。著造傳記。或以述古。或以明世。而屈原履忠被譖。憂悲愁思。獨依詩人之義。而作離騷。

上以諷諫。下以自慰。遭時暗亂。不見省納。不勝憤懣。遂復作九歌以下。凡二十五篇。楚人高其行義。瑋其文采。以相教傳。至孝武帝。恢廓道訓。使淮南王安作離騷經章句。則大義燦然。後世雄俊。莫不瞻仰。據舒妙思。續述其詞。逮至劉向。典校經書。分以爲十六卷。孝章卽位。深宏道藝。而班固賈逵。復以所見。改易前疑。各作離騷經章句。其餘十五卷。闕而不說。又以壯爲狀。義多乖異。事不要撮。今臣復以所識所知。稽之舊章。合之經傳。作十六卷章句。雖未能究其微妙。然大指之趣。略可見矣。且人臣之義。以中正爲高。以仗節爲賢。故有危言以存國。殺身以成仁。是以伍子胥不恨於浮江。比干不悔於剖心。然後德立而行成。榮顯而名稱。若夫懷道以迷國。佯愚而不言。顛則不能扶。危則不能安。婉婉以順上。逡巡以辟患。雖保黃耆。終壽百年。蓋志士之所恥。愚夫之所賤也。今若屈原。膺忠貞之質。體清潔之性。直若砥矢。言若丹青。進不隱其謀。退不顧其命。此誠絕世之行。俊彥之英也。而班固謂之露才揚己。競於羣小之中。怨恨懷王。譏刺椒蘭。苟欲求進。強非其人。不見容納。忿恚自沈。是虧其高明。而捐其清潔者也。昔伯夷叔齊。讓國守志。不食周粟。遂餓而死。豈可復謂有求於世。而恨怨哉。且詩人怨主。刺上曰。嗚呼小子。未知臧否。匪面命之。言提其耳。風諫之語。於斯爲切。然仲尼論之。以爲大雅。引此比彼。屈原之詞。優游婉順。寧以其君不知之故。欲提攜其耳乎。而論者。以爲露才揚己。怨刺其上。強非其人。殆失厥中矣。夫離騷之文。依託五經。以立義焉。帝高陽之苗裔。則詩厥初。生民時惟姜嫄也。紉秋蘭以爲佩。則將翱將翔。佩玉瓊琚也。夕搢洲之宿莽。則易潛龍勿用也。馳玉虬而乘鸞。則易時乘六龍以御天也。就重華而陳詞。則尙書咎繇之謀謨也。登昆崙而涉流沙。則禹貢之敷土也。故智彌盛者。其言博。才益邵者。其識遠。屈原之詞。誠博遠矣。自孔某終後。

以來名儒博達之士。著造詞賦。莫不擬其儀表。祖式其模範。取其要妙。竊其華藻。所謂金相玉質。百歲無匹。名垂罔極。永不刊滅者也。

陸士衡豪士賦序○頓挫回薄。意內言外。不當僅賞其清新。

此士龍所謂清新相接者也。神理亦何減鄒枚。鄒枚隱顯激射處不易至。

夫立德之基有常。而建功之路不一。何則。循心以爲量者存乎我。因物以成務者繫乎彼。存夫我者。隆殺止乎其域。繫乎物者。豐約惟所遭遇。落葉俟微風以隕。而風之力蓋寡。孟嘗遭雍門而泣。而琴之感以末何者。欲隕之葉。無所假烈風。將墜之泣。不足煩哀響也。是故苟時啓於天。理盡於民。庸夫可以濟聖賢之功。斗筲可以定烈士之業。故曰。才不半古。而功已倍之。蓋得之於時勢也。歷觀古今。徼一時之功。而居伊周之位者有矣。夫我之自我。智士猶嬰其累。物之相物。昆蟲皆有此情。夫以自我之量。而挾非常之勳。神器暉其顧盼。萬物隨其俯仰。心玩居常之安。耳飽從諛之說。豈識乎功在身外。任出才表者哉。且好榮惡辱。有生之所大期。忌盈害上。鬼神猶且不免。人主操其常柄。天下服其大節。故曰。天可讎乎。而時有絃服荷戟。立於廟門之下。援旗誓衆。奮於阡陌之上。況乎代主制命。自下裁物者乎。廣樹恩。不足以敵怨。勤興利。不足以補害。故曰。代大匠斲者。必傷其手。且夫政由甯氏。忠臣所爲慷慨。祭則寡人。人主所不久堪。是以君爽快。快不悅。公旦之舉。高平師師。側目博陸之勢。而成王不遣嫌吝於懷。宣帝若負芒刺於背。非其然者。與嗟乎。光于四表。德莫富焉。王曰。叔父親莫暱焉。登帝天位。功莫厚焉。守節沒齒。忠莫至焉。而傾側顛沛。僅而自全。則伊生抱明允以嬰戮。文子懷忠敬而齒劍。固其所也。因斯以言。夫以篤聖穆親。如彼之

懿大德至忠。如此之盛。尙不能取信於人主之懷。止謗於衆多之口。過此以往。惡視其可。安危之理。斷可識矣。又況乎饜大名。以冒道家之忌。運短才。而易聖哲所難者哉。身危由於勢過。而不知去勢以求安。禍積起於寵盛。而不知辭寵以招福。見百姓之謀己。則申宮警守。以崇不畜之威。懼萬民之不服。則嚴刑峻制。以賈傷心之怨。然後威窮乎震主。而怨行乎上下。衆心日墜。危機將發。而方偃仰瞪眊。謂足以夸世笑古人之未工。亡己事之已拙。知曩勳之可矜。暗成敗之有會。是以事窮運盡。必於顛仆。風起塵合。而禍至常酷也。聖人忌功名之過已。惡寵祿之踰量。蓋謂此也。夫惡欲之大端。賢愚所共有。而遊子殉高位於生前。志士思垂名於身後。受生之分。唯此而已。夫蓋世之業。名莫大焉。震主之勢。位莫盛焉。率意無違。欲莫順焉。借使伊人。頗覽天道。知盡不可益。盈難久持。超然自引。高揖而退。則巍巍之盛。仰邈前賢。洋洋之風。俯冠來籍。而大欲不乏於身。至樂無愆乎舊。節彌效而德彌廣。身愈逸而名愈劭。此之不爲。彼之必昧。然後河海之跡。堙爲窮流。一簣之釁。積成山岳。名編凶頑之條。身厭荼毒之痛。豈不謬哉。故聊賦焉。庶使百世少有寤云。

石季倫思歸引序 ○氣體不俗

余少有大志。夸邁流俗。弱冠登朝。歷位二十五年。五十以事去官。晚節更樂放逸。篤好林藪。遂肥遯于河陽別業。其制宅也。却阻長堤。前臨清渠。柏木幾于萬株。流水周于舍下。有觀閣池沼。多養魚鳥。家素習技。頗有秦趙之聲。出則以遊目弋釣爲事。入則有琴書之娛。又好服食咽氣。志在不朽。慨然有凌雲之操。歛復見牽羈。婆娑于九列。困于人間。煩黷常思歸。而永歎尋覽遺篇。有思歸引。儻古人之情。有同于今。故制

此曲此曲有絃無歌。今爲作歌。以述余懷。恨時無知音者。令造新聲。而播于絲竹也。

郭景純山海經序○○糸旨魂文。郭生獨絕。

世之覽山海經者。皆以其闕誕迂誇。多奇怪俶儻之言。莫不疑焉。嘗試論之曰。莊生有云。人之所知。莫若其所不知。吾於山海經見之矣。夫以宇宙之寥廓。羣生之紛紜。陰陽之煦蒸。萬殊之區分。精氣渾淆。自相潰薄。遊魂靈怪。觸象而構。流形於山川。麗狀於木石者。惡可勝言乎。然則總其所以乖鼓之於一響。成其所以變混之於一象。世之所謂異。未知其所以異。世之所謂不異。未知其所以不異。何者。物不自異。待我而後異。異果在我。非物異也。故胡人見布而疑麇。越人見鬪而駭毳。夫翫所習見。而奇所希聞。此人情之常蔽也。今略舉可以明之者。陽火出於冰水。陰鼠生於炎山。而俗之論者。莫之或怪。及談山海經所載。而咸怪之。是不怪所可怪。而怪所不可怪也。不怪所可怪。則幾於無怪矣。怪所不可怪。則未始有可怪也。夫能然所不可。不可所不可。然則理無不然矣。案汲郡竹書。及穆天子傳。穆王西征。見西王母。執璧帛之好。獻錦組之屬。穆王享王母於瑤池之上。賦詩往來。辭義可觀。遂襲崑崙之邱。遊軒轅之宮。眺鍾山之嶺。玩帝者之寶。勒石王母之山。紀迹元圃之上。乃取其嘉木豔草。奇鳥怪獸。玉石珍珠之器。金膏燭銀之寶。歸而殖養之於中國。穆王駕八駿之乘。右服盜驪。左驂騶耳。造父爲御。犇戎爲右。萬里長騫。以周歷四荒。名山大川。靡不登濟。東升大人之堂。西燕王母之廬。南轢鼇鼉之梁。北躡積羽之衢。窮歡極娛。然後旋歸。案史記說。穆王得盜驪騶耳驂騶之驥。使造父御之。以西巡守。見西王母。樂而忘返。亦與竹書同。左傳曰。穆王欲肆其心。使天下皆有車轍馬跡焉。竹書所載。則是其事也。而譙周之徒。足爲通識。瑰儒而雅不平。此

驗之史考。以著其妄。司馬遷敍大宛傳。亦云。自張騫使大夏之後。窮河源。惡覩所謂崑崙者乎。至禹本紀。山海經。所有怪物。余不敢言也。不亦悲乎。若竹書不潛出於千載。以作徵於今日者。則山海之言。其幾乎廢矣。若乃東方生曉畢方之名。劉子政辨盜械之尸。王順訪兩面之客。海民獲長臂之衣。精驗潛効。絕代懸符。於戲。羣惑者。亦可以少寤乎。是故聖王。原化以極變。象物以應怪。鑒無滯蹟。曲盡幽情。神焉瘦哉。神焉瘦哉。蓋此書跨世七代。歷載三千。雖暫顯於漢。而尋亦寢廢。其山川名號。所在多有。舛謬與今不同。師訓莫傳。遂將湮滅。道之所存。俗之所喪。悲夫。余有懼焉。故爲之創傳。疏其壅闕。闢其蕪蕪。領其元致。標其洞涉。庶幾令逸文不墜於世。奇言不絕於今。夏后之迹。靡刊於將來。八荒之事。有聞於後裔。不亦可乎。夫翳蒼之翔。回以論垂天之陵。蹄涔之遊。無以知絳虬之騰。鈞天之庭。豈伶人之所躡。無航之津。豈蒼兕之所涉。非天下之至通。難與言山海之義矣。嗚呼。達觀博物之客。其鑒之哉。

王逸少蘭亭集序

○雅人深致。玩其抑揚之趣。

永和九年。歲在癸丑。暮春之初。會于會稽山陰之蘭亭。脩禊事也。羣賢畢至。少長咸集。此地有崇山峻嶺。茂林脩竹。又有清流激湍。映帶左右。引以爲流觴曲水。列坐其次。雖無絲竹管絃之盛。一觴一詠。亦足以暢敘幽情。是日也。天朗氣清。惠風和暢。仰觀宇宙之大。俯察品類之盛。所以遊目騁懷。足以極視聽之娛。信可樂也。夫人之相與。俯仰一世。或取諸懷抱。悟言一室之內。或因寄所託。放浪形骸之外。雖趣舍萬殊。靜躁不同。當其欣于所遇。暫得于己。快然自足。曾不知老之將至。及其所之既倦。情隨事遷。感慨係之矣。向之所欣。俛仰之間。以爲陳迹。猶不能不以之興懷。況修短隨化。終期于盡。古人云。死生亦大矣。豈不痛

哉。每覽昔人興感之由。若合一契。未嘗不臨文嗟悼。不能喻之于懷。固知一死生爲虛誕。齊彭殤爲妄作。後之視今。亦猶今之視昔。悲夫。故列敘時人。錄其所述。雖世殊事異。所以興懷。其致一也。後之覽者。亦將有感于斯文。

葛稚川抱朴子序

○散朗
修飾

洪體乏進趣之才。偶好無爲之業。假令奮翅。則能陵厲元霄。騁足。則能追風躡景。猶欲戢勁。翻於鷦鷯之羣。藏逸迹于跛驢之伍。豈況大塊稟我以尋常之短羽。造化假我以至鶩之鶩足。自卜者審不能者止。又豈敢力蒼蠅而慕沖天之舉。策跛鼈而追飛兔之軌。飾嫫母之篤陋。求媒陽之美談。推沙礫之賤質。索千金於和肆哉。夫僬僥之步。而企及夸父之蹤。近才所以躓礙也。要離之羸。而強赴扛鼎之勢。秦人所以斷筋也。是以望絕於榮華之途。而志安乎窮圯之域。藜藿有八珍之甘。蓬華有藻梲之樂也。故權貴之家。雖咫尺弗從也。知道之士。雖艱遠必造也。考覽奇書。旣不少矣。率多隱語。難可卒解。自非至精。不能悉究。自非篤勤。不能悉見也。道士宏博洽聞者寡。而意斷妄說者衆。至於時有好事者。欲有所修爲。倉卒不知所從。而意之所疑。又無足諮。今爲此書。粗舉長年之理。其至妙者。不得宣之於翰墨。蓋粗言較略。以示一隅。冀悻憤之徒省之。可以思過半矣。豈謂闇塞。必能窮微暢遠乎。聊論其所先覺者耳。世儒徒知服膺周孔。莫言神仙之書。不但大而笑之。又將謗毀眞正。故予所著子言黃白之事。名曰內篇。其餘駁難通釋。名曰外篇。大凡內外一百一十六篇。雖不足藏諸名山。且欲緘之金匱。以示識者。自號抱朴子。因以名書。廬山道人遊石門詩序

○○○其爲神趣。豈山水而已哉。少喜此。文。嗟爲幽異。系勝。妙在簡墨之外。

石門在精舍南十餘里。一名障山。基連大嶺。體絕衆阜。闢三泉之會。並立而開流。傾岩元映其上。蒙形表于自然。故因以爲名。此雖廬山之一隅。實斯地之奇觀。皆傳之于舊俗。而未睹者衆。將由縣瀨險峻。人獸迹絕。徑迴曲阜。路阻行難。故罕經焉。釋法師以隆安四年仲春之月。因詠山水。遂杖錫而遊。于時友徒同趣三十餘人。咸拂衣晨征。悵然增興。雖林壑幽邃。而開途競進。雖乘危履石。並以所悅爲安。既至。則援木尋葛。歷險窮崖。猿臂相引。塵乃造極。于是擁勝倚巖。詳觀其下。始知七嶺之美。蘊奇于此。雙闕對峙。其前重巖映帶。其後巒阜周迴。以爲障。崇巖四營。而開宇。其中則有石臺石池。宮觀之象。觸類之形。致可樂也。清泉分流。而合注。淥澗鏡靜于天池。文石發彩。煥若披而。檉松芳草。蔚然光目。其爲神麗。亦已脩矣。斯日也。衆情奔說。矚覽無厭。遊觀未久而。天氣屢變。霄霧塵集。則萬象隱形。流光迴照。則衆山倒影。開闔之際。狀有靈焉。而不可測也。乃其將登。則翔禽拂翮。鳴猿厲響。歸雲迴駕。想羽人之來儀。哀聲相和。若元音之有寄。雖仿佛猶聞。而神以之暢。雖樂不期。懽而欣。以永日。當其冲豫自得。信有味焉。而未易言也。退而尋之。夫厓谷之閒。會物無主。應不以情。而開興引人。致深若此。豈不以虛明。展其照。閒邃篤其情邪。並三復斯談。猶昧然未盡。俄而太陽告夕。所存已往。乃悟幽人之元覽。達恆物之大情。其爲神趣。豈山水而已哉。于是徘徊崇嶺。流目四矚。九江如帶。邱阜成垤。因此而推。形有巨細。智亦宜然。迺喟然歎。宇宙雖遐。古今一契。靈鷲邈矣。荒途日隔。不有哲人。風迹誰存。應深悟遠。慨焉長懷。各欣一遇之同歡。感良辰之難再。情發于中。遂共詠之云爾。

張思光門律自序○極矜慎。狂狷之言。傲然不屑。山肴野蔌。一洗肥甘。

吾文章之體多爲世人所驚。汝可師耳以心。不可使耳爲心師也。夫文豈有常體。但以有體爲常。當使常有其體。丈夫常刪詩書制禮樂。何至因循。寄人籬下。且中代之文。道體缺變。尺寸相資。彌縫舊物。吾之文章體亦何異。何嘗顛溫涼而錯寒暑。綜哀樂而橫歌哭哉。正以屬詞多出。比事不羈。不阡不陌。非途非路。耳然其傳音振逸。鳴節竦韻。或當未極。亦已極其所矣。汝若復別得體者。吾不拘也。吾義亦如文造次。乘我顛沛非物。吾無師無友。不文不句。頗有孤神獨逸耳。義之爲用。將使性入清波。塵洗猶沐。無得釣聲同利。舉價如高。俾是道場。險成軍路。吾昔嗜僧言多肆法辨。此盡遊乎言笑。而汝等無幸。又云人生之日。正可論道說義。惟飲與食。此外如樹綱焉。吾每以不爾爲恨。爾曹宜振綱也。

任彥升王文憲集序

○雖甚數腴語必傳質行以傳狀之體。名言輻輳清英品目固當美于休文。

公諱儉。字仲寶。琅邪臨沂人也。其先自秦至宋。國史家諫詳焉。晉中興以來。六世名德。海內冠冕。古語云。仁人之利。天道運行。故呂虔歸其佩刀。郭璞策以淮水若離。翦之止殺。吉駿之誠感。蓋有助焉。公之生也。誕授命世。體三才之茂。踐得二之幾。信乃昴宿垂芒。德精降祉。有一於此。蔚爲帝師。況乃淵角殊祥。山庭異表。望衢罕窺其術。觀海莫際其瀾。宏覽載籍。博游才藝。若乃金版玉匱之書。海上名山之旨。沈鬱澹雅之思。離堅合異之談。莫不總制清衷。遞爲心極。斯固通人之所包。非虛明之絕境。不可窮者。其唯神用者乎。然檢鏡所歸。人倫以表。雲屋天構。匠者何工。自函洛不守。憲章中輟。賀生達禮之宗。蔡公儒林之亞。闕典未補。大備茲日。至若齒危髮秀之老。含經味道之生。莫不北面人宗。自同資敬。性託夷遠。少屏塵雜。自非可以宏獎風流。增益標勝。未嘗留心。期歲而孤。叔父司空簡穆公。早所器異。年始志學。家門禮訓。皆折

衷於公。孝友之性。豈伊橋梓。夷雅之體。無待韋弦。汝郁之幼。挺淳至。黃琬之早。標聰察。曾何足尚。年六歲。襲封豫寧侯。拜日。家人以公尚幼。弗之先告。既襲珪組。對揚王命。因便感咽。若不自勝。初宋明帝居蕃。與公母武康公主素不協。及卽位。有詔毀廢舊塋。投棄棺柩。公以死固請。誓不遵奉。表啓酸切。義感人神。太宗聞而悲之。遂無以奪也。初拜祕書郎。遷太子舍人。以選尚公主。拜駙馬都尉。元徽初。遷祕書丞。於是采公會之中經。刊宏度之四部。依劉歆七略。更撰七志。蓋嘗賦詩云。稷契匡虞夏。伊呂翼商周。自是始有應務之跡。生民屬心矣。時司徒袁粲有高世之度。脫落塵俗。見公弱齡。便望風推服。歎曰。衣冠禮樂在是矣。時粲位亞台司。公年始弱冠。年勢不侔。公與之抗禮。因贈粲詩。要以歲暮之期。申以止足之戒。粲答詩曰。老夫亦何寄。之子照清襟。服闋拜右長史。出爲義興太守。風化之美。奏課爲最。還除給事黃門侍郎。旬日遷尚書吏部郎。參選昔毛玠之公清。李重之識會。兼之者公也。俄遷侍中。以愍侯始終之職。固辭不拜。補太尉右長史。時聖武定業。肇基王命。寤寐風雲。實資人傑。是以宸居膺列宿之表。圖緯著王佐之符。俄遷左長史。齊臺初建。以公爲尚書右僕射。領吏部。時年二十八。宋末艱虞。百王澆季。禮紊舊宗。樂傾恆軌。自朝章國紀。典彝備物。奏議符策。文辭表記。素意所不蓄。前古所未行。皆取定俄頃。神無滯用。太祖受命。以佐命之功。封南昌縣開國公。食邑二千戶。建元二年。遷尚書左僕射。領遷如故。自營郃分司。盧欽兼長。譽望所歸。允集茲日。尋表解選。詔加侍中。又授太子詹事侍中。僕射如故。固辭侍中。改授散騎常侍。餘如故。太祖崩。遣詔以公爲侍中。尚書鎮國將軍。永明元年。進號衛將軍。二年。以本官領丹陽尹。六輔殊風。五方異俗。公不謀聲訓。而楚夏移情。故能使解劍拜仇。歸田息訟。前郡尹溫太真。劉真長。或功銘鼎彝。或德標

素尚臭味風雲千載無爽親加弔祭表薦孤遺遠協神期用彰世祀時簡穆公薨以撫養之恩特深恆慕表求解職有詔不許國學初興華夷慕義經師人表允資望實復以本官領國子祭酒三年解丹陽尹領太子少傅餘悉如故挂服捐駒前良取則臥轍棄子後子胥怨皇太子不矜天姿俯同人範師友之義穆若金蘭又領本州大中頃之解職四年以本號開府儀同三司餘悉如故謙光愈遠大典未申六年又申前命七年固辭選任帝所重違詔加中書監猶參掌選事長輿追專車之恨公會甘鳳池之失夫奔競之塗有自來矣以難知之性協易失之情必使無訟事深宏誘公提衡惟允一紀于茲拔奇取異興微繼絕望側階而容賢候景風而式典春秋三十有八七年五月三日薨於建康官舍皇朝軫慟儲鉉傷情有識銜悲行路掩泣豈直舂者不相工女寢機而已哉故以痛深衣冠悲纏教義豈非功深砥礪道邁舟航沒世遺愛古之益友追贈太尉侍中中書監如故給節加羽葆鼓吹增班劍六十人諡曰文憲禮也公在物斯厚居身以約玩好絕於耳目布素表於造次室無姬妾門多長者立言必雅未嘗顯其所長持論從容未嘗言人所短宏長風流許與氣類雖單門後進必加善誘勗以丹霄之價宏以青冥之期公詮品人倫各盡其用居厚者不矜其多處薄者不怨其少窮涯而反盈量知歸皇朝以治定制禮功成作樂思我民譽緝熙帝圖雖張曹爭論於漢朝苟摯競爽於晉世無以仰模淵旨取則後昆每荒服請罪遠夷慕義宣威授旨實寄宏略理積則神無忤往事感則悅情斯來無是己之心事隔於容諂罕愛憎之情理絕於毀譽造理常若可干臨事每不可奪約己不以廉物宏量不以容非攻乎異端歸之正義公生自華宗世務簡隔至於軍國遠圖刑政大典既道在廊廟則理擅民宗若乃明練庶務鑒達治體懸然天得不謀成

心求之載籍翰牘所未紀。訊之遺老耳目所不接。至若文案自環。主者百數。皆深文爲吏。積習成姦。畜筆削之刑。懷輕重之意。公乘理照物。動必研幾。當時嗟服。若有神道。豈非希世之儁民。瑚璉之宏器。防行無異操。才無異能。得奉名節。迄將一紀。一言之譽。東陵倅於西山。一盼之榮。鄭璞踰於周寶。士感知己。懷此何極。出入禮闈。朝夕舊館。瞻棟宇而興慕。撫聲名而悼恩。公自幼及長。述作不倦。固以理窮言行。事該軍國。豈直彫章。縛采而已哉。若乃統禮必善。綴賞無地。雖楚趙羣才。漢魏衆作。曾何足云。曾何足云。防嘗以筆札見知。思以薄技效德。是用綴緝遺文。永貽世範。爲如千帙。如千卷。所撰古今集記。今書七志。爲一家言。不列于集。集錄如左。

梁昭明太子文選序○

六藝附庸。蔚爲大國。江河萬古。精爽宏多矣。精神足以不朽。三十卷之書。遂與六經並壽。吾師吳和甫少宰。嘗深論之。比之菽粟之于珠玉云。

式觀元始。眇觀元風。冬穴夏巢之時。茹毛飲血之世。世質民淳。斯文未作。逮乎伏羲氏之王天下也。始畫八卦。造書契。以代結繩之政。由是文籍生焉。易曰。觀乎天文。以察時變。觀乎人文。以化成天下。文之時義遠矣哉。若夫椎輪爲大輅之始。大輅寧有椎輪之質。增冰爲積水所成。積水曾微增冰之凜。何哉。蓋踵其事而增華。變其本而加厲。物既有之。文亦宜然。隨時變改。難可詳悉。嘗試論之。曰。詩序云。詩有六義焉。一曰風。二曰賦。三曰比。四曰興。五曰雅。六曰頌。至於今之作者。異乎古昔。古詩之體。今則全取賦名。苟宋表之於前。賈馬繼之於末。自茲以降。源流實繁。述邑居。則有憑虛亡是之作。戒畋遊。則有長楊羽獵之制。若其紀一事。詠一物。風雲草木之興。魚蟲禽獸之流。推而廣之。不可勝載矣。又楚人屈原。含忠履潔。君匪從流。臣進逆耳。深思遠慮。遂放湘南。耿介之意。旣傷壹鬱之懷。靡愬臨淵。有懷沙之志。吟澤有憔悴之容。騷

人之文自茲而作。詩者蓋志之所之也。情動於中而形於言。關雎麟趾正始之道著。桑間濮上亡國之音表。故風雅之道粲然可觀。自炎漢中葉。厥塗漸異。退傅有在鄒之作。降將著河梁之篇。四言五言區以別矣。又少則三字多則九言。各體互興。分鑣並驅。頌者所以游揚德業。褒讚成功。吉甫有穆若之談。季子有至矣之歎。舒布爲詩。旣言如彼。總成爲頌。又亦如此。次則箴興于補闕。戒出於弼匡。論則析理精微。銘則序事清潤。美終則誄發。圖像則讚興。又詔誥教令之流。表奏牋記之列。書誓符檄之品。弔祭悲哀之作。答客指事之制。三言八字之文。篇詞引序。碑碣誌狀。衆制鋒起。源流間出。譬陶匏異器。並爲入耳之娛。黼黻不同。俱爲悅目之翫。作者之致。蓋云備矣。余監撫餘閑。居多暇日。歷觀文囿。泛覽辭林。未嘗不心遊目想。移晷忘倦。自姬漢以來。眇焉悠邈。時更七代。數逾千祀。詞人才子。則名溢於縹囊。飛文染翰。則卷盈乎緗帙。自非略其蕪穢。集其清英。蓋欲兼功大半。難矣。若夫姬公之籍。孔父之書。與日月俱懸。鬼神爭奧。孝敬之準式。人倫之師友。豈可重以芟夷。加之翦截。老莊之作。管孟之流。蓋以立意爲宗。不以能文爲本。今之所選。又亦略諸。若賢人之美詞。忠臣之抗直。謀夫之話辨。士之端冰。釋泉湧。金相玉振。所謂坐狙邱。議稷下。仲連之却秦軍。食其之下齊國。留侯之發八難。曲逆之吐六奇。蓋乃事美一時。語流千載。概見墳籍。旁出子史。若斯之流。又亦繁博。雖傳之簡牘。而事異篇章。今之所集。亦所不取。至於紀事之史。繫年之書。所以褒貶是非。紀別異同。方之篇翰。亦已不同。若其讚論之綜緝。辭采序述之錯比。文華事出於沈思。義歸乎翰藻。故與夫篇釋雜而集之。遠自周室。迄於聖代。都爲三十卷。名曰文選云爾。凡次文之體。各以彙聚。詩賦體旣不一。又以類分。類分之中。各以時代相次。

梁昭明太子陶淵明集序○識度非常。似勝文選序。深至。

夫自衒自媒者。士女之醜行。不伎不求者。明達之用心。是以聖人韜光。賢人遁世。其故何也。含德之至。莫踰於道。親己之切。莫重於身。故道存而身安。道亡而身害。處百齡之內。居一世之中。倏忽比之白駒。寄寓謂之逆旅。宜乎與大塊而盈虛。隨中和而任放。豈能戚戚勞於憂畏。汲汲役於人間。齊謳趙女之娛。八珍九鼎之食。結駟連騎之榮。侈袂執圭之貴。樂既樂矣。憂亦隨之。何倚伏之難量。亦慶弔之相及。智者賢人居之甚履。薄冰。愚夫貪士。競之若洩尾閭。玉之在山。以見珍而終破。蘭之生谷。雖無人而自芳。故莊周垂釣於濠。伯成躬耕於野。或貨海東之藥草。或紡江南之落毛。譬彼鷓鴣。豈競鳶鷂之肉。猶斯雞縣。寧勞文仲之性。至於子常。寧喜之倫。蘇秦。衛鞅之匹。死之而不疑。甘之而不悔。主父。偃言之徒。其流甚象。唐堯。四海烹卒如其言。豈不痛哉。又楚子。觀周受折於孫滿。霍侯。驂乘禍起於負芒。饕餮之徒。其流甚象。唐堯。四海之主。而有汾陽之心。子晉。天下之儲。而有洛濱之志。輕之若脫屣。視之若鴻毛。而況於他人乎。是以至人達士。因以晦迹。或懷釐而謁帝。或被褐而負薪。鼓枻清潭。棄機漢曲。情不在於衆事。寄衆事以忘情者也。有疑陶淵明詩。篇篇有酒。吾觀其意。不在酒。亦寄酒爲迹者也。其文章不羣。辭彩精拔。跌宕昭彰。獨超衆類。抑揚爽朗。莫之與京。橫素波而傍流。干青雲而直上。語時事則指而可想。論懷抱則曠而且真。加以貞志不休。安道苦節。不以躬耕爲恥。不以無財爲病。自非大賢。篤志與道。汗隆孰能如此乎。余素愛其文。不能釋手。尙想其德。恨不同時。故加搜校。粗爲區目。白璧微瑕。惟在間情一賦。楊雄所謂勸百而諷一者。卒無諷諫。何足搖其筆端。惜哉。亡是可也。并粗點定其傳。編之於錄。嘗謂有能觀淵明之文者。馳競之情遺。

鄙吝之意祛。貪夫可以廉。懦夫可以立。豈止仁義可蹈。抑又爵祿可辭。不必傍求泰華。遠求柱史。此亦有
助於風教也。

梁元帝內典碑銘集林序

作文與選集之理
俱備音節可誦

夫法性空寂。心行處斷。感而遂通。隨方引接。故鵲園善誘。馬苑宏宣。白林將謝。青樹已列。是宣金牒。方寄
銀身。自象教東流。化行南國。吳主至誠。歷七霄而光曜。晉王畫像。經五帝而彌新。次道孝伯。嘉賓元度。斯
數子者。亦一代名人。或脩理止於伽藍。或歸心盡於談論。銘頌所稱。興公而已。夫披文相質。博約溫潤。吾
聞斯語。未見其人。班固碩學。尚云讚頌相似。陸機鉤深。猶聞碑賦如一。唯伯喈作銘。林宗無媿。德祖能誦。
元常善書。一時之盛。莫得係踵。況般若元淵。真如妙密。觸言成累。係境非真。金石何書。銘頌誰闡。然建塔
紀功。招提立寺。或興造有由。或誓願所記。故鑄之立石。傳諸不朽。亦有息心應供。是曰桑門。或謂智囊。或
稱印手。高座擅名。預伊師之席。道林見重。陪飛龍之座。峩眉廬阜之賢。鄴中宛鄧之哲。昭哉史冊。可得而
詳。故碑文之興。斯焉尚矣。夫世代亟改。論文之理。非一時事推移。屬詞之體。或異。但繁則傷弱。率則恨省。
存華則失體。從實則無味。或引事雖博。其意猶同。或新意雖奇。無所倚約。或首尾倫帖。事似牽課。或鮮復
博涉。體製不工。能使豔而不華。質而不野。博而不繁。省而不率。文而有質。約而能潤。事隨意轉。理逐言深。
所謂菁華無以間也。予幼好雕蟲。長而彌篤。遊心釋典。寓目詞林。頃常搜聚。有懷著述。譬諸法海。無讓波
瀾。亦等須彌。同歸一色。故不擇高卑。唯能是與。倘未詳悉。隨而足之。名爲內典碑銘集林。合三十卷。庶將
來君子。或裨觀見焉。

梁元帝全德志序

爽氣

老子言全德歸厚。莊周云全德不刑。呂覽稱全德之人。故以全德創其名也。此志陸大夫爲首。伊人有學。有辨。不夭。不貧。寶劍在前。鼓瑟從後。連環炙輶。雍容卒歲。駟馬高車。優游宴喜。旣令公侯踞掌。復使要荒。蹶角入室。生光豈非盛矣。若乃河宗九策。事等神鉤。陽雍雙壁。理歸元感。南陽樊重。高閣連雲。北海公沙。門人成市。咨此八龍。各傳一藝。夾河兩郡。家有萬石。人生行樂。止足爲先。但使樽酒不空。坐客恆滿。寧與孟嘗聞琴。承睫淚下。中山聽樂。悲不自禁。同年而語也。

梁元帝丹陽尹傳序

雅令

傳曰大夫受郡。漢書曰尹者正也。及其用人。實難授受。廣漢和顏接下。子高自輔經術。孫寶行嚴霜之誅。袁安留冬日之愛。自二京板蕩。五馬南渡。固乃上燭天文。下應地理。爾其地勢可得而言。東以赤山爲成。皋南以長淮爲伊洛。北以鍾山爲華阜。西以大江爲黃河。旣變淮海爲神州。亦卽丹陽爲京尹。雖得人之盛。頗愧前賢。而眇遇之深。多用宰輔。皇土受圖。負辰寶歷。惟新制禮。以告成功。作樂以彰治定。豈直四三皇六五帝。孕夏陶周而已哉。若夫位以德敍。德以位成。每念忝莅京河。茲焉四載。以入安石之門。思勤王之政。坐眞長之室。想清談之風。求瘼餘晨。頗多暇景。今綴采英賢。爲丹陽尹傳。

梁元帝忠臣傳諍諍篇序

○當守有此沈痛之篇。而覆亡不眇。知六朝有無本之文。悲悼感憤。寄慨在耳目之前。

富貴寵榮。人所不能忘也。刑戮流放。人所不能甘也。而士有冒雷霆。犯顏色。吐一言終。知自投鼎鑊。取離刀鋸。而曾不避者。其故何也。蓋傷茫茫禹跡。毀于一朝。赫赫宗周。滅成禾黍。何者。百世之後。王化漸頽。欽

若之信既盡解網之仁已泯徒以繼體所及守器攸歸出則清警傳路處則憑玉負屐事無暫舛意有必從所謂生于深宮之中長于婦人之手未嘗知憂未嘗知懼況惑褒人之巧笑迷陽阿之妙舞重之以斷劓用之以逋逃亦有傾天滅地汗宮瀦社之罪拔本塞源裂冠毀冕之釁于是策名委質守死不二之臣以剛腸疾惡之心確乎貞一之性不忍見霜露麋鹿棲于宮寢麥穗黍離被于宗廟故瀝血抽誠披胸見款赴焦爛于危年甘滅亡于昔日冀桐宮有返道之明望夷無不言之恨而九重懸望百雉嚴絕丹心莫亮白刃先指見之者掩目聞之者傷心然後鳴條有不收之魂商郊致白旗之戮似未完

劉孝綽昭明太子集序

平覽之篇可留可去

臣竊觀大易重明之象著焉抑又聞之七鬯之義存焉故書有孟侯之名記表元良之德歷選前古以洎夏周可得而稱啓誦而已雖徹聖挺賢光乎二代高文精義閭爾無聞漢之顯宗晉之肅祖昔自春宮蓋好儒術或專經止於區易或持論窮於貞假子桓雖擿藻銅省集講肅成事在藩儲理非皇貳未有正位少陽多才多藝者也粵我大梁之二十一載盛德備乎東朝若乃有縱自天惟睿作聖顯仁立孝行於四海如圭如璋不因琢磨之義爲臣爲子寧待觀喻之言惟性道難聞而文章可見故俯同志學用晦生知以絃誦之餘辰總鄒魯之儒墨徧緜緜於七閣彈竹素於九流地居上嗣實副元首皇帝垂拱巖廊委咸庶績時非從守事或監撫雖一日二日攝覽萬幾猶臨書幌而不休對欵案而忘怠況復迄納侍講討論經紀去聖滋遠愈生穿鑿枝分葉散殊路僭馳靈臺辟雍之疑禋宗祭社之繆明章申老之議通顏理王之說量覈然否剖析同異察言抗論窮理盡微於時淹中稷下之生金華石渠之士莫不過衢樽而挹多

少見斗極而曉西東。與夫盡春卿之道。贊仲尼之宅。非賈誼於蘇林。問蕭何於棗據。區區前史。不亦慙歟。加以學貫總持。辨同無礙。五時密教。月猶鏡象。一乘妙旨。觀若掌珠。及在布金之園。處如龍之衆。開示有空。顯揚權實。是以徧動六地。普雨四華。豈直得解纓。須提舍鉢。瓶沙騰曇。言德梵志。依風而已哉。若夫天文以爛然爲美。人文以煥乎爲貴。是以降儒雅之大成。游雕蟲之小道。握牘持筆。思若有神。曾不斯須。風飛電起。至於宴游西園。祖道清洛。三百載賦。該極連篇。七言致擬。見諸文學。博奔興詠。並命從游。書令視草。銘非潤色。七窮煒燁之說。表極遠大之才。皆喻不備體。詞不掩義。因宜適變。曲盡文情。竊以屬文之體。鮮能周備。長卿徒善。旣累爲遲。少儒雖疾。俳優而已。子淵淫靡。若女工之蠹。子雲侈靡。異詩人之則。孔璋詞賦。曹祖勸其修今。伯喈答贈。摯虞知其頗古。孟堅之頌。尙有似贊之譏。士衡之碑。猶聞類賦之貶。深乎文者。兼而善之。能使典而不野。遠而不放。麗而不淫。約而不儉。獨擅衆美。斯文在斯。假使王朗報箋。卞蘭獻頌。猶不足以揄揚著述。稱贊才章。況在庸才。曾何彷彿。然承華肇建。濫齒時髦。居陪出從。逝將一紀。譬彼登山。徒仰峻極。同夫觀海。莫際波瀾。但職官書記。預聞盛藻。歌詠不足。敢忘編次。謹爲一帙十卷。第目如左。日升松茂。與天地而偕長。壯思英詞。隨歲月而增廣。如其後錄。以俟賢臣。

劉孝標金華山栖志序

○絕似賦體

夫鳥居山上。層巢木末。魚潛淵下。窟穴泥沙。豈好異哉。蓋性自然也。故有忽白壁而樂垂綸。負玉鼎而要卿相。行藏紛糾。顯晦躡駁。無異火炎水流。圓動方息。斯則廟堂之與江海。蓬戶之與金閨。並然其所然。悅其所悅。鳥足毛羽。瘡痂於其間哉。予生自原野。善畏難狎。心駭雲臺。朱屋望絕高蓋。青組且霑濡霧露。彌

願閒逸。每思濯青瀨。息椒邱。寤寐永懷。其來尚矣。蚓專噬壤。民欲天從。爰泊二毛。得居巖穴。所居東陽郡。金華山。東陽實會稽西部。是生竹箭。山川秀麗。膏澤塊鬱。若其羣峯疊起。則接漢連霞。喬木布護。則春青冬綠。迴溪映流。則十仞洞底。膚寸雲合。必千里雨散。信卓犖爽塏。神居奧宅。是以帝鴻遊斯鑄鼎。雨師寄此乘烟。故澗勒赤松之名。山貽縉雲之號。近代江治中奮迅泥滓。王徵士高拔風塵。龍盤鳳栖。咸萃茲地。良由碧湍素石。可致幽人者哉。金華山古馬鞍山也。蘊靈藏聖。列名仙謀。左元放稱此山云。可免洪水五兵。可合神丹九轉。金華之首有紫巖山。山色紅紫。因此爲稱。靡迤陂陀。下屬深渚。巘岈嶮嶙。上虧日月。登山自山麓。漸高漸峻。壠路迫隘。魚貫而陞。路側有絕澗。閘閭摩豁。俯窺木杪。焦原石邑。匪獨危懸。至山將半。便有廣澤大川。皋陸隱賑。予之葺宇。實在斯焉。所居三面皆圍山。周繞有象郭。郭前則平野蕭條。目極通望。東西帶二澗。四時飛流。泉清瀾微。露滴瀝生響。迴波跳沫。洄涌成音。並漕瀆通引。交渠綺錯。懸溜瀉於軒。澆激湍迴於階砌。供帳無綆。汲盥漱息瓶。盆楓櫺椅櫪之樹。梓柏桂樟之木。分形異色。千族萬種。結朱實。包綠裹。扞白蒂。抽紫莖。櫛蟲萃。尊捐風鳴籟。垂條欄戶。布葉房櫳。中谷澗濱。華蕊攢列。至於青春。緩謝。萍生泉動。則有都梁含馥。懷香送芬。長樂負霜。宜男泣露。芙渠紅花照水。皋蘇縹葉從風。憑軒永眺。蠲憂忘疾。邱阿陵曲。衆藥灌叢。地髓抗莖。山筋抽節。金鹽重於素壁。玉鼓貴於明珠。可以養性消疴。還年駐色。不藉崔文黃散。勿用負局紫丸。翱翔羣鳳。風胎雨殼。綠翼紅毛。素纓翠鬣。肅肅毛羽。關關好音。皆馴狎園池。旅食雞鶩。若迺鳩日。伺晨響。類鐘鼓。鳴蚊候曙。聲像琴瑟。元猿薄霧。清嘯飛猿。乘煙咏吟。嘈噴嘹亮。悅心娛耳。諒所以跨躡管籥。韜軼笙簧。宅東起招提寺。背巖面壑。層軒引景。邃宇臨崖。博敞閒虛。納祥生白。

左瞻右睇。仁智所居。故碩德名僧。振錫雲萃。調心七覺。詆訶五塵。郁列戒香。浴滋定水。至於薰鑪夜爇。法鼓旦開。予則跼蹐。振衣躬行。頂禮詢道。哲人欽和。至教每聞。此河分梗。彼岸永寂。熙熙然若登春臺。而出宇宙。唯善是樂。豈伊徒言。寺東南有道觀。亭亭崖側。下望雲雨。薰樓菌榭。隱映林篁。飛觀列軒。瓊瓏煙霧。日止却粒之氓。歲集神仙之客。餌星髓。吸流霞。將乃雲衣霓裳。乘龍馭鶴。觀下有石井。聳峙中澗。雕琢刻削。頗類人工。躍流瀄瀄。潏涌決咽。電擊雷吼。駭目驚魂。寺觀之前。皆植修竹。檀欒蕭瑟。被陵緣阜。外則良田區畛。通接山泉膏液。鬱潤肥腴。鄭白決漳。莫之能擬。致紅粟流溢。鳧雁充厭。春鼈旨膳。碧雞冬簞。味珍霜鷄。綬巾取於邱嶺。短褐出自中園。寒蔣逼側。於池湖。菅蒯駢填。於原隰。養給之資。生生所用。無不阜實。蕃籬充物。崖巘歲始。年季農隙。時閒濁醪初釀。醪清新熟。則田家野老。提壺共至。班荆林下。陳罇置酌。酒酣耳熱。屢舞誼。嘔盛論箱庾。高談穀稼。嗚噓謳歌。舉杯相抗。人生樂耳。此歡豈訾。若夫蠶而衣。耕而食。日出而作。日入而息。晚食當肉。無事爲貴。不求於世。不忤於物。莫辨榮辱。匪知毀譽。浩蕩天地之間。心無怵惕之驚。豈與稽生齒劍。楊子墜閣。較其優劣者哉。

庾子慎書品敘○

調已凡下

元靜先生曰。予遍求邃古。遯訪厥初。書名起於元洛。字勢發於倉史。故遺結繩。取諸文象。諸形會諸人事。未有廣此緘滕。深茲文契。是以一畫加大。天尊可知。二力增土。地卑可審。日以君道。則字勢圓。月以臣輔。則文體缺。及其轉註假借之流。指事會意之類。莫不狀範毫端。形呈字表。開篇玩古。則千載共朝。削簡傳今。則萬里對面。記善則惡自削。書賢則過必改。玉歷頌正。而化俗帝教。陳言而設教。變通不極。日用無窮。

與聖同功。參神並運。爰泊中葉。舍繁從省。漸失潁川之言。竟逐雲陽之字。若乃鳥跡孕於古文。壁書存於科斗。符陳帝璽。摹調蜀漆。署表宮門。銘題禮器。魚遊舍鳳。鳥已分蟲。仁義起於麒麟。威形發於龍虎。雲氣時飄五色。仙人還作兩童。龜若浮溪。蛇若赴穴。流星疑燭。垂露似珠。芝英轉車。飛白掩素。參差倒薤。旣思種柳之謠。長短懸針。復想定情之製。蚊腳傍低。鵠頭仰立。填飄板上。謬起印中。波迴墮鏡之鸞。楷顧彫陵之鵠。並以篆籀重復。見重昔時。或巧能售酒。或妙令鬼哭。信無味之奇珍。非趨時之急務。且具錄前訓。今不復兼論。惟草正疏通。專行於世。其或繼之者。雖百代可知。尋隸體發源。秦時隸人。下邳程邈所作。始皇見而重之。以奏事繁多。篆字難製。遂作此法。故曰隸書。今時正書是也。草聖起於漢時。解散隸法。用以赴急。本以草創之義。故曰草書。建初中。京兆杜操。始以善草知名。今之草書是也。余自少迄長。留心茲業。敏手謝於臨池。銳意同於削板。而叢山之扇。竟未增錢。凌雲之臺。無因誡子。求諸故跡。或有淺深。輒刪善草隸者。一百二十二人。伯英以稱聖居首。法高以追駿處末。推能相越。小例而九引類相附。大等而三復爲略論。總名書品。

鄼善長水經注序○

雖未與山海經敘抗手。亦頗樸屬微至。其託體然也。

易稱天以一生水。故氣微于北方。而爲物之先也。元中記曰。天下之多者。水也。浮天載地。高下無所不至。萬物無所不潤。及其氣流。屈石精薄。膚寸不崇。朝而澤。合靈宇者。神莫與並矣。是以達者。莫能測其淵。沖而盡其鴻。深也。昔大禹記著山海。周而不備。地理志其所錄。簡而不周。尙書本紀與職方俱略。都賦所述。裁不宣意。水經雖粗綴津緒。又闕傍通。所謂各言其志。而罕能備其宣導者矣。今尋圖訪蹟者。極聆川域。

之說而涉土游方者寡能達其津照縱髣髴前聞不能不猶深屏營也余少無尋山之趣長違問津之性識絕深經道淪要博進無訪一知二之機退無觀隅反三之慧獨學無聞古人傷其孤陋捐喪辭書達士嗟其面墻默室求深閉舟問遠故亦難矣然毫管闕天歷筭時昭飲河酌海從性斯畢竊以多暇空傾歲月輒述水經布廣前文大傳曰大川相間小川相屬東歸于海脈其支流之吐納診其沿路之所躔訪瀆搜渠緝而綴之經有繆誤者考以正文所不載非經水常源者不在記注之限但緜古芒昧華戎代襲郭邑空傾川流戕改殊名異目世乃不同川渠隱顯書圖自貿或亂流而攝詭號或直絕而生通稱枉渚交奇洄湍決瀆躔絡枝煩條貫系夥十二經通尙或難言輕流細漾固難辨究正可自獻逕見之心備陳輿徒之說其所不知蓋闕如也所以撰證本經附其枝要者庶備忘誤之衿求其尋省之易

徐孝穆玉臺新詠集序

○無字不工○四六
之上駟峭蒨麗密

陵雲概日由余之所未窺千門萬戶張衡之所曾賦周王璧臺之上漢帝金屋之中玉樹以珊瑚作枝珠簾以瑇瑁爲柙其中有麗人焉其人也五陵豪族充選掖庭四姓良家馳名永巷亦有潁川新市河間觀津本號嬌娥曾名巧笑楚王宮內無不推其細腰衛國佳人俱言訝其纖手閱詩明禮非直東鄰之自媒婉約風流無異西施之被教弟兄協律自小學歌少長河陽由來能舞琵琶新曲無待石崇筵篋雜引非因曹植傳鼓瑟於楊家得吹簫於秦女以至寵聞長樂陳后知而不平畫出天山闕氏覽而遙妒且如東鄰巧笑唯侍寢於更衣西子微顰將橫陳於甲帳陪游馭婆騁纖腰於結風長樂鴛鴦奏新聲於度曲粧明蟬之薄鬢照墜馬之垂鬢反插金蓮橫抽寶樹南都石黛最發雙蛾北地燕支偏開兩靨亦有嶺上仙

童分丸魏帝。腰中寶鳳。授歷軒轅。金星與婺女爭華。麝月共姮娥競爽。驚鸞冶袖。時飄韓掾之香。飛燕長裾。宜結陳王之佩。雖非圖畫。入甘泉而不分。言異神仙。戲陽臺而無別。真可謂傾國傾城。無對無雙者也。加以天情開朗。逸思彫華。妙解文章。尤工詩賦。琉璃研匣。終日隨身。翡翠筆牀。無時離手。清文滿篋。非唯芍藥之花。新製連篇。寧止葡萄之樹。九日登高。時有緣情之作。萬年公主。非無累德之辭。其佳麗也。如彼其才情也。如此。既而椒宮宛轉。柘館陰岑。絳劍晨嚴。銅蠶晝淨。三星未夕。不事懷衾。五日猶賒。誰能理曲。優游少託。寂寞多閒。厭長樂之疏鐘。勞宮中之緩箭。輕身無力。怯南宮之擣衣。生長深宮。笑扶風之織錦。雖復投壺玉女。爲歡盡於百嬌。爭博齊姬。心賞窮於六齒。無怡神於暇景。唯屬意於新詩。可得代彼謗蘇。微蠲愁疾。但往世名篇。當今巧製。分諸麟閣。散在鴻都。不務連章。無由披覽。於是然脂暝寫。弄筆晨書。選錄豔歌。凡爲十卷。曾無參於雅頌。亦靡濫於風人。涇渭之間。若斯而已也。麗以金繩。裝之寶軸。三臺妙札。亦龍伸螭屈之書。五色花牋。皆河北膠東之紙。高樓紅粉。仍定魯魚之文。辟惡生香。聊防羽陵之蠹。雲飛六甲。高擅玉函。鴻烈仙方。長推丹枕。至如青牛帳裏。餘曲旣終。朱鳥牕前。新粧已竟。方當開茲縹帙。散此縉繩。永對玩於書帷。長循環於纖手。豈如鄧學春秋。儒者之功難習。竇傳却老。金丹之術不成。固勝西蜀豪家。託情窮於魯殿。東儲甲館。流詠止於洞簫。變彼諸姬。聊同棄日。猗與彤管。無或譏焉。

駢體文鈔卷二十一

此卷不當撰錄非可
以蕭選述贊藉口

【序類】

司馬子長史記自序

馬班二序不當箸錄此亦誤于蕭選之有史述贊也

維昔黃帝法天則地。四聖遵序。各成法度。唐堯遜位。虞舜不台厥美。帝功萬世載之。作五帝本紀第一。維禹之功。九州攸同。光唐虞際。德流苗裔。夏桀淫驕。乃放鳴條。作夏本紀第二。維契作商。爰及成湯。太甲居桐。德盛阿衡。武丁得說。乃稱高宗。帝辛湛湎。諸侯不享。作殷本紀第三。維棄作稷。德盛西伯。武王牧野。實撫天下。幽厲昏亂。既喪艷鎬。陵遲至赧。洛邑不祀。作周本紀第四。維秦之先。伯翳佐禹。穆公思義。悼豪之旅。以人爲殉。詩歌黃鳥。昭襄業帝。作秦本紀第五。始皇既立。并兼六國。銷鋒鑄鏑。維偃干革。尊號稱帝。矜武任力。二世受運。子嬰降虜。作始皇本紀第六。秦失其道。豪傑並擾。項梁業之子。羽接之。殺慶救趙。諸侯立之。誅嬰背懷。天下非之作。項羽本紀第七。子羽暴虐。漢行功德。憤發蜀漢。還定三秦。誅籍業帝。天下惟寧。改制易俗。作高祖本紀第八。惠之早薨。諸呂不台。崇彊祿產。諸侯謀之。殺隱幽友。大臣洞疑。遂及宗禍。作呂太后本紀第九。漢既初興。繼嗣不明。迎王踐祚。天下歸心。蠲除肉刑。開通關梁。廣恩博施。厥稱太宗。作孝文本紀第十。諸侯驕恣。吳首爲亂。京師行誅。七國伏辜。天下翕然。大安殷富。作孝景本紀第十一。漢興五世。隆在建元。外攘夷狄。內修法度。建封禪。改正朔。易服色。作今上本紀第十二。維三代尙矣。年紀不可考。蓋取之譜牒。舊聞本于茲。于是略推作三代表第一。幽厲之後。周室衰微。諸侯專政。春秋有所不紀。

而譜牒經略。五霸更盛衰。欲睹周世相先後之意。作十二諸侯年表第二。春秋之後。陪臣秉政。疆國相王。以至于秦。卒并諸夏。滅封地。擅其號。作六國年表第三。秦既暴虐。楚人發難。項氏遂亂。漢乃扶義征伐。八年之間。天下三擅事。繁變衆。故詳著秦楚之際。月表第四。漢興已來。至於太初百年。諸侯廢立。分削譜紀。不明。有司靡踵。疆弱之原。云以世作。漢興已來。諸侯年表第五。維高祖元功。輔臣股肱。剖符而爵。澤流苗裔。忘其昭穆。或殺身隕國。作高祖功臣侯者年表第六。惠景之間。維申功臣。屬爵邑。作惠景間侯者年表第七。北討彊胡。南誅勁越。征伐夷蠻。武功爰列。作建元以來侯者年表第八。諸侯既彊。七國爲從。子弟衆多。無爵封邑。推恩行義。其勢銷弱。德歸京師。作王子侯者年表第九。國有賢相良將。民之師表也。維見漢興以來。將相名臣年表。賢者記其治。不賢者彰其事。作漢興以來將相名臣年表第十。維三代之禮。所損益各殊務。然要以近情性。通王道。故禮因人質。爲之節文。略協古文之變。作禮書第一。樂者所以移風易俗也。自雅頌聲興。則已好鄭衛之音。鄭衛之音。所從來久矣。人情之所感。遠俗則懷。比樂書以述來古。作樂書第二。非兵不彊。非德不昌。黃帝湯武以興。桀紂二世以崩。可不慎歟。司馬法所從來尙矣。大公孫吳王子能紹而明之。切近世極人變。作律書第三。律居陰而治陽。歷居陽而治陰。律歷更相治。間不容翮。忽。五家之文。怫異。維太初之元論。作歷書第四。星氣之書。多雜祲祥。不經。推其文。考其應。不殊比集。論其行事。驗于軌度。以次作天官書第五。受命而王。封禪之符。罕用。用則萬靈罔不禮祀。追本諸神。名山大川。禮作封禪書第六。維禹浚川。九州攸寧。爰及宣防。決瀆通溝。作河渠書第七。維幣之行。以通農商。其極則玩巧。并兼茲殖。爭于機利。去本趨末。作平準書以觀事變。第八。太伯避歷。江蠻是適。文武攸興。古公三跡。

側微卒歸西伯。文武是師。功冠羣公。繆權于幽。番番黃髮。爰饗營邱。不背柯盟。桓公以昌。九合諸侯。霸功顯彰。田闕爭寵。姜姓解亡。嘉父之謀。作齊太公。世家第二。依之違之。周公綏之。憤發文德。天下和之。輔翼成王。諸侯宗周。隱桓之際。是獨何哉。三桓爭彊。魯乃不昌。嘉旦金滕。作周公世家第三。武王克紂。天下未協而崩。成王既幼。管蔡疑之。淮夷叛之。于是召公率德。安集王室。以寧東土。燕易之禫。乃成禍亂。嘉甘棠之詩。作燕世家第四。管蔡相武庚。將寧舊商。及旦攝政。二叔不饗。殺鮮放度。周公爲盟。太任十子。周以宗彊。嘉仲悔過。作管蔡世家第五。王後不絕。舜禹是說。維德休明。苗裔蒙烈。百世享祀。爰周陳杞。楚實滅之。齊田既起。舜何人哉。作陳杞世家第六。牧殷餘民。叔封始邑。申以商亂。酒材是告。及朔之生。衛傾不寧。南子惡蒯賁。子父易名。周德卑微。戰國既彊。衛以小弱。角獨後亡。嘉彼康誥。作衛世家第七。嗟箕子乎。嗟箕子乎。正言不用。乃反爲奴。武庚既死。周封微子。襄公傷于泓。君子孰稱。景公謙德。熒惑退行。剔成暴虐。宋乃滅亡。嘉微子問太師。作宋世家第八。武王既崩。叔虞邑唐。君子譏名。卒滅武公。驪姬之愛。亂者五世。重耳不得意。乃能成霸。六卿專權。晉國以耗。嘉文公錫珪鬯。作晉世家第九。重黎業之。吳回接之。殷之季世。粥子牒之。周用熊繹。熊渠是續。莊王之賢。乃復陳國。既赦鄭伯。班師華元。懷王客死。蘭咎屈原。好諛信讒。楚并于秦。嘉莊王之義。作楚世家第十。少康之子。實賓南海。文身斷髮。鼉鱉與處。既守封禺。奉禹之祀。句踐困彼。乃用種蠶。嘉句踐夷蠻。能修其德。滅彊吳。以尊周室。作越王句踐世家第十一。桓公之東。太史是庸。及侵周禾。王人是議。祭仲要盟。鄭久不昌。子產之仁。紹世稱賢。三晉侵伐。鄭納于韓。嘉厲公納惠王。作

鄭世家第十二。維驥馱耳。乃章造父。趙夙事獻。衰續厥緒。佐文尊王。卒爲晉輔。襄子困辱。乃禽智伯。主父
生縛。餓死探爵。王遷辟淫。良將是斥。嘉鞅討周亂。作趙世家第十三。畢萬爵魏。卜人知之。及絳戮于戎翟
和之。文侯慕義。子夏師之。惠王自矜。齊秦攻之。旣疑信陵。諸侯罷之。卒亡大梁。王假廝之。嘉武佐晉文申
霸道。作魏世家第十四。韓厥陰德。趙武攸興。紹絕立廢。晉人宗之。昭侯顯列。申子庸之。疑非不信。秦人襲
之。嘉厥輔晉。匡周天子之賦。作韓世家第十五。完子避難。適齊爲援。陰施五世。齊人歌之。成子得政。田和
爲侯。王建動心。乃遷于共。嘉威宣能撥濁世。而獨宗周。作田敬仲完世家第十六。周室旣衰。諸侯恣行。仲
尼悼禮廢樂崩。追修經術。以達王道。匡亂世反之于正。見其文辭。爲天下制儀法。垂六藝之統紀。于後世。
作孔子世家第十七。桀紂失其道。而湯武作。周失其道。而春秋作。秦失其政。而陳涉發迹。諸侯作難。風起
雲蒸。卒亡秦族。天下之端。自涉發難。作陳涉世家第十八。成皋之臺。薄氏始基。詘意適代。厥崇諸竇。粟姬
價貴。王氏乃遂。陳后太驕。卒尊子夫。嘉夫德若斯。作外戚世家第十九。漢旣譎謀。禽信于陳。越荆剽輕。乃
封弟交爲楚王。爰都彭城。以彊淮泗。爲漢宗藩。戊溺于邪。禮復紹之。嘉游輔祖。作楚元王世家第二十。維
祖師旅。劉賈是與。爲布所襲。喪其荊吳。營陵激呂。乃王琅邪。愴午信齊。往而不歸。遂西入關。遭立孝文。獲
復王燕。天下未集。賈澤以族。爲漢藩輔。作荆燕世家第二十一。天下已平。親屬旣寡。悼惠先壯。實鎮東土。
哀王擅興。發怒諸呂。駟鈞暴戾。京師勿許。厲之內淫。禍成主父。嘉肥股肱。作齊悼惠王世家第二十二。楚
人圍我滎陽。相守三年。蕭何填撫山西。推計踵兵。給糧食不絕。使百姓愛漢。不樂爲楚。作蕭相國世家第
二十三。與信定魏。破趙拔齊。遂弱楚人。續何相國不變不革。黎庶攸寧。嘉參不伐功。矜能。作曹相國世家

第二十四。運籌帷幄之中。制勝于無形。子房計謀其事。無知名。無勇功。圖難于易。爲大於細。作留侯世家。第二十五。六奇既用。諸侯賓從于漢。呂氏之事。平爲本謀。終安宗廟。定社稷。作陳丞相世家。第二十六。諸呂爲從。謀弱京師。而勃反。經合于權。吳楚之兵。亞夫駐于昌邑。以唇齊趙。而出委以梁。作絳侯世家。第二十七。七國叛逆。蕃屏京師。唯梁爲扞。佞愛矜功。幾獲于禍。嘉其能距吳楚。作梁孝王世家。第二十八。五宗既王。親屬洽和。諸侯大小爲藩。爰得其宜。僭擬之事。稍衰貶矣。作五宗世家。第二十九。三子之王。文辭可觀。作三王世家。第三十。末世爭利。維彼奔義。讓國餓死。天下稱之。作伯夷列傳第一。晏子儉矣。夷吾則奢。齊桓以霸。景公以治。作管晏列傳第二。李耳無爲自化。清淨自正。韓非揣事情。循勢理。作老子韓非列傳第三。自古王者。而有司馬法。穰苴能申明之。作司馬穰苴列傳第四。非信廉仁勇。不能傳兵論劍。與道同符。內可以治身。外可以應變。君子比德焉。作孫子吳起列傳第五。維建遇讒。爰及子奢。尙既匡父。伍員奔吳。作伍子胥列傳第六。孔子述文。弟子興業。成爲師傅。崇仁厲義。作仲尼弟子列傳第七。鞅去衛適秦。能明其術。彊霸孝公。後世遵其法。作商鞅列傳第八。天下患衡秦無厭。而蘇子能存諸侯約。從以抑貪。彊作蘇秦列傳第九。六國既從親。而張儀能明其說。復散解諸侯。作張儀列傳第十。秦所以東攘雄諸侯。樗里甘茂之策。作樗里甘茂列傳第十一。苞河山。圍大梁。使諸侯斂手而事秦者。魏冉之功。作穰侯列傳第十二。南拔鄢郢。北摧長平。遂圍邯鄲。武安爲率。破荆滅趙。王翦之能。作白起王翦列傳第十三。獵儒墨之遺文。明禮義之統紀。絕惠王利端。列往世興衰。作孟子荀卿列傳第十四。好客喜士。士歸于薛。爲齊扞楚。魏作孟嘗君列傳第十五。爭馮亭以權。如楚以救邯鄲之圍。使其君復稱于諸侯。作平原君虞卿列傳第十

六能以富貴下貧賤。賢能詘于不肖。唯信陵君爲能行之。作魏公子列傳第十七。以身殉君。遂脫彊秦。使游說之士。南鄉走楚者。黃歇之義。作春申君列傳第十八。能忍詢于魏齊。而威信于彊秦。推賢讓位。二子有之。作范雎蔡澤列傳第十九。率行其謀。連五國之兵。爲弱燕報彊齊之讎。雪其先君之恥。作樂毅列傳第二十。能信意彊秦。而屈體廉子。用狗其君。俱重于諸侯。作廉頗藺相如列傳第二十一。湣王旣失臨淄。而奔莒。唯田單用卽墨。破走騎劫。遂存齊社稷。作田單列傳第二十二。能設詭說。解患于圍城。輕爵祿。樂肆志。作魯仲連鄒陽列傳第二十三。作辭以諷諫。連類以爭義。離騷有之。作屈原賈生列傳第二十四。結子楚親。使諸侯之士。斐然爭入事秦。作呂不韋列傳第二十五。曹子七首。魯獲其田。齊明其信。豫讓義不爲二心。刺客列傳第二十六。能明其畫。因時推秦。遂得意于海內。斯爲謀首。作李斯列傳第二十七。爲秦開地益衆。北靡匈奴。據河爲塞。因山爲固。建榆中。作蒙恬列傳二十八。填趙塞常山。以廣河內。弱楚權。明漢王之信于天下。作張耳陳餘列傳第二十九。收西河上黨之兵。從至彭城。越之侵掠梁地。以苦項羽。作魏豹彭越列傳第三十。以淮南叛楚歸漢。漢用得大司馬殷。卒破子羽于陔下。作鯨布列傳第三十一。楚人迫我京索。而信拔魏趙。定燕齊。使漢三分天下有其二。以滅項籍。作淮陰侯列傳第三十二。楚漢相距鞏洛。而韓信爲填潁川。盧縮絕籍糧餉。作韓信盧縮列傳第三十三。諸侯畔項王。唯齊連子羽。城陽漢得以間。遂入彭城。作田儋列傳第三十四。攻城野戰。獲功歸報。噲商有力焉。非獨鞭策。又與之脫難。作樊鄴列傳第三十五。漢旣初定。文理未明。蒼爲主計。整齊度量。序律歷。作張丞相列傳第三十六。結言通使。約懷諸侯。諸侯咸親。歸漢爲藩輔。作酈生陸賈列傳第三十七。欲詳知秦楚之事。唯周緤常從高祖。平定

諸侯作傳。靳蒯成列傳第三十八。徙彊族都關中。和約匈奴。明朝廷禮。次宗廟儀法。作劉敬叔孫通列傳第三十九。能摧剛作柔。卒爲列臣。欒公不劫于勢而倍死。作季布欒布列傳第四十。敢犯顏色。以達主義。不顧其身。爲國家樹長畫。作袁盎朝錯列傳第四十一。守法不失大理。言古賢人。增主之明。作張釋之馮唐列傳第四十二。敦厚慈孝。訥于言。敏于行。務在鞠躬。君子長者。作萬石張叔列傳第四十三。守節切直。義足以言。廉行足以厲賢。任重權不可以非理撓。作田叔列傳第四十四。扁鵲言醫。爲方者宗。守數精明。後世修序。弗能易也。而倉公可謂近之矣。作扁鵲倉公列傳第四十五。維仲之省。厥渚王吳。遭漢初定。以填撫江淮之間。作吳王濞列傳第四十六。吳楚爲亂。宗屬唯嬰賢而喜。士士鄉之。率師抗山東。滎陽作魏。其武安列傳第四十七。智足以應近世之變。寬足用得人。作韓長孺列傳第四十八。勇于當敵。仁愛士卒。號令不煩。師徒鄉之。作李將軍列傳第四十九。自三代以來。匈奴常爲中國患。害欲知彊弱之時。設備征討。作匈奴列傳第五十。直曲塞。廣河南。破祁連。通西國。靡北胡。作衛將軍驃騎列傳第五十一。大臣宗室。以侈靡相高。唯宏用節衣食。爲百吏先。作平津侯列傳第五十二。漢旣平中國。而佗能集揚越。以保南藩。納貢職。作南越列傳第五十三。吳之叛逆。甌人斬濞。葆守封禺。爲臣。作東越列傳第五十四。燕丹散亂。遼間滿收其亡民。厥聚海東。以集真藩。葆塞爲外臣。作朝鮮列傳第五十五。唐蒙使略通夜郎。而邛笮之君。請爲內臣受吏。作西南夷列傳第五十六。子虛之事。大人賦說。靡麗多誇。然其指風諫。歸于無爲。作司馬相如列傳第五十七。鯨布叛逆。子長國之。以填江淮之南。安剽楚庶民。作淮南衡山列傳第五十八。奉法循理之吏。不伐功矜能。百姓無稱。亦無過行。作循吏列傳第五十九。正衣冠立于朝廷。而羣臣莫敢言浮。

說長孺矜焉。好薦人。稱長者。壯有漑。作汲鄭列傳第六十。自孔子卒。京師莫崇庠序。唯建元元狩之間。文辭粲如也。作儒林列傳第六十一。民倍本多巧。奸軌弄法。善人不能化。唯一切嚴削。爲能齊之。作酷吏列傳第六十二。漢旣通使大夏。而西極遠蠻。引領內鄉。欲觀中國。作大宛列傳第六十三。救人于厄。振人不贍。仁者有乎。不旣信。不倍言。義者有取焉。作游俠列傳第六十四。夫事人君。能說主耳目。和主顏色。而獲親近。非獨色愛。能亦各有所長。作佞幸列傳第六十五。不流世俗。不爭勢利。上下無所凝滯。人莫之害。以道之用。作滑稽列傳第六十六。齊楚秦趙爲日者。各有俗所用。欲循觀其大旨。作日者列傳第六十七。三王不同龜。四夷各異卜。然各以決吉凶。略闕其要。作龜策列傳第六十八。布衣匹夫之人。不害于政。不妨百姓。取與以時。而息財富。智者有采焉。作貨殖列傳第六十九。維我漢繼五帝末流。接三代統業。周道廢。秦撥去古文。焚滅詩書。故明堂石室。金匱玉版。圖籍散亂。于是漢興。蕭何次律令。韓信申軍法。張蒼爲章程。叔孫通定禮儀。則文學彬彬稍進。詩書往往間出矣。自曹參薦蓋公言黃老。而賈生晁錯明申商。公孫宏以儒顯。百年之間。天下遺文古事。靡不畢集。太史公。太史公仍父子相續。纂其職曰。於戲。余維先人。嘗掌斯事。顯于唐虞。至于周。復典之。故司馬氏世主天官。至于余乎。欽念哉。欽念哉。罔羅天下。放失舊聞。王迹所興。原始察終。見盛觀衰。論考之行事。略推三代。錄秦漢。上說軒轅。下至于茲。著十二本紀。旣科條之矣。並時異世。年差不明。作十表。禮樂損益。律歷改易。兵權山川。鬼神天人之際。承敝通變。作八書。二十八宿環北辰。三十輻共一轂。運行無窮。輔拂股肱之臣。配焉。忠信行道。以奉主上。作三十世家。扶義俶儻。不令己失時。立功名于天下。作七十列傳。凡百三十篇。五十二萬六千五百字。爲太史公書序。略以拾遺補。

余述歷黃帝以來至大初而訖百三十篇

班孟堅漢書敘傳

固以爲唐虞三代詩書所及。世有典籍。故雖堯舜之盛。必有典謨之篇。然後揚名于後世。冠德于百王。故曰巍巍乎。其有成功也。煥乎。其有文章也。漢紹堯運。以建帝業。至于六世。史臣乃追述功德。私作本紀。編于百王之末。廁于秦項之列。太初以後。闕而不錄。故探纂前記。綴輯所聞。以述漢書。起于高祖。終于孝平。王莽之誅。十有二世。二百三十年。綜其行事。旁貫五經。上下洽通。爲春秋考紀表志傳凡百篇。其敘曰。皇矣漢祖。纂堯之緒。實天生德。聰明神武。秦人不綱。罔漏于楚。爰茲發迹。斷蛇奮旅。神母告符。朱旗乃舉。粵蹈秦郊。嬰來稽首。革命創制。三章是紀。應天順民。五星同晷。項氏畔換。黜我巴漢。西土宅心。戰士憤怨。乘釁而運。席卷三秦。割據河山。保此懷民。股肱蕭曹。社稷是經。爪牙信布。腹心良平。龔行天罰。赫赫明明。述高紀第一。孝惠短世。高后稱制。罔顧天顯。呂宗以敗。述惠紀第二。高后紀第三。太宗穆穆。允恭元默。化民以躬。帥下以德。農不供貢。臯不收孥。宮不新館。陵不崇墓。我德如風。民應如草。國富刑清。登我漢道。述文紀第四。孝景蒞政。諸侯方命。克伐七國。王室以定。匪怠匪荒。務在農桑。著于甲令。民用寧康。述景紀第五。世宗曄曄。思宏祖業。疇咨熙載。髦俊並作。厥作伊何。百蠻是攘。恢我疆宇。外博四荒。武功旣抗。亦迪斯文。憲章六學。統壹聖真。封禪郊祀。登秩百神。協律改正。饗茲永年。述武紀第六。孝昭幼冲。冢宰惟忠。燕蓋壽張。實叡實聰。臯人斯得。邦家和同。述昭紀第七。中宗明明。夤用刑名。時舉傳納。聽斷惟精。柔遠能邇。燁燿

威靈龍荒幕朔莫不來庭。丕顯祖烈尙於有成。述宣紀第八。孝元翼翼。高明柔克。賓禮故老。優繇亮直。外割禁囿。內損御服。離宮不衛。山陵不邑。闔尹之器。穢我明德。述元紀第九。孝成煌煌。臨朝有光。威儀之盛。如圭如璋。壺闈恣趙。朝政在王。炎炎燎火。亦允不陽。述成紀第十。孝哀彬彬。克摯威神。彫落洪支。底劇鼎臣。婉孌董公。惟亮天功。大過之困。實撓實凶。述哀紀第十一。孝平不造。新都作宰。不周不伊。喪我四海。述平紀第十二。漢初受命。諸侯並政。制自項氏。十有八姓。述異性諸侯王表第一。太祖元勳。啓立輔臣。支庶藩屏。侯王並尊。述諸侯王表第二。侯王之祉。祚及宗子。公族蕃滋。支葉碩茂。述王子侯表第三。受命之初。贊功剖符。弈世宏業。爵土迺昭。述高惠高后孝文功臣侯表第四。景征吳楚。武興師旅。後昆承平。亦有紹述。述景武昭宣元成哀功臣侯表第五。亡德不報。爰存二代。宰相外戚。昭躋見戒。述外戚恩澤侯表第六。漢迪于秦。有革有因。恟舉僚職。並列其人。述百官公卿表第七。篇章博舉。通于上下。略差名號。九品之敘。述古今人表第八。元元本本。數始于一。產氣黃鐘。造計秒忽。八音七始。五聲六律。度量權衡。歷算適出。官失學微。六家分乖。壹彼壹此。庶研其幾。述律歷志第一。上天下澤。春雷奮作。先王觀象。爰制禮樂。厥後崩壞。鄭衛荒淫。風流民化。漚漚紛紛。略存大綱。以統舊文。述禮樂志第二。雷電皆至。天威震耀。五刑之作。是則是效。威實輔德。刑亦助教。季世不詳。背本爭末。吳孫狙詐。申商酷烈。漢張九法。太宗改作。輕重之差。世有定籍。述刑法志第三。厥初生民。食貨惟先。割制廬井。定爾土田。什一供貢。下賦上尊。商以足用。茂遷有無。貨自龜貝。至此五銖。揚摧古今。監世盈虛。述食貨志第四。昔在上聖。昭事百神。類帝禋宗。望秩山川。明德惟馨。永世豐年。季末淫祀。營信巫史。大夫臚岱。侯伯僭時。放誕之徒。緣間而起。瞻前顧後。正其終始。述

郊祀志第五。炫炫上天。縣象著明。日月周輝。星辰乖精。百官立法。宮室混成。降應王政。景以燭形。三季之後。厥事放紛。舉其占應。覽故考新。述天文志第六。河圖命庖。洛書賜禹。八卦成列。九疇迥敘。世代實寶。光演文武。春秋之占。咎徵是舉。告往知來。王事之表。作五行志第七。坤作地執。高下九則。自昔黃唐。經略萬國。燮定東西。疆理南北。三代損益。降及秦漢。革剗五等。制立郡縣。略表山川。彰其剖判。述地理志第八。夏乘四載。百川是導。惟河爲臙。災及後代。商竭周移。秦決南涯。自茲距漢。北亡八支。文陘棗野。武作匏歌。成有平年。後遂滂沱。爰及溝渠。利我國家。述溝洫志第九。慮義畫卦。書契後作。虞夏商周。孔纂其業。篋書刪詩。綴禮正樂。彖系大易。因史立法。六學旣登。遭世罔宏。羣言紛亂。諸子相騰。秦人是滅。漢修其缺。劉向司籍。九流以別。爰著目錄。略序洪烈。述藝文志第十。上媯下暴。惟盜是伐。勝廣慄起。梁籍煽烈。赫赫炎炎。遂焚咸陽。宰割諸侯。命立侯王。誅嬰放懷。詐虐以亡。述陳勝項籍傳第一。張陳之交。游如父子。攜手遂秦。拊翼俱起。據國爭權。還爲豺虎。耳謀甘公。作漢藩輔。述張耳陳餘傳第二。三枿之起。本根旣朽。枯楊生華。曷惟其舊。橫雖雄材。伏于海隅。沐浴尸鄉。北面奉首。旅人慕殉。義過黃鳥。述魏豹田儋韓信傳第三。信惟餓隸。布實黥徒。越亦狗盜。芮尹江湖。雲起龍襄。化爲侯王。割有齊楚。跨制淮梁。綰自同閭。鎮我北疆。德薄位尊。非胙惟殃。吳克忠信。胤嗣迺長。述韓彭英盧吳傳第四。賈塵從旅。爲鎮淮楚。澤王琅邪。權激諸呂。潏之受吳。疆土踰矩。雖戒東南。終用齊斧。述荆燕吳傳第五。太上四子。伯兮早夭。仲氏王代。旂宅于楚。戊實淫缺。平陸迺紹。其在于京。弈世宗正。劬勞王室。用侯陽成。子政博學。三世成名。述楚元王傳第六。季氏之詘。辱身毀節。信于上將。議臣震栗。變公哭梁。田叔殉趙。見危授命。誼動明主。布歷燕齊。叔亦相魯。民思其政。

或金或社。述季布。欒布。田叔。傳第七。高祖八子。二帝六王。三趙不辜。淮厲自亡。燕靈絕嗣。齊悼特昌。掩有東土。自岱徂海。支庶分王。前後九子。六國誅斃。適齊亡祀。城陽濟北。後承我國。赳赳景王。匡漢社稷。述高五王。傳第八。猗與元勳。包漢舉信。鎮守關中。足食成軍。營都立宮。定制修文。平陽元默。繼而勿革。民用作歌。化我淳德。漢之宗臣。是謂相國。述蕭何。曹參。傳第九。留侯襲秦。作漢腹心。圖折武關。解阨鴻門。推齊銷印。毆致越信。招賓四老。惟寧嗣君。陳公擾擾。歸漢乃安。斃范亡項。走狄擒韓。六奇旣設。我罔艱難。安國廷爭。致仕杜門。絳侯矯矯。誅呂尊文。亞夫守節。吳楚有勳。述張陳王周。傳第十。舞陽鼓刀。滕公廢騶。潁陰商販。曲周庸夫。攀龍附鳳。並乘天衢。述樊鄴滕灌。傳第十一。北平志古。司秦柱下。定漢章程。律度之緒。建平質直。犯上干色。廣阿之廛。食厥舊德。故安執節。責通請錯。蹇蹇帝臣。匪躬之故。述張周趙任申屠。傳第十二。食其監門。長揖漢王。畫襲陳留。進收敖倉。塞隘杜津。王基以張。賈作行人。百越來賓。從容風議。博我以文。敬繇役夫。遷京定都。內強關中外。和匈奴。叔孫奉常。與時抑揚。稅介免冑。禮義是創。或哲或謀。觀國之光。述酈陸朱婁。叔孫。傳第十三。淮南僭狂。二子受殃。安辯而邪。賜頑以荒。敢行稱亂。窘世薦亡。述淮南衡山濟北。傳第十四。蒯通壹說。三雄是敗。覆酈驕韓。田橫顛沛。被之拘繫。迺成患害。充躬罔極。交亂宏大。述蒯伍江息。傳第十五。萬石溫溫。幼寤聖君。宜爾子孫。天天伸伸。慶社于齊。不言動民。衛直周張。淑慎其身。述萬石衛直周張。傳第十六。孝文三王。代孝二梁。懷折亡嗣。孝乃尊光。內爲母弟。外扞吳楚。怙寵矜功。僭欲失所。思心旣審。牛旤告妖。帝庸親親。厥國五分。德不堪寵。四支不傳。述文三王。傳第十七。賈生矯矯。弱冠登朝。遭文叡聖。屢抗其疏。暴秦之戒。三代是據。建設藩屏。以強守圉。吳楚合從。賴誼之慮。述賈

鼂錯傳第十九釋之典刑國憲以平馮公矯魏增主之明長孺剛直義形于色下折淮南上正元服莊之推賢于茲爲德述張馮汲鄭傳第二十榮如辱如有機有樞自下摩上惟德之隅賴依忠正君子采諸述賈鄒枚路傳第二十一魏其翩翩好節慕聲灌夫矜勇武安驕盈凶德相擬旣敗用成安國壯趾王恢兵首彼若天命此近人咎述竇田灌韓傳第二十二景十三王承文之慶魯恭館室江都諺輕趙敬險詖中山淫鬻長沙寂寞廣川亡聲膠東不亮常山驕盈四國絕祀河間賢明禮樂是修爲漢宗英述景十三王傳第二十三李廣恂恂實獲士心控弦貫石威動北隣躬戰七十遂死于軍敢怨衛青見討去病陵不引決忝世滅姓蘇武信節不詘王命述李廣蘇武傳第二十四長平桓桓上將之元薄伐獫狁恢我朔邊戎車七征衝軻閑閑合圍單于北登闔顏票騎冠軍森勇紛紜長驅六舉電擊雷震飲馬翰海封狼居山西規大河列郡祁連述衛青霍去病傳第二十五抑抑仲舒再相諸侯身修國治致仕縣車下帷覃思論道屬書讜言訪對爲世純儒述董仲舒傳第二十六文豔用寡子虛烏有寓言淫麗託風終始多識博物有可觀采蔚爲辭宗賦頌之首述司馬相如傳第二十七平津斤斤晚躋金門旣登爵位祿賜頤賢布衾疎食用儉飭身卜式耕牧以求其志忠寤明君乃爵乃試兒生疊疊束髮修學偕列名臣從政輔治述公孫宏卜式兒寬傳第二十八張湯遂達用事任職媚茲一人日旰忘食旣成寵祿亦罹咎慝安世溫良塞淵其德子孫遵業全祚保國述張湯傳第二十九杜周治文唯上淺深用取世資幸而免身延年寬和列于名臣欽用材謀有異厥倫述杜周傳第三十博望杖節收功大夏貳師秉鉞身豐胡社致死爲福每生作

臧述張騫李廣利傳第三十一。嗚呼史遷薰胥以刑幽而發憤。迺思迺精。錯綜羣言。古今是經。勒成一家。大略孔明。述司馬遷傳第三十二。孝武六子。齊昭亡嗣。燕刺謀逆。廣陵祝詛。昌邑短命。昏賀失據。戾園不幸。宣承天序。述武五子傳第三十三。六世耽耽。其欲澈澈。文武方作。是庸四克。助偃淮南。數子之德。不忠其身。善謀其國。述嚴朱吾邱主父徐嚴終王賈傳第三十四。東方瞻辭。談諸倡優。譏苑扞偃。正諫舉郵。懷肉汗殿。弛張沈浮。述東方朔傳第三十五。葛繹內寵。屈釐王子。千秋時發。宜春舊仕。敬義依霍。庶幾云已。宏唯政事。萬年容已。咸垂厥誨。孰爲不子。述公孫劉田楊王蔡陳鄭傳第三十六。王孫羸葬。建迺斬將。雲廷訐禹。福逾刺鳳。是謂狂狷。敬近其衷。述楊胡朱梅云傳第三十七。博陸堂堂。受遺武皇。擁毓孝昭。末命導揚。遭家不造。立帝廢王。權定社稷。配忠阿衡。懷祿耽寵。漸化不詳。陰妻之逆。至子而亡。穉侯狄孥。虔恭忠信。弈世載德。賄于子孫。述霍光金日磾傳第三十八。兵家之策。惟在不戰。營平皤皤。立功立論。以不濟可。上諭其信。武賢父子。虎臣之俊。述趙充國辛慶忌傳第三十九。義陽樓蘭。長羅昆彌。安遠日逐。義成郅支。陳湯誕節。救在三哲。會宗勤事。疆外之桀。述傅常鄭甘陳段傳第四十。不疑膚敏。應變當理。辭霍不婚。遂遁致仕。疏克有終。散金娛老。定國之祚。于其仁考。廣德當宜。近于知恥。述雋疏于薛平彭傳第四十一。四皓遜秦。古之逸民。不營不拔。嚴平鄭真。吉困于賀。湟而不溜。禹旣黃髮。以德來仕。舍惟正身。勝死善道。郭欽蔣詡。近遜之好。述王貢兩龔鮑傳第四十二。扶陽濟濟。聞詩聞禮。元成退讓。仍世作相。漢之宗廟。叔孫是謨。革是孝元。諸儒變度。國之誕章。博載其路。述韋賢傳第四十三。高平師師。惟辟作威。圖黜凶害。天子是毗。博陽不伐。含宏光大。天誘其衷。慶流苗裔。述魏相丙吉傳第四十四。占往知來。幽贊神明。苟非其

十五。廣漢尹京。克聰克明。延壽作翊。既和且平。矜能訐上。俱陷極刑。翁歸承風。帝揚厥聲。敞亦平平。文雅自贊。尊實赳赳。邦家之彥。章死非臯。士民所嘆。述趙尹韓。張兩王傳。第四十六。寬饒正色。國之司直。豐絜好剛。輔亦慕直。皆陷狂狷。不典不式。崇執言責。隆持官守。寶曲定陵。並有立志。述蓋諸葛。劉鄭毋將。孫何傳。第四十七。長倩愼愼。觀霍不舉。遇宣迺拔。傅元作輔。不圖不慮。見躡石許。述蕭望之傳。第四十八。子明光光。發迹西疆。列于禦侮。厥子亦良。述馮奉世傳。第四十九。宣之四子。淮陽聰敏。舅氏遽除。幾陷大理。楚孝惡疾。東平失軌。中山凶短。母歸戎里。元之二王。孫後大宗。昭而不穆。大命更登。述宣元六王傳。第五十。樂安衷衷。古之文學。民具爾瞻。困于二司。安昌貨殖。朱雲作嫖。博山敦慎。受莽之疚。述匡張孔馬傳。第五十一。樂昌篤實。不撓不詘。遘閔既多。是用廢黜。武陽殷勤。輔導副君。既忠且謀。饗茲舊勳。高武守正。因用濟身。述王商史丹傳。喜傳第五十二。高陽文法。揚鄉武略。政事之才。道德惟薄。位過厥任。鮮終其祿。博之翰音。鼓妖先作。述薛宣朱博傳。第五十三。高陵修儒。任刑養威。用合時宜。器周世資。義得其勇。如虎如貔。進不跬步。宗爲鯨鯢。述翟方進傳。第五十四。統微政缺。災眚屢發。永陳厥咎。戒在三七。鄴指丁傅。略窺占術。述谷永杜鄴傳。第五十五。哀平之卹。丁傅莽賢。武嘉戚之。乃喪厥身。高樂廢黜。咸列貞臣。述何武王嘉師丹傳。第五十六。淵哉若人。實好斯文。初擬相如。獻賦黃門。輟而覃思。草法纂元。斟酌六經。放易象論。潛于篇籍。以章厥身。述揚雄傳。第五十七。獷獷亡秦。滅我聖文。漢存其業。六學析分。是綜是理。是綱是紀。師徒彌散。著其終始。述儒林傳。第五十八。誰毀誰譽。譽其有試。泯泯羣黎。化成良吏。淑人君子。時同功異。沒

世遺愛。民有餘思。述循吏傳第五十九。上替下陵。姦軌不勝。猛政橫作。刑罰用興。曾是強圉。培克爲雄。報虐以威。殃亦凶終。述酷吏傳第六十。四民食力。罔有兼業。大不淫侈。細不匱乏。蓋均無貧。遵王之法。靡法靡度。民肆其詐。偪上并下。荒殖其貨。侯服玉食。敗俗傷化。述貨殖傳第六十一。開國承家。有法有制。家不藏甲。國不專殺。矧乃齊民。作威作惠。如台不匡。禮法是謂。述游俠傳第六十二。彼何人斯。竊此富貴。營損高明。作戒後世。述佞幸傳第六十三。於惟帝典。戎夷猾夏。周宣攘之。亦列風雅。宗幽旣昏。淫于褒女。戎敗我驪。遂亡酆鄙。大漢初定。匈奴強盛。圍我平城。寇侵邊境。至于孝武。爰赫斯怒。王師雷起。霆擊朔野。宣承其末。迺施洪德。震我威靈。五世來服。王莽竊命。是傾是覆。備其變理。爲世典式。述匈奴傳第六十四。西南外夷。種別域殊。南越尉佗。自王番禺。攸攸外寓。閩越東甌。爰泊朝鮮。燕之外區。漢興柔遠。與爾剖符。皆恃其岨。乍臣乍驕。孝武行師。誅滅海隅。述西南夷兩越朝鮮傳第六十五。西戎卽序。夏后是表。周穆觀兵。荒服不旅。漢武勞神。圖遠甚勤。王師驛驛。致誅大宛。嫫嫫公主。迺女烏孫。使命迺重。條支之瀕。昭宣承業。都護是立。總督城郭。三十有六。修奉朝貢。各以其職。述西域傳第六十六。詭矣禍福。刑于外戚。高后首命。呂宗顛覆。薄姬椽魏。宗文產德。竇后違意。考盤于伐。王氏仄微。世武作嗣。子夫旣興。扇而不終。鈎弋憂傷。孝昭以登。上官幼尊。類禡厥宗。史娣王悼。身遇不祥。及宣饗國。二族後光。恭哀產元。天而不遂。邛成乘序。履尊三世。飛燕之妖。禍成厥妹。丁傅僭恣。自求凶害。中山無辜。乃喪馮衛。惠張景薄。武陳宣霍。成許哀傅。平王之作。事雖歆羨。非天所度。怨咎若茲。如何不恪。述外戚傳第六十七。元后娠母。月精見表。遭成之逸。政自諸舅。陽平作威。誅加卿宰。成都煌煌。假我明光。曲陽歆歆。亦朱其堂。新都亢極。作亂以亡。述元后傳第

其姦昏迷王莽傳第六十九凡漢書敍帝皇列官司建侯王準天地統陰陽闡元極步三光分州域物土
窮人理該萬方緯六經綴道綱總百氏贊篇章函雅故通古今正文字惟學林述敍傳第七十
史記漢書自敘之篇章實所謂員以神方以智者於此昭然若揭
乍讀之以子長疏拙處多孟堅整栗處多用韻亦班較密獻附識

駢體文鈔卷二十二

【雜頌讚箴銘類】

董仲舒山川頌

繫辭戴記之文。荀賈賦篇此與鼎足。

山則巖崑嵬摧。嵬崔嵬巍。久不崩阨。似夫仁人志士。孔子曰。山川神祇立。寶藏殖。器用資。曲直合。大者可以爲宮室臺榭。小者可以爲舟輿浮漚。大者無不中。小者無不入。持斧則斫。折鎌則艾。生人立禽獸。伏死人入。多其功而不言。是以君子取譬也。且積土成山。無損也。成其高。無害也。成其大。無虧也。小其上。泰其下。久長安後世。無有去就。儼然獨處。惟山之意。詩云。節彼南山。惟石巖巖。赫赫師尹。民具爾瞻。此之謂也。水則源泉混混。汙汙。晝夜不竭。既似力者。盈科後行。既似持平者。循微赴下。不遺小間。既似察者。循豁谷不迷。或奏萬里而必至。既似智者。鄣防止而能清淨。既似知命者。不清而入。潔清而出。既似善化者。赴千仞之壑而不疑。既似勇者。物皆困于火。而水獨勝之。既似武者。咸得之而生。失之而死。既似有德者。孔子在川上曰。逝者如斯夫。不舍晝夜。此之謂也。

王稚紀司隸校尉楊孟文石門頌

并序。森竦。筆力甚偉。

以質得古。出于凡將滂喜者也。

惟《靈定位》。川澤股躬。澤有所注。川有所通。余谷之川。其澤南隆。八方所達。益域爲充。高祖受命。興于漢中。道由子午。出散入秦。建定帝位。以漢詆焉。後以子午塗路澀難。更隨圍谷。復通堂先。凡此四道。垓鬲尤

艱。至于永平。其有四年。詔書開余。鑿通石門。中遭元二。西夷虐殘。橋梁斷絕。子午復循。上則縣峻。屈曲流顛。下則入冥。廡寫輸淵。平阿泉泥。常蔭鮮晏。木石相距。利磨確盤。臨危槍礪。履尾心寒。空輿輕騎。遣尋弗前。惡虫齧狩。蛇蝥毒蠱。未秋截霜。稼苗天殘。終年不登。匱餒之患。卑者楚惡。尊者弗安。愁苦之難。焉可具言。于是明知。故司隸校尉。健爲武陽楊君。厥字孟文。深執忠伉。數上奏請。有司議駁。君遂執爭。百遼咸從。帝用是聽。廢子由斯。得其度經。功飭爾要。敞而晏平。清涼調和。烝烝艾寧。至建和二年。仲冬上旬。漢中太守。健爲武陽王升。字稚紀。涉歷山道。推序本原。嘉君明知。美其仁賢。勒石頌德。以明厥勳。其辭曰。君德明明。熒煥彌光。刺過拾遺。厲清八荒。奉魁承杓。綏億衙彊。春宣聖日。秋貶若霜。無偏蕩蕩。真雅以方。寧靜烝庶。政與乾通。輔主匡君。循禮有常。咸曉地理。知世紀綱。言必忠義。匪石厥章。恢宏大節。讜而益明。揆往卓今。謀合朝情。驛艱卽安。有勳有榮。禹鑿龍門。君執繼縱。上順斗極。下荅皇皇。自南自北。四海攸通。君子安樂。庶士悅雍。商人咸懷。農夫永同。春秋記異。今而紀功。垂流億載。世世嘆誦。序曰。明哉仁智。豫識難易。原夫天道。安危所歸。勤勤竭誠。榮名休麗。漢故穀城長蕩陰令張君表頌序○原本鼎彝數陳善績辭不迫切自有矩度神而明之存乎其人耳詞尙體要經術之遺君諱遷。字公方。陳留己吾人也。君之先。出自有周。周宣王中興。有張仲。以孝友爲行。披覽詩雅。煥知其祖。高帝龍興。有張良。善用籌策。在帷幕之內。決勝負千里之外。析珪於留。文景之間。有張釋之。建忠弼之謨。帝遊上林。問禽狩所有。苑令不對。更問嗇夫。嗇夫事對。於是進嗇夫爲令。令退爲嗇夫。釋之議爲不可。苑令有公卿之才。嗇夫喋喋小吏。非社稷之重。上從言。孝武時。有張騫。廣通風俗。開定畿寓。南苞八蠻。西羈

相係不殞高問孝弟於家中。饗於朝。治京氏。易聰麗。權略藝於從政。少爲郡吏。隱練職位。常在股肱。數爲從事。聲無細聞。徵拜郎中。除穀城長。蠶月之務。不閉四門。臘正之際。休囚歸賀。八月算民。不煩於鄉。隨就虛落。存恤高年。路無拾遺。犁種宿墅。黃巾初起。燒平城市。斯縣獨全。子賤孔蔑。其道區別。尙書五教。君崇其寬。詩云愷悌。君隆其恩。東里潤色。君垂其仁。邵伯分陝。君懿于棠。晉陽珮璋。西門帶弦。君之體素。能雙其助。流化八基。遷蕩陰令。吏民頡頏。隨送如雲。周公東征。西人怨思。奚斯讚魯。考父頌殷。前喆遺芳。有功不書。後無述焉。於是刊石豎表。銘勒萬載。三代以來。雖遠猶近。詩云舊國。其命惟新。

於穆我君。旣敦旣純。雪白之性。孝友之仁。紀行來木。蘭生有芬。克岐有兆。綏御有助。利器不覲。魚不出淵。國之良幹。垂愛在民。蔽芾棠樹。溫溫恭人。乾道不繆。唯淑是親。旣多受祉。永享南山。千祿無疆。子子孫孫。蔡伯喈祖德頌。有致。○機。

昔文王始受命。武王定禍亂。至於成王。太平乃洽。祥瑞畢降。夫豈后德熙隆。漸浸之所通也。是以易嘉積善。有餘慶。詩稱子孫保之。非特王道然也。賢人君子。修仁履德者。亦其有焉。昔我烈祖暨于子考。世載孝友。重以明德。率禮莫違。是以靈祇降之休瑞。免擾馴以昭其仁。木連理以象其義。斯乃祖禰之遺靈。盛德之所貺也。豈我童蒙孤稚所克任哉。乃爲頌曰。

穆穆我祖。世篤其仁。其德克明。惟懿惟醇。宣慈惠和。無競伊人。巖巖我考。蒞之以莊。增崇丕顯。克構其堂。是用祚之。休徵惟光。厥徵伊何。於昭于今。園有甘棠。別榦同心。墳有擾兔。宅我柏林。神不可誣。僞不可加。

析薪之業。畏不克荷。矧貪靈貺。以爲己華。惟予小子。豈不是欲。干有先功。匪榮伊辱。

蔡伯喈京兆樊惠渠頌○○○

中郎之文如平原大河氣脈綽遠神理出于詩書經術之士爲範百世異時淫麗浸染我思大雅之卓爾矣純懿閔遠中郎絕塵韓曾之流從何

步學

洪範八政。一曰食。周禮九職。一曰農。有生之本。於是乎出。貨殖財用。於是乎在。九土上沃。爲大田多稔。然而地有墉堵。川有墊下。漑灌之便。行趨不至。明哲君子。創業農事。因高卑之宜。驅自行之勢。以盡水利。而富國饒人。自古有焉。若夫西門起鄴。鄭國行秦。李冰在蜀。信臣治穰。皆此道也。陽陵縣東。其地衍隩。土氣辛螿。嘉穀不植。草萊焦枯。而涇水長流。漑灌維首。編戶齊氓。庸力不供。牧人之吏。謀不假給。蓋常興役。猶不克成。光和五年。京兆尹樊君諱陵字德雲。勤恤人隱。悉心政事。苟有可以惠斯人者。無聞而不行焉。遂諮之郡吏。申於政府。僉以爲因其所利之事者。不可已者也。乃命方略大吏。麴遂令伍瓊。揣度計慮。揆程經用。以事上聞。副在三府司農。遂取財於豪富。借力於黎元。樹柱累石。委薪積土。基跂工堅。體勢強壯。折湍流。款曠陂。會之於新渠。疏水門。通窳瀆。灑之於畝。畝清流浸潤。泥潦浮游。昔日鹵田。化爲甘壤。稔黍稼穡之所入。不可勝算。農民熙怡。悅豫相與。謳謠疆畔。斐然成章。謂之樊惠渠云。其歌曰。我有長流。莫或遏之。我有溝澮。莫或達之。田疇斥鹵。莫修莫釐。饑饉困悴。莫恤莫思。乃有樊君。作人父母。立我畝畝。黃潦膏凝。多稼茂止。惠乃無疆。如何勿喜。我壤旣營。我疆斯成。泯泯我人。旣富且盈。爲酒爲釀。蒸彼祖靈。貽福惠君。壽考且寧。

所如止則操卮執觚。動則挈榼提壺。惟酒是務。焉知其餘。有貴介公子。搢紳處士。聞吾風聲。議其所以。乃奮袂攘衿。怒目切齒。陳說禮法。是非鋒起。先生于是方捧罌承槽。銜杯漱醪。奮髯箕踞。枕麴藉糟。無思慮。其樂陶陶。兀然而醉。豁爾而醒。靜聽不聞雷霆之聲。熟視不覩泰山之形。不覺寒暑之切肌。利欲之感情。俯觀萬物。擾擾焉如江河之載浮萍。二豪侍側。焉如蜾蠃之與螟蛉。

陸士衡漢高祖功臣頌○○○

有變化。有頓挫。可謂跌宕昭章矣。神完氣足。意內言外。不刊之文。

此士衡所謂文繁理富。意必指適者也。優游彬蔚。精微朗暢。兩者兼之。

相國鄴文終侯沛蕭何。相國平陽懿侯沛曹參。太子少傅留文成侯韓張良。丞相曲逆獻侯陽武陳平。楚王淮陰韓信。梁王昌彭越。淮南王六黥布。趙景王大梁張耳。韓王韓信。燕王豐盧綰。長沙文王吳芮。荆王沛劉賈。太傅安國懿侯王陵。左丞相絳武侯沛周勃。相國舞陽侯沛樊噲。右丞相曲周景侯高陽酈商。太僕汝陰文侯沛夏侯嬰。丞相潁陰懿侯睢陽灌嬰。代丞相陽陵景侯魏傅寬。車騎將軍信武肅侯靳歙。大行廣野君高陽酈食其。中郎建信侯齊劉敬。太中大夫楚陸賈。太子太傅稷嗣君薛叔孫通。魏無知。護軍中尉隨何。新城三老董公。轅生。將軍紀信。御史大夫沛周苛。平國君侯公右三十一人。與定天下安社稷者也。

頌曰。茫茫宇宙。上墜下黷。波振四海。塵飛五嶽。九服徘徊。三靈改卜。赫矣高祖。肇載天祿。沈跡中鄉。飛名帝錄。慶雲應輝。皇階授木。龍興泗濱。虎嘯豐谷。彤雲晝聚。素靈夜哭。金精仍頽。朱光以渥。萬邦宅心。駿民

效足堂堂蕭公。王跡是因綢繆。叡后無競。惟人外濟。六師內撫。三秦拔奇。夷難邁德。振民體國。垂制上穆。下清名蓋。羣后是謂。宗臣平陽。樂道在變。則通爰淵。爰嘿有此武功。長驅河朔。電擊壤東。協策淮陰。亞跡蕭公文成。作師通幽。洞冥永言配命。因心則靈。窮神觀化。望影揣情。鬼無隱謀。物無遁形。武闈是闢。鴻門是寧。隨難榮陽。卽謀下邑。銷印甚廢。推齊勸立。運籌固陵。定策東襲。三王從風。五侯允集。霸楚實喪。皇漢凱入。怡顏高覽。彌翼鳳戢。託跡黃老。辭世却粒。曲逆宏達。好謀能深。游精杳漠。神跡是尋。重元匪奧。九地匪沈。伐謀先兆。濟響于音。奇謀六奮。嘉慮四迴。規主於足。離項於懷。格人乃謝。楚翼實摧。韓王窘執。胡馬洞開。迎文以謀。哭高以哀。灼灼淮陰。靈武冠世。策出無方。思入神契。奮臂雲興。騰跡虎噬。凌險必夷。摧剛則脆。肇謀漢濱。還定渭表。京索旣扼。引師北討。濟河夷魏。登山滅趙。威亮火烈。勢踰風掃。拾代如遺。偃齊猶草。二州肅清。四邦咸舉。乃眷北燕。遂表東海。克滅龍且。爰取其旅。劉項懸命。人謀是與。念功惟德。辭通絕楚。彭越觀時。弦迹匿光。民具爾瞻。翼爾鷹揚。威凌楚域。質委漢王。靖難河濟。卽宮舊梁。烈烈黥布。耽耽其眇。名冠彊楚。鋒猶駭電。觀幾蟬蛻。悟主革而肇。彼梟風翻爲我扇。天命方輯。王在東夏。矯矯三雄。至於垓下。元凶旣夷。寵祿來假。保大全祚。非德孰可。謀之不臧。舍福取禍。張耳之賢。有聲梁魏。士也罔極。自貽伊愧。俯思舊恩。仰察五緯。脫跡違難。披榛來泊。改策西秦。報辱北冀。悴葉更輝。枯條以肆。王信韓孽。宅土開疆。我圖爾才。越遷晉陽。盧綰自微。婉變我皇。跨功踰德。祚爾輝章。人之貪禍。寧爲亂亡。吳芮之王。祚由梅銷。功微勢弱。世載忠賢。肅肅荆王。董我三軍。我圖四方。殷薦其勳。庸親作勞。舊楚是分。往踐厥宇。大啓淮濱。安國遠親。悠悠我思。依依哲母。旣明且慈。引身伏劍。永言固之。淑人君子。實邦之基。義形於色。憤發

燕韓寧亂以武斃呂以權滌穢紫宮徵帝太原實惟太尉劉宗以安挾功震主自古所難動耀上代身終
下藩舞陽道迎延帝幽藪宣力王室匪惟厥武總干鴻門披關帝宇聳顏誚項掩淚寤主曲周之進于其
哲兄俾率爾徒從王于征振威龍蛻攄武庸城六師實因克荼禽黠猗歟汝陰綽綽有裕戎軒肇跡荷策
來附馬煩轡殆不釋擁樹皇儲時又平城有謀穎陰銳敏屢爲軍鋒奮戈東城禽項定功乘風藉響高步
長江收吳引淮光啓于東陽陵之勳元帥是承信武薄伐揚節江陵夷王殄國俾亂作懲恢恢廣野誕節
令圖進謁嘉謀退守名都東規白馬北距飛狐卽倉敖庾據險三塗輜軒東踐漢風載徂身死于齊非說
之辜我皇實念言祚爾孤建信委輅被褐獻寶指明周漢銓時論道移帝伊洛定都鄴鎬柔遠鎮邇實敬
攸考抑抑陸生知言之貫往制勁越來訪皇漢附會平勃夷凶剪亂所謂伊人邦家之彥百王之極舊章
靡存漢德雖朗朝儀則昏稷嗣制禮下肅上尊穆穆帝典煥其盈門風晞三代憲流後昆無知叡敏獨昭
奇跡察粹蕭相貺同師錫隨何辯達因資於敵紆漢披楚唯生之績皤皤董叟謀我平陰三軍縞素天下
歸心袁生秀朗沈心善照漢旃南振楚威自撓大略淵回元功響效邈哉惟人何識之妙紀信誑項軺軒
是乘攝齊赴節用死執懲身與煙消名與風興周苛慷慨心若懷冰形可以暴志不可凌貞軌偕沒亮跡
雙升帝疇爾庸後嗣是膺天地雖順王心有違懷親望楚永言長悲侯公伏軾皇媪來歸是謂平國寵命
有輝震風過物清濁效響大人于興利在攸往宏海者川崇山惟壤韶龔錯音衰龍比象明明衆哲同濟
天網劍宣其利鑒獻其朗文武四充漢祚克廣悠悠遐風千載是仰

陸士龍盛德頌○足使管宣變色陳思卻步亦堅韌亦嫫姚直使孟堅變色亦

風骨不逮功臣頌而織詞甚縟

余行經泗水高帝昔爲亭長於此瞻望山川意有慨然遂奏章以通情焉并爲之頌云爾

晉太子舍人龔士臣雲稽首再拜上書皇帝陛下臣雲頓首死罪伏惟陛下紹軒轅之叡哲越三代之高蹤膺有聖之元景蘊生民之上略秦政肆虐漸疊生民在昔上帝乃眷多方肅雍寶命鑒民顧天思文叡聖以宅神器六合炎駕八荒星錯企皇居於阿房倚逸鹿於九野謀猷回遙天人匪祚乃爾斯國授漢于西京是以先紹五緯章太素神母哀號底命丹野九垓關授命之符鈞天清建皇之鑒陛下螭蟠泗水龍躍下亭慶雲徘徊紫塵熠燿皇威肇於斷蛇神武基於豐沛掩四維以蓋天廓元謨以闢宇華宮山藏玉堂海紬雲蓋景陰金門林蔚拔足崇長揖之賓吐殄納獻規之客元猷上通德輝下濟仰翰雲禽俯躍魚魴是以四海之內莫不企景嶽以接羣望廣川而鱗集乘山涉水視險若夷奔波闕廷思効死節乃鳴鸞在衡奔驥服輅良平鳳棲信布虎據英雄凌暴於外奇謨補闕乎內威謀兼陳智勇畢効乃凌河海河海無梁乃仆高山嶽華不重三秦席卷項籍灰分逋虜霧散遺寇雲徹泛時雨以清天灑狂塵以肅地□□

○轡於舟輿竦峻蓋於蒼昊功濟宇宙德被羣生天人允嘉民神協愛歷數在身有命將集而陛下猶復允執高讓成功靡有普天歸德羣后固請然後謁天皇於圓丘延萬乘以帝室率土離暴秦之亂臣妾蒙有道之惠戎羌蠻夷之墟雕趾肅慎之國莫非帝臣巍巍蕩蕩蓋天臨地自啓闢以來有皇之美未有若

卽命舟人弭楫水沚。瞻仰山川。舊物湮替。永惟聖輝。罔識所憑。遠眺邇念。感物興哀。終懷靡及。拊心遐慕。臣命違千載之運。身生四百之外。恨不得役力聖明之鑒。寓目風塵之會。揮戈前隊。待罪下軍。抽鋒咸陽之關。提鉞項籍之領。痛心自悼。不知所裁。行役之臣。牽制朝憲。雖懷彷徨。王事靡盬。肅將言邁。實銜罔極。臣聞遊魂變化。神道無方。雖聖靈登遐。降陟在天。連光五精。流輝太一。或冀神輿降觀。薄狩五服。時邁玉輅。言巡茲邑。是以下臣。仰瞻紫宮。俯要恍惚。愚情振蕩。靡審所如。不勝延頸紫微。結心閭闔之情。謹住水濱。拜章陳愚。臣雲誠惶誠恐。頓首頓首。死罪死罪。稽首以聞。臣雲言。臣聞歌詠所以宣成功之烈。詩頌所以美盛德之容。是以聞其聲。則重華之道彌新。存其操。則文王之容可觀。永惟陛下。聖德豐化。比隆前代。元勳茂功。超蹤在昔。故詩歌之所依詠。金石之所揄揚者也。臣謹上盛德頌一篇。雖不足以仰度天高。伏測地厚。貴獻狂夫區區之情。臣雲云。晉太子舍人臣陸雲上。

於皇漢祖。纂胄有唐。平章在昔。文思百王。丹輝棲列。火精幽光。爰茲聖緒。頽維弛綱。靈曜熠燿。隋景扶桑。則天未墜。重規昊蒼。其規伊何。橫乾作峻。厥德不回。矩地能順。憑河拓景。襄嶽殷韻。龍章炯偉。虎質碩變。有秦不競。罔極黔首。震驚予師。思虔神主。上帝曰咨。天鑒有赫。乃眷伊漢。此惟予宅。明明聖皇。旣受帝祉。雲騰下邑。風駭泗水。仰鏡天文。五緯同晷。俯察雲符。神母爰止。思文聖王。克廣克遐。威凌羣桀。德潤諸華。爰祀天人。天人攸嘉。爰輯蒸徒。蒸徒旣和。旣和旣順。乃矢德音。豐沛之旅。其會如林。朱旗虹超。彤旆電尋。推師蕭曹。撫劍高吟。元戎薄伐。時罔不龜。凌波川潰。肆野陸沉。咸陽克殄。旣係秦后。峨峨阿房。乃清帝宇。

穆穆聖皇。天保攸定。有項畔換。不式王命。王命既愆。黜我西上。於鑠王師。遵時匪怒。爰赫乘豐。席卷三夏。擘擘戎軒。矯矯乘馬。燮伐強楚。至于垓下。天誅薄曜。暴籍授首。區夏既混。宇宙蒙乂。肅肅帝居。巍巍神器。有皇于登。是臨天位。繡文于裳。組華于黻。明明天子。有穆其容。至止鏘鏘。相維辟公。宣聲路寢。發號紫宮。頽此愷悌。以畜萬邦。思樂皇慶。協于時雍。琴瑟在御。大予舞功。越裳委贄。肅慎來王。明明聖皇。開國乘制。分圭祚勞。河山命誓。禮律克彰。典文垂藝。有漢恢恢。疏罔不替。聖功克明。九方孔安。良宰內幹。武臣外閑。漸澤冀域。沾被戎蠻。連光大素。萬載不刊。語見其大

陸士龍登遐頌○

夫死生存亡。二理之已然者也。而世有神仙登遐之言。千歲不死之壽。其詳固難得而精矣。列仙之道。作者既集。而登遐未有焉。莊周有言。我試妄言之。子試妄聽之。彼之有無。蓋難以理求。我之妄聽。顧可以言寄之。遂爲頌云爾。郊間人。王子喬。元洛。孔仲尼。九疑仙人。大勝山上女。李少君。梅福。張夷門子。林陽子。招左元放。劉根。黃伯嚴。費長房。何女子。焦生。鮮卑。務塵。韓衆。任化子。鬼谷子。

淵哉郊間。懷寶採薪。媚茲伯陽。常道是蚤。俯翼遊周。攜手入秦。遺物執一。妙世頤神。思我元流。浩若無津。王喬淵嘿。遂志潛輝。遣形靈嶽。顧景亡歸。變彼有傅。與爾翻飛。承雲儵忽。飄飆紫微。元洛妙識。饑餌神穎。在陰儵逝。卽陽無景。逍遙北嶽。凌霄引領。揮霧昊天。合神自靖。孔某大聖。配天宏道。風扇元流。思探神寶。明發懷周。興言謨老。靈魄有行。言觀蒼昊。清歌先試。丹書有造。茫茫九疑。登暉太素。有漢登聞。神具爾顧。登彼靈丘。聿來載步。貽我則歌。永揚遐祚。大勝之娥。厥猶翼翼。降宮有和。納符帝側。揮杖指辰。絕音頌息。

在漢之衰。頽火炎精。梅公指景。有皇遺形。逝彼文辭。胥此洞庭。神輝絕景。豈外北冥。張招澄精。妙思元芒。則是神物。錯綜徽章。乃幽乃顯。若存若亡。因形則變。倏忽無方。左生清純。放情元味。在物淵沉。泝虛攸遂。清酒一壺。百朋具醉。有命集止。乘龍來萃。載見君子。言觀其蔚。劉根登嵩。遣世盤桓。形委服容。口厭瓊蘭。挹彼呼翁。爲爾朝餐。景絕巖穴。光茂雲端。伯嚴志道。翻飛自南。北食中嶽。練形嵩岑。奔星凌顏。朱光垂陰。雲精九口。握耀盈襟。長房有懷。承師問道。蒙險洪海。晞心元浩。將登蓬萊。祚爾難老。嘉命旣錫。如何勿考。逝矣何女。芳靈旣彫。安寢會邱。逝魂清霄。喪魄載營。大墓崇朝。玉趾再步。於焉逍遙。焦生卜居。在河之東。皓襟解帶。嘉卉結容。頤神太素。淑思元冲。在彼黃堂。明道固窮。北狄務塵。在彼沙漠。含神自頤。靜居有恪。自彼王庭。聿來伊洛。天子命之。載見紫閣。衛衆終化。靈毛揚葩。慎爾貞心。神社來荷。靡靡夷門。體道含真。殮茹靈卉。凌雲頤神。林陽餌車。明視聰耳。壯子旣淪。步晞千里。任化凱入。輕雲揮止。移形善變。載坐載起。悠悠鬼谷。永言潛止。要終有集。資生無始。綢繆方平。在彼二子。芬響蘭揮。有來盈耳。秀

孫興公聘士徐君墓頌

序有 ○ ○ 亦遂初之微言。亦清言本色。

晉南昌相太原縣君白漢故聘士徐君之靈。惟君風軌英邃。音徽遠播。餐仰芳流。宗揖在昔。古人有言。聞伯夷之風者。懦夫有立志。仰先生之道。豈無青雲之懷哉。余以不才。忝宰茲邑。遐宗有道。思揖遠風。乃與友人殷浩等。束帶靈墳。奉瞻祠宇。雖玉質幽潛。而目想令儀。雅音永寂。而心存高範。徘徊墟壠。仰眎松林。哀有形之短化。悼令德之長泯。撫然有感。悽然增傷。夫諷謠生於情託。雅頌興乎所欽。匪於詠述。孰寄斯

懷頌曰。

巖巖先生邁此英風。含真獨暢。心夷體沖。高蹈域表。淑問顯融。昂昂五賢。赫赫八俊。雖曰休明。或嬰險忝。豈若先生。保茲玉潤。超世作範。流光遐振。墳塋磊落。松竹蕭森。蒼叢蔚蔚。虛宇悒悒。遊獸戲阿。嚶鳥鳴林。嗟乎徐君。不聞其音。徘徊邱側。悽焉流襟。何以舒蘊。援翰託心。清深

江文通閩中草木頌十五首

有序○拓橋頌而大之拙語可思

僕一命之微。遭萬代之幸。不能鑄心礪骨。以報所事。擢翼驥首。自致丹梯。爰乃恭承嘉惠。守職閩中。且僕生人之樂。久已盡矣。所愛兩株樹。十莖草之間耳。今所鑿處。前峻山以蔽日。後幽晦以多阻。饑猿搜索。石瀨芟庭。下有故池。水常決。雖無魚梁釣臺。處處可坐。而葉饒冬榮。花有夏色。茲赤縣之東南乎。何其奇異也。結莖吐秀。數千餘類。心所憐者。十有五族焉。各爲一頌。以寫勞魂。

江南之山。連障造天。旣抱紫霞。亦漱絳煙。金荆嘉樹。涵雲宅仙。娉節詎及。幽意誰傳。

金荆

棘枝碧澗。臥根石

林。日月斷色。霧雨恆陰。綠秀八炤。丹實四臨。公子不至。山客徒尋。

思相

伊南有材。匪桂匪椒。下貫金壤。上籠

赤霄。盤薄廣結。捎瑟曾喬。七年乃識。非曰終朝。

豫章

異木之生。疑竹疑草。攢叢石逕。森蓰山道。煙岫相珍。雲

壑共寶。不華不緝。何避工巧。

枿

桐梓舊麗。松栝稱奇。焉如茲品。獨秀青崖。羣木斂望。雜草不窺。長入煙氣。

永參鸞螭。

杉

木貴冬榮。檀實寒色。停黛峯頂。插翠石側。碧葉菴藹。頰柯翕艷。方陋筠檟。遠笑荆棘。

檀

荔枝芳軼。木蘭懷蕤。挺實涵黃。糝丹鏡日。繡壑炤霞。綺巒爲我羽翼。委君玉盤。

楊梅

惟園有實。惟山有叢。丹

遊時至不採。爲子淹留。木蓮藥實靈品。爰乃輔性。却痾衛福。蠲邪養正。縹色外妍。金光內映。草經所珍。仙圖

是詠。石菖蒲。黃蓮上草。丹砂之次。禦孽辟妖。長靈久視。驂龍行天。馴鳳匝地。鴻飛以儀。順道則利。蓮華不可

炫。葉非足憐。微根儻餌。棄劍爲仙。黃金共壽。青牝爭年。君謂無妄。我驗衡山。薯蕷山。中杜若。嘉爾翠質。不奇

不俗。載華載實。同銜夕露。共炯朝日。夷陵無二。沈冥如一。杜若。桂以過列。廳以太芬。摧阻天壽。夭折人文。詎

及藿香。微馥微薰。攝靈百仞。養氣青雲。藿香。鬱伊多感。磊落表奇。字字洗鍊。江郎文境如是。

高伯恭徵士頌。此中有真意。

語無瑠瑑。詞必矜慎。故能以慤勝。

昔歲同徵。零落將盡。感逝懷人。作徵士頌。蓋止於應命者。其有命而不至。則闕焉。羣賢之行。舉其梗概矣。今著之於左。夫百王之御世也。莫不資仗羣才。以隆治道。故周文以多士克寧。漢武以得賢爲盛。此載籍之所記。由來之常義。魏自神廡以後。宇內平定。誅赫連積世之僭。掃窮髮不羈之寇。南摧江楚。西盪涼域。殊方之外。慕義而至。於是偃兵息甲。修立文學。登延雋造。酬咨政事。夢想賢哲。思遇其人。訪諸有司。以求明士。咸稱范陽盧元等四十二人。皆冠冕之胄。著問州邦。有羽儀之用。親發明詔。以徵元等。乃曠官以待之。懸爵以縻之。其就命三十五人。自餘依例。州郡所遣者。不可稱記。爾乃髦士盈朝。而濟濟之美興焉。昔與之俱蒙斯舉。或從容廊廟。或遊集私門。上談公務。下盡忻娛。以爲千載一時。始於此矣。日月推移。吉凶代謝。同徵之人。凋殲殆盡。在者數子。然復分張。往昔之忻。變爲悲戚。張仲業東臨營州。遲其還反。一敘於

懷齊衿於垂歿之年。寫情於桑榆之末。其不幸復至殞歿。在朝者皆後進之士。居里者非疇昔之人。進涉無寄心之所。出入無解顏之地。顧省形骸。所以永嘆而已。夫頌者美盛德之形容。亦可以長言寄意。不爲文二十年矣。然詞切於心。豈可默乎。遂爲之頌詞曰。

紫氣干霄。羣雄亂夏。王龔徂征。戎車屢駕。埽盪游氛。克剪妖霸。四海從風。八垠漸化。政教無外。旣寧且一。偃武寧兵。惟文是恤。帝乃旁求。搜賢舉逸。巖隱投竿。異人並出。壘壘虛生。量遠思純。鑽道據德。遊藝依仁。旌弓旣招。釋褐投巾。攝齊升堂。嘉謀日陳。自東徂南。躍馬馳輪。僭憑影附。劉以和親。茂祖癸單。夙罹不造。克己勉躬。聿隆家道。敦心六經。遊思文藻。終辭寵命。以之自保。燕常篤信。百行靡遺。位不苟進。任理栖遲。居冲守約。好讓善推。思賢樂古。如渴如饑。子翼致遠。道賜悟深。相期以義。相和若琴。並參幕府。俱發德音。優游卒歲。聊以寄心。祖根運會。克光厥猷。仰緣朝恩。俯因德友。功雖後建。祿實先受。班同舊臣。位並羣后。士衡狐立。內省靡疚。言不崇華。交不遺舊。以產則貧。論道則富。所謂伊人。實邦之秀。卓矣友規。秉茲淑量。存彼大方。擯此細讓。神與理冥。形隨流浪。雖屈王侯。莫廢其尙。趙實名區。世多奇士。山嶽所鍾。挺生三李。矯矯清風。抑抑容止。初九而潛。望雲而起。誥尹西都。靈惟作傅。垂訓王宮。載理雲霧。熙雖中天。迹階郎署。餘塵可挹。終亦顯著。仲業淵長。雅性清到。憲章古式。綢繆典誥。時值險難。常一其操。納衆以仁。訓下以孝。化彼龍川。民歸其教。邁則英賢。侃亦稱選。聞達邦家。名行素顯。志在兼濟。豈伊獨善。繩匠弗顧。功不獲展。劉許履忠。竭力致躬。出能聘說。入獻其功。輜軒一舉。撓燕下崇。名彰魏世。享業亦隆。道茂夙成。弱冠播名。與朋以信。行物以成。怡怡昆弟。穆穆家庭。發響九皋。翰飛紫冥。頻在省闈。亦司於京。刑以之中。政以之平。

華藻雲飛。金聲夙振。中遇沈苛。賦詩以訊。忠顯於辭。理出於韻。高滄朗達。默識淵通。領新悟異。發自心胸。質侔和璧。文炳雕龍。耀姿天邑。衣錦舊邦。士元先覺。介焉不惑。振袂來庭。始賓王國。蹈方履正。好是繩墨。淑人君子。其儀不忒。孔稱游夏。漢美淵雲。越哉百度。出類踰羣。司言祕閣。作牧河汾。移風易俗。理亂解紛。融彼滯義。渙此潛文。儒道以析。九流以分。崔宗二賢。誕性英偉。擢隸閭閻。聞名象魏。審審儀形。邈邈風氣。達而不矜。素而能資。潘符標尙。杜熙好和。清不潔流。渾不同波。絕希龍津。止分上科。幽而逾顯。損而逾多。張綱柔謙。叔術正直。道雅治聞。弼爲兼識。拔萃衡門。俱漸鴻翼。發憤忘食。豈要斗食。率禮從仁。罔愆於式。失不繫心。得不形色。郎苗始舉。用均已試。智足周身。言足爲治。性協於時。情敏於事。與今而同。與古曷異。物以利移。人以酒昏。侯生潔己。惟義是敦。日縱醇醪。逾敬逾溫。其在私室。如涉公門。季才之性。柔而執競。屈彼南秦。申威致命。誘之以權。矯之以正。帝道用光。邊士納慶。羣賢遭世。顯名有代。志竭其忠。才盡其槩。體襲朱裳。腰紐雙佩。榮曜當時。風高千載。君臣相遇。理實難偕。昔因朝名。與之克諧。披衿散想。解帶舒懷。此昕時昨。存亡奄乖。靜言思之。中心九摧。揮毫頌德。潛爾增哀。敏抑清怨。

陸士龍榮啓期贊○有遠勢雅辭。

榮啓期者。周時人也。值衰世之季末。當王道頽陵。遂隱居窮處。遺物求己。泝懷元妙之門。求意希微之域。天子不得而臣。諸侯不得而友。行年九十。被裘鼓琴而歌。孔子過之。問曰。先生何樂。答曰。吾樂甚外。天生萬物。惟人爲貴。吾得爲人矣。是一樂也。以男爲貴。吾又得爲男矣。是二樂也。或不免于襤褸。而吾行年九

十是三樂也。夫貧者士之常也。死固命之終也。居常待終。當何憂乎。孔子聽其音。爲之三日悲。常披裘帶索。行吟于路。曰。吾著裘者何求。帶索者何索。遂放之一邱。滅景榛藪。居真思樂之林。利涉忘憂之沼。以卒其天年。榮華溢世。不足以盈其心。萬物兼陳。不足以易其樂。絕景雲霄之表。濯志北溟之津。豈非天真至素。體正合和者哉。友人有圖其象者。命爲之贊。其辭曰。

芒芒至道。天啓德心。自昔逸民。遁志山林。邈矣先生。如龍之潛。夷明收察。滅迹在陰。傲世求己。遺物自欽。景遯瓊輝。響和絕音。戀彼邱園。研道之徵。思樂寒泉。薄探春蕤。鳴絃清泛。撫節高徽。有聖戾止。永言傷悲。天造草昧。負道寔嘉。於鑠先生。旣體斯和。熊羆作祥。黃髮皤皤。耽此三樂。遺彼世華。翼翼彼路。行吟以遊。的的黻冕。陋我輕裘。永脫亂世。受言一邱。媚茲常道。聊以忘憂。

夏侯孝若東方朔畫贊

有序〇〇

大夫諱朔。字曼倩。平原厭次人也。魏建安中。分厭次以爲樂陵郡。故又爲郡人焉。事漢武帝。漢書具載其事。先生瓌璋博達。思周變通。以爲濁世不可以富貴也。故薄游以取位。苟出不可以直道也。故頡頏以傲世。傲世不可以垂訓也。故正諫以明節。明節不可以久安也。故談諧以取容。潔其道而穢其迹。清其質而濁其文。弛張而不爲邪。進退而不離羣。若乃遠心曠度。瞻智宏材。倜儻博物。觸類多能。合變以明算。幽贊以知來。自三墳五典。八索九邱。陽陰圖緯之學。百家衆流之論。周給敏捷之辯。支離覆逆之數。經脉藥石之藝。射御書計之術。乃研精而究其理。不習而盡其功。經目而諷於口。過耳而闡於心。夫其明濟開豁。包含宏大。陵轢卿相。嘲哂豪傑。籠罩靡前。蹈藉貴勢。出不休顯。賤不憂戚。戲萬乘若寮友。視儔列如草芥。雄

僊神交造化。靈爲星辰。此又奇怪惚恍。不可備論者也。大人來守此國。僕自京都言歸定省。觀先生之縣邑。想先生之高風。徘徊路寢。見先生之遺像。逍遙城郭。觀先生之祠宇。慨然有懷。乃作頌焉。其辭曰。

矯矯先生。肥遯居貞。退不終否。進亦避榮。臨世濯足。希古振纓。湟而無滓。既濁能清。無滓伊何。高明克柔。能清伊何。視汚若浮。樂在必行。處淪罔憂。跨世陵時。遠蹈獨游。瞻望往代。爰想遐蹤。邈邈先生。其道猶龍。

染迹朝隱。和而不同。棲遲下位。聊以從容。我來自東。言適茲邑。敬問墟墳。企佇原隰。墟墓徒存。精靈永戢。民思其軌。祠宇斯立。徘徊寺寢。遺像在圖。周旋祠宇。庭序荒蕪。棟傾落草。萊弗除。肅肅先生。豈焉是居。是居弗形。悠悠我情。昔在有德。罔不遺靈。天秩有禮。神監孔明。彷彿風塵。用垂頌聲。選言尤雅。

郭景純山海經圖讚○○○語可觀。全乎莊生之旨。大語深語。奇精麗自成一家。

桂生南裔。拔萃岑嶺。廣莫熙葩。凌霜津穎。氣王百藥。森然雲挺。桂爰有奇樹。產自招搖。厥華流光。上映垂

霄。佩之不惑。潛有靈標。穀迷彗星橫天。鯨魚死浪。鵠鳴宇邑。賢士見放。厥理至微。言之無況。鳥鵠華嶽靈峻。削

成四方。爰有神女。是挹玉漿。其誰遊之。龍駕雲裳。太華鸞翔女牀。鳳出丹穴。拊翼相和。以應聖哲。擊石靡

詠。韶音其絕。鳥鸞鍾山之寶。爰有玉華。光彩流映。氣如虹霞。君子是佩。象德閑邪。瑾瑜嵒惟靈樹。爰生若木。

重根增駕。流光旁燭。食之靈化。榮名仙錄。木橋崑崙月精。水之靈府。惟帝下都。西老之宇。桀然中峙。號曰天

柱。崑崙肩吾得一。以處崑崙。開明是封。司帝之門。吐納靈氣。熊熊魂魂。神陸安得沙棠。制爲龍舟。汎彼滄

海。眇然遐遊。聊以逍遙。任波去留。沙棠天帝之女。蓬髮虎顏。穆王執贄。賦詩交歡。韻外之事。難以具言。西王母

先民有作。龜貝為貨。貴以文彩。賈以小大。簡則易資。犯而不過。文質則混沌。神則旁通。自然靈照。聽不以

聰。強為之名。曰惟帝江。帝江鳥飛以翼。當扈則鬚。廢多任少。沛然有餘。輪運于轂。至用在無。當駁惟馬類。實

畜之英。騰髦驥首。噓天雷鳴。氣無不凌。吞虎辟兵。駮物以感應。亦不數動。壯士挺劍。氣激白虹。鱗魚潛淵。

出則邑悚。鱗魚涸和損平。莫慘於憂。詩詠萱草。帶山則儵。壑焉遺岱。聊以盤遊。魚蹠實以足。排虛以羽。翹尾

翻飛。奇哉耳鼠。厥皮惟良。百毒是禦。鼠幽頰似猴。俾恐作智。觸物則笑。見人伴睡。好用小慧。終是嬰繫。幽頰

磁石吸鐵。瑋瑁取芥。氣有潛感。數亦冥會。物之相投。出乎意外。磁石狍鴉貪憊。其目在腋。食人未盡。還自齧

割。圖形妙鼎。是謂不若。鴉龍馮雲遊。騰蛇假霧。未若天馬。自然凌翥。有理懸運。天機潛御。天蚌則含珠。獸

胡不可。獬豸如豚。被褐懷禍。患難無絲。招之自我。獬豸狢狢之獸。見人伴眠。與災協氣。出則無年。此豈能為

歸之于天。狢狢治在得賢。亡由失人。衮衮之來。乃致狡賓。歸之冥應。誰見其津。被水圓四十。潛源溢沸。靈龜

爰處。掉尾養氣。莊生是感。揮竿傲貴。龜茫茫帝臺。維靈之貴。爰有石棋。五彩煥蔚。觴禱百神。以和天氣。帝

棋。山膏如豚。厥性好罵。黃棘是食。匪子匪化。雖無貞操。理同不嫁。山膏爰有嘉樹。厥名曰栢。薄言采之。

窈窕是服。君子維歡。家無反目。栢荀草赤實。厥狀如管。婦人服之。練色易顏。夏姬是艷。厥媚三遷。荀厥苞

橘櫛。奇者維甘。朱實金鮮。葉蒨翠藍。靈均是詠。以為美談。橘大駝之山。爰有萃草。青華白實。食之無夭。雖

不增齡。可以窮老。蠖維毒魁。鳩鳥是噉。拂翼鳴林。草瘁木慘。羽行隱翬。厥罰難犯。鳩岷山之精。上絡東

井。始出一勺。終致森冥。作紀南夏。天清地靜。岷青耕禦疫。跂踵降災。物之相反。各以氣來。見則民咨。實為

病媒。跂清冷之水。在乎山頂。耕父是游。流光灑景。黔首祀禁。以弭災眚。神耕。帝臺之水。飲蠲心病。靈府是

山來蟲爲蛇。三珠所生，赤水之際，翹葉柏棟，美壯若彗，濯彩丹波，自相霞映。三珠有人爰處，圓邱之上，赤蛇號爲魚。泉駐年，神木養命，稟此遐齡，悠悠無竟。不死雖云一氣呼吸，異道觀則俱見，食則皆飽，物形自周，造化非巧。三首羣籟舛吹，氣有萬殊，大人三丈，焦僂尺餘，混之一歸，此亦僑如。魚僂聖德廣被，物無不懷，爰乃殞落，封墓表哀，異類猶然，矧乃華黎。狄山帝堯葬于陰聚肉有眼，而無腸胃，與彼馬勃，頗相髣髴，奇在不盡，食之薄味。肉視策御飛龍，果儻九代，雲融是揮，玉璜是佩，對揚帝德，稟天靈誨。夏后啓品物流行，以散混沌，增不爲多，減不爲損，厥變難原，請尋其本。三身國彼姝者子，誰氏二女，曷爲水間，操魚持俎，厥儷安在，離羣逸處。女祭女戚十日並熯，女丑以斃，暴于山阿，揮袖自翳，彼美誰子，逢天之厲。女丑軒轅之人，承天之祐，冬不襲衣，夏不扇暑，猶氣之和，家爲彭祖。國軒轅飛黃奇駿，乘之難老，揣角輕騰，忽若龍矯，實鑒有德，乃集厥阜。黃乘萬物相傳，非子則根，無啓因心，構肉生魂，所以能然，尊形者存。無啓蒼四不多，此一不少，于野冥瞽，洞見無表，形遊逆旅，所貴維眇。一目神哉夸父，難以理尋，傾沙逐日，遞形鄧林，觸類而化，應無常心。夸父女子鮫人體，近蠶蚌，出珠匪甲，吐絲匪蛹，化出無方，物豈有種。歐絲牢悲海鳥，西子駭麋，或貴穴保，或尊裳衣，物我相傾，孰了是非。毛民狺狺之狀，形乍如犬，厥性識往，爲物警辨，以酒招災，自貽纓胃。狺狺崑崙之陽，鴻鷺之阿，爰有嘉穀，號曰木禾，匪植匪藝，自然靈播。木禾萬物暫見，人生如寄，不死之樹，壽蔽天地，請藥西姥，烏得如羿。不死醴泉睿木，養齡盡性，增氣之和，祛神之冥，何必生知，然後爲聖。甘水金精朱鬣，龍行駿跼，拾節鴻鷺，塵不及起，是謂吉黃，釋聖牖里。吉良怪獸五彩，尾參于身，矯足千里，儵忽若神，是謂騶虞，詩歎其仁。

虞子夜之尸體分成七離不為疏合不為密苟以神御形歸於一王子都廣之野珍怪所聚爰有羔穀鸞歌鳳舞后稷託終樂哉斯土都之廣野吹萬不同陽照陰蒸款冬之生擢穎堅冰物休所安焉知渙凝款冬車前之草別名芟芎王會之云其實如李名之相亂在乎疑似芟草皮之良草貴于麻用無不給服無不加至物在邇求之好遐麻萍之在水猶卉植地靡見其布漠爾鱗被物無常託孰知所寄萍

袁彥伯三國名臣序贊○意存風教伯仲士衡特堂宇遂狹耳

神彩壯於士衡

此論未然論尤勝特堂宇遂狹耳

夫百姓不能自治故立君以治之明君不能獨治則為臣以佐之然則三五迭隆歷世承基揖讓之與干戈文德之與武功莫不宗匠陶鈞而羣才緝熙元首經略而股肱肆力遭離不同跡有優劣至於體分冥固道契不墜風美所扇訓革千載其揆一也故二八升而唐朝盛伊呂用而湯武寧三賢進而小白興五臣顯而重耳霸中古陵遲斯道替矣居上者不以至公理物為下者必以私路期榮御圓者不以信誠率衆執方者必以權謀自顯於是君臣離而名教薄世多亂而時不治故籛甯以之卷舒柳下以之三黜接輿以之行歌魯連以之赴海衰世之中保持名節君臣相體若合符契則燕昭樂毅古之流也夫未遇伯樂則千載無一驥時值龍顏則當年控三傑漢之得材于斯為貴高祖雖不以道勝御物羣下得盡其忠蕭曹雖不以三代事主百姓不失其業靜亂庇人抑亦其次夫時方顛沛則顯不如隱萬物思治則默不如語是以古之君子不患宏道難遭時難遭時不難遇君難故有道無時孟子所以咨嗟有時無君賈生所以垂泣夫萬載一期有生之通途千載一遇賢智之嘉會遇之不能無欣喪之何能無慨古人之言信

予言絡繹
倘儼非常

世之心論時。則民方塗炭。計能則莫出魏武。故委面霸朝。豫議世事。舉才不以標鑒。故久之而後顯。籌畫不以要功。故事至而後定。雖亡身明順。識亦高矣。董卓之亂。神器遷偪。公達慨然。志在致命。由斯而談。故以大存名節。至如身爲漢隸。而跡入魏幕。源流趣舍。其亦文若之謂。所以存亡殊致。始終不同。將以文若旣明名教。有寄乎夫仁義不可不明。則時宗舉其致。生理不可不全。故達識舉其契。相與宏道。豈不遠哉。崔生高朗。折而不撓。所以策名魏武。執笏霸朝者。蓋以漢主當陽。魏后北面者哉。若乃一旦進璽。君臣易位。則崔子所不與。魏武所不容。夫江湖所以濟舟。亦所以覆舟。仁義所以全身。亦所以亡身。然而先賢玉擢于前來。哲攘袂於後。豈非天懷發中。而名教束物者乎。孔明盤桓俟時。而動遐想管樂。遠明風流。治國以禮。民無怨聲。刑罰不濫。沒有餘泣。雖古之遺愛。何以加茲。及其臨終。顧託受遺。作相。劉后授之。無疑心。武侯處之。無懼色。繼體納之。無貳情。百姓信之。無異辭。君臣之際。良可詠矣。公瑾卓爾。逸志不羣。總角料主。則素契於伯符。晚節曜奇。則參分於赤壁。惜其齡促。志未可量。子布佐策。致延譽之美。輟哭止哀。有翼戴之功。神情所述。豈徒蹇諤而已哉。然而杜門不用。登壇受譏。夫一人之身。所昭未異。而用舍之間。俄有不同。況沈跡溝壑。遇與不遇者乎。夫詩頌之作。有自來矣。或以吟詠性情。或以述德顯功。雖大旨同歸。所託或乖。若夫出處有道。名體不滯。風軌德音。爲世之範。不可廢也。故復撰序。所懷以爲之贊云。魏志九人。蜀志四人。吳志七人。荀彧字文若。諸葛亮字孔明。周瑜字公瑾。荀攸字公達。龍統字士元。張昭字子布。袁渙字曜卿。蔣琬字公琰。魯肅字子敬。崔琰字季珪。黃權字公衡。諸葛瑾字子瑜。徐邈字景山。陸遜字伯言。

陳羣字長文。顧雍字元歎。夏侯元字泰初。虞翻字仲翔。王經字承宗。陳泰字元伯。

火德既微。運纏大過。洪颺扇海。二溟揚波。虬虎雖驚。風雲未和。潛魚擇淵。高鳥候柯。赫赫三雄。並迴乾軸。競收杞梓。爭采松竹。鳳不及栖。龍不暇伏。谷無幽蘭。嶺無亭菊。英英文若。靈鑒洞照。應變知微。探賾賞要。日月在躬。隱之彌曜。文明映心。鑽之愈妙。滄海橫流。玉石同碎。達人兼善。廢己存愛。謀解時紛。功濟宇內。始救生人。終明風槩。公達潛朗。思同著蔡。運用無方。動攝羣會。爰初發跡。遭此顛沛。神情元定。處之彌泰。悵悵幕裏。算無不經。齊齊通韻。跡不整停。雖懷尺璧。顧哂連城。知能拯物。愚足全生。郎中溫雅。器識純素。貞而不諒。通而能固。恂恂德心。汪汪軌度。志成弱冠。道敷歲暮。仁者必勇。德亦有言。雖遇履虎。神氣恬然。行不修飾。名節無愆。操不激切。素風愈鮮。邈哉崔生。體正心直。天骨疏朗。牆宇高嶷。忠存軌跡。義形風色。思樹芳蘭。翦除荆棘。人惡其上。時不容哲。琅琅先生。雅杖名節。雖遇塵霧。猶振霜雪。運極道消。碎此明月。景山談誕。韻與道合。形氣不存。方寸海納。和而不同。通而不雜。遇醉忘辭。在醒貽答。長文通雅。義格終始。思戴元首。擬伊同恥。民未知德。懼若在己。嘉謀在庭。讜言盈耳。玉生雖麗。光不踰把。德積雖微。道映天下。淵哉泰初。宇量高雅。器範自然。標準無假。全身由直。迹洩必僞。處死非難。理存則易。萬物波蕩。孰任其累。六合徒廣。容身靡旣。君親自然。匪由名教。敬愛旣同。情理兼到。烈烈王生。知死不撓。求仁不遠。期在忠孝。元伯剛簡。大存名體。志在高構。增堂及陞。端委虎門。正言彌啓。臨危致命。盡其心禮。堂堂孔明。基宇宏邈。器同生民。獨稟先覺。標榜風流。遠明管樂。初九龍盤。雅志彌確。百六道喪。干戈迭用。苟非命世。孰掃雲霧。

豈曰模擬實在雅性亦既羈勒負荷時命推賢恭己久而可敬公衡仲達秉心淵塞媚茲一人臨難不惑
疇昔不造假翻鄰國進能徽音退不失德六合紛紜民心將變烏擇高梧臣須顧眄公瑾英達朗心獨見
披草求君定交一面桓桓魏武外託霸迹志掩衡霍恃戰忘敵卓卓若人曜奇赤壁三光參分宇宙暫隔
子布擅名遭世方擾撫翼桑梓息肩江表王略威夷吳魏同寶遂獻宏謨匡此霸道桓王之薨大業未純
把臂託孤惟賢與親輟哭止哀臨難忘身成此南而實由老臣才爲世出世亦須才得而能任貴在無猜
昂昂子敬拔跡草萊荷擔吐奇乃構雲臺子瑜都長體性純懿諫而不犯正而不毅將命公庭退忘私位
豈無鵲鶴固慎名器伯言蹇蹇以道佐世出能勤功入能獻替謀寧社稷解紛挫銳正以招疑忠而獲戾
元歎穆遠神和形檢如彼白圭質無塵玷立上以恆匡上以漸清不增潔濁不加染仲翔高亮性不和物
好是不羣折而不屈屢摧逆鱗直道受黜歎過孫陽放同賈屈洗洗衆賢千載一遇整轡高衢驥首天路
仰挹元流俯宏時務名節殊途雅致同趣日月麗天瞻之不墜仁義在躬用之不匱尙想重暉載挹載味
後生擊節懦夫增氣

江東著述推
崇吳賢處較詳

庾仲初虞舜像贊序

井措語
清折

夫至道元妙非器象所載靈化潛融非軌迹所傳故道資沖樸則謂之三皇德被羣生則號稱舜禹是以
先王因其會通制爲準極功極于天則配乎上帝法施于民則載在祀典然後名教彰于致治王道煥乎
無窮故茲堂之構也有自來矣然樹寢所以棲神而寢非神之所期立像所以表德而像非德之所存若

乃廢其軌景。洞其元真。雖冥照之鑑。獨朗天下。惡乎注耳目哉。遂乃顯圖靈像。廓其廟壇。俾天光焜于宇宙。南風散乎五絃。豈謂神道之妙。可寄于有涯哉。蓋亦暢悠悠之心者也。其辭曰。

元像焜耀。萬物之靈。飛龍在天。陽德文明。神道雖寂。務由機生。擁琴高詠。寄和五聲。元風既暢。妙盡無名。民鑒其朗。孰測窈冥。

戴安道閒遊贊

并序

神情散朗。當時之體。蕭疏是當時文體。

昔神人在上。輔其天理。知溟海之禽。不以籠樊服養。櫟散之質。不以斧斤致用。故能樹之于廣漠。棲之于江湖。戴之以大猷。覆之以元風。使夫淳樸之心。靜一之性。咸得就山澤。樂間曠。自此而箕嶺之下。始有間遊之人焉。降及黃綺。逮于臺尚。莫不有以保其太和。肆其天真者也。且夫巖嶺高。則雲霞之氣鮮。林藪深。則蕭瑟之音清。其可以藻元瑩素。庇其皓然者。舍是焉。故雖援世之彥。翼教之傑。放舞雩之發詠。聞乘桴而懷厲。況乎道乖方內。體絕風塵。理楫長謝。歌鳳逡巡。盪八疵于元流。澄雲崖而頤神者哉。然如山林之客。非徒逃人患。避爭門。諒所以翼順資和。滌除機心。容養淳淑。而自適者爾。況物莫不以適爲得。以足爲至。彼閑遊者。奚往而不適。奚待而不足。故蔭映巖流之際。偃息琴書之側。寄心松竹。取樂魚鳥。則澹泊之願。于是畢矣。然奇趣難均。元契罕遇。終古皆孤棲于一巖。獨玩于一流。苟有情而未忘。有感而無對。則輟斤寢絃之歎。固已幽結于林中。驟感于遐心。爲日久矣。我故遂求方外之美。略舉養和之具。爲雜贊八首。暢其所託。始興閒遊之遐逸。終感嘉契之難會。以廣一往之詠。以抒幽人之心云爾。

誰能高佚幽然一悟。

陶淵明讀史述九章○粹然以尙友之志發
在心之言高迥絕塵

此亦讚也重於所感故不云贊

余讀史記有所感而述之

二子讓國相將海隅天人革命絕景窮居采薇高歌慨想黃虞貞風淩俗爰感懦夫夷齊去鄉之感猶有遲

遲矧伊代謝觸物皆非哀哀箕子云胡能夷狡童之歌悽矣其悲箕子知人未易相知實難淡美初交利乖

歲寒管生稱心鮑叔必安奇情雙亮令名俱完鮑管遺生實難士爲知己望義如歸允伊二子程生揮劍懼

茲餘恥令德永聞百代見紀程杵恂恂舞雩莫曰匪賢俱映日月共餐至言慟由才難感爲情牽回也早天

賜獨長年七十二進德修業將以時如彼稷契孰不願之嗟乎二賢逢世多疑候詹寫志感鵬獻辭賈

豐孤隱穴以文自殘君子失時白首抱關巧行居災枝辨召患哀矣韓生竟死說難韓非易代隨時迷變則

愚介介若人特爲貞夫德不百年汚我詩書逝然不顧被褐幽居魯二遠哉長公蕭然何事世路多端皆

爲我異斂轡竭來獨養其志寢跡窮年誰知其意張長公

揚子雲酒箴○奇作意凡五轉
而後折落本旨

子猶瓶矣觀瓶之居居井之涓處高臨深動常近危酒醪不入口藏水滿懷不得左右牽于纏徽一旦害

礙爲嘗所軻身提黃泉骨肉爲泥自用如此不如鷗夷鷗夷滑稽腹大如壺晝日盛酒人復借酤常爲國

器託于屬車。出入兩宮。經營公家。繇是言之。酒何過乎。

裴逸民女史箴○是爲立言。理足。

膏不厭鮮。水不厭清。玉不厭潔。蘭不厭馨。爾形信直。影亦不曲。爾聲信清。響亦不濁。綠衣雖多。無貴于色。邪徑雖利。無尚于直。春華雖美。期于秋實。冰壁雖澤。期于見日。浴者振衣。沐者彈冠。人知正服。莫知行端。服美動目。行美動神。天道祐順。常與吉人。

江道載逸民箴○造句高奇。

至人應務。是統是營。乃制上下。以牧羣生。君位孰在。匪聖伊明。賢愚相奉。臣主以成。如彼百節。各役天形。率分委質。仰應一情。心膺有位。股肱有經。豈以處下爲戚。居上爲榮。各安其所。舉體用平。夫設爵列士。懸弓垂旌。卑尊之級。貴賤之名。匪以恣物之欲。實大猷而是經。處遁之士。奚眷于時。行矣先覺。捐俗長辭。明乎憂患。故超爾不疑。解髮靈崖。被褐絃絲。飄飄臺上。輕舉高之。穆穆二仲。攜策相期。盤幽隱寂。與物無治。凡厥後來。順乃所往。鑒茲俗累。戒于顛蕩。無殉外物。心煩技養。無棄恬曠。憂勤是掌。林人司箴。敢告善黨。

張平子綬笥銘○渾成。

南陽太守鮑德。有詔所賜。先公綬笥。傳世用之。時德更理。笥衡時爲德主簿。作銘曰。

懿矣茲笥。爰藏寶珍。冠纓組履。文章日信。皇用我賜。俾作帝臣。服其令服。鸞封艾緡。天祚明德。大賚福仁。垂光厥世。子孫克神。厥器維舊。中實維新。周公惟事。七涓有隣。

崔子玉座右銘○不朽之作。

無使名過實。守愚聖所臧。在涅貴不淄。曖曖内含光。柔弱生之徒。老氏誠剛強。行行鄙夫志。悠悠故難量。慎言節飲食。知足勝不祥。行之苟有恆。久久自芬芳。

蔡伯喈黃鉞銘

○渾健從尚書出

孝桓之季年。鮮卑入塞。鈔盜起匈奴。左部梁州。叛羌逼迫。兵誅淫衍。東夷高句麗。嗣子百固。逆謀並發。三垂騷然。爲國憂念。西府表橋公。昔在涼州。柔遠能邇。不煩軍師。而車師克定。及在上谷。漢陽。連在營郡。膺力方剛。明集士衆。徵拜度遼將軍。始受旄鉞。鉦鼓之任。扞禦三垂。公以吏士頻年在外。勤於犇命。人馬疲羸。撓鈍。請且息州營。橫發之役。以補困憊。朝廷許之。於是儲廩豐饒。室罄不懸。人逸馬畜。弓勁矢利。而經用省息。官有餘資。執事無放散之尤。簿書有進入之贏。治兵示威。戎士踊躍。旌旗耀日。金鼓雷奮。守有山嶽之固。攻有必克之勢。羌戎授首于西疆。百固冰散于東鄰。鮮卑收迹。烽燧不舉。眎事三年。馬不帶缺。弓不受彊。是用鏤石假象。作茲鉞軍鼓。陳之東階。以昭公文武之助焉。銘曰。

帝命將軍。秉茲黃鉞。威靈振耀。如火之烈。公之在位。羣狄斯柔。齊斧罔設。介士斯休。

蔡伯喈東鼎銘

○追琢之章

銘功之體。此最得之。

維建寧三年。秋八月丁丑。延公于玉堂前廷。乃詔曰。其以大鴻臚橋元爲司空。再拜稽首以讓。帝曰。俞往哉。三讓然後受命。公乃虔恭。夙夜帝采。勤施八方。旁作穆穆。以對揚天子丕顯休命。越在先民。毗於天子。

罔不著其股肱。畢其思心。式率天行。式昭德音。公亦克紹厥猷。鑒於法罔敢不法。憲於誠罔敢不誠。用總
是羣后保乂帝家。勛在方冊。民咸曰休哉。惟帝念功。越若來二月丁丑。遷於司徒。

蔡伯喈中鼎銘

○稍平實矣。

維建寧四年三月丁丑。延公登于玉堂前廷。乃制詔曰。其以司空橋元爲司徒。公拜稽首以讓。帝曰。俞往
哉。三讓然後受命。公允迪厥德。宣力肆勤。戰戰兢兢。以役帝事。率夫百辟。媚于天子。天子曰。都慎厥身。修
思永同寅。協恭以和。天衷德則昭之。違則塞之。回乃不敢不弼。枉乃不敢不匡。股肱之事。旣充。三事之繇
允備。災眚作見。乃引其責曰。凡庶微不若彝。倫不敘。是惟臣之職。祇以疾告表。越十月庚午。記此。

蔡伯喈西鼎銘

○變化三篇。遂自爲起訖。古人往往如此。

維光和元年冬十二月丁巳。延公入崇德殿前。乃制詔曰。其以光祿大夫元爲太尉。公拜稽首曰。臣聞之。
三讓莫或克從。臣不敢辭。臣犬馬齒七十。可以生。可以死。其戮力閑私。悉心在公。以盡爲臣之節。于時侍
從階。與聞公之昌言者。莫不惕厲。如履薄冰。旣乃碑表百代。

士孫瑞劍銘

○實健。

天生五才。金德惟剛。從革作辛。含景吐商。辨物利用。勛伐彌章。暨彼良工。歐冶干將。爰造寶劍。巨闕墨陽。
上通皓靈。獲茲休祥。剖山竭川。虹蜺消亡。昭威耀武。震動遐荒。楚以定霸。越以取強。

漢鏡銘

而明長保二親樂富昌壽敵金石如侯王

又

許氏作竟自有紀責龍白虎居左右聖人周公魯孔子作吏高遷車生耳郡舉孝廉州博士少不努力老
乃悔吉

卞蘭座右銘○緜密
鍛鍊

重階連棟必濁汝眞金寶滿堂將亂汝神厚味來殃艷色危身求高反墜務厚更貧閉情塞欲老氏所珍
周廟之銘仲尼是遵審慎汝口戒無失人從容順時和光同塵無謂冥漠人不汝聞無謂幽宵處獨若羣
不爲福先不與禍鄰守元執素無亂大倫常若臨深終始爲純

傅休奕擬金人銘作口銘○不事
椎斲

神以感通心由口宣福生有兆禍來有端情莫多妄口莫多言蟻孔潰河溜穴傾山病從口入禍從口出
存亡之機開闔之術口與心謀安危之源樞機之發榮辱存焉

鮑明遠藥奩銘○誅
麗

歲賈走丸生厭墮墻時無驟得年有遐方水玉出煙靈飛生光龜文電衣龍綵雲裳九芝八石延正盪斜
二脂六體振衰返華毛姬餌葉鳳子藏花景絕翠虬氣隱頰霞深神罕別妙奇不揚或繁虎杖或亂蛇牀
故不世不可以服未達不可以嘗眩睛逆目是乃爲良

鮑明遠石帆銘○不盡巧故
爲大方

應風剖流。息石橫波。下濼地軸。上獵星羅。吐湘引漢。歛蠡吞沱。西歷岷冢。北瀉淮河。眇森宏藹。積廣連深。淪天測際。巨海窮陰。雲旌未起。風柯不吟。崩濤山墜。鬱浪雷沉。在昔鴻荒。刊啓源陸。表裏民邦。經緯鳥服。瞻貞視悔。坎水巽木。乃剡乃鏟。旣劓旣斲。飛深浮遠。巢潭館谷。涉川之利。謂易則難。臨淵之戒。曰危則安。泊潛輕濟。冥表勤言。穆戎遂留。昭御不還。徒悲猿鶴。空駕滄烟。君子彼想。祇心載惕。林簡松栝。水採龍鷓。覘氣涉潮。投祭沈璧。揆檢含圖。命辰定歷。二嶠虎口。周王夙趨。九折羊腸。漢臣電驅。潛鱗浮翼。爭景乘虛。衡石頽鱗。帝子察殂。青山斷河。后父沉軀。川吏掌津。敢告訪途。

梁元帝梁安寺刹下銘

○徒事妍辭不必立意

阿閣峗竄。洞房窳窳。似靈光之金扇。類景福之銀鋪。垂琬琰之文璫。飾琅玕之仙寶。神童戾止。亟連翩于威鳳。薩埵來游。屢徘徊於紺馬。有識之所虔仰。無著之所招提。觀慧樓而下拜。望天街而興善。辭曰。塵沙無始。造色無先。飛蛾不息。縈蠶自纏。篋蛇未斷。藤鼠方緣。苦流長汎。愛火仍燃。髻珠孰曉。懷寶詎宣。挺茲靈覺。時惟天仙。真藉表聖。化乳稱權。寶刹千道。高翻四懸。鳳樓含日。龍臺吐煙。紫山翠羽。紅水青蓮。雪宮月殿。晨暉夜圓。宵長梵響。風遠鐘傳。仙衣有拂。靈刹無遷。

梁元帝漏刻銘

易

玉衡稱物。金壺博施。司南司火。未符茲義。帝曰。欽哉。納隍斯譬。實惟簡在。窮神體智。宮槐晚合。月桂宵暉。清臺莫爽。解谷皆依。七分六日。五紀三微。事齊幽贊。乃會通幾。碧海有乾。絳川猶竭。飛流五色。涓涓靡絕。龍首旁注。仙衣俯裂。箭不停晷。聲無暫輟。用天之貞。分地之平。如弦斯直。如渭斯清。

梁元帝東宮後堂仙室山銘入繼工而

太華削成本擅奇聲。峯如雪委。嶺若蓮生。雲除紫蓋。霞通赤城。金壇是錄。玉記題名。鳳依桐樹。鶴聽琴聲。殿接南箕。橋連北斗。秋河從帶。春禽銜綬。朱鳥安牕。青龍作牖。

庾慎之團扇銘○人意中語。故自大雅。

武王元覽造扇於前。班生瞻博。白綺仍傳。裁筠比霧。裂素輕蟬。片月內掩。重規外圓。炎隆火正。石鑠沙煎。清逾蘋末。瑩等寒泉。恩深難恃。愛極則遷。秋風颯至。篋筒長捐。勒銘華扇。敢薦夏筵。

庾子山秦州天水郡麥積崖佛龕銘○綺序有密。

麥積崖者。乃隴底之名山。河西之靈岳。高峯尋雲。深谷無景。方之鷲鳥。迹遁三禪。譬彼鶴鳴。虛飛六甲。鳥道乍窮。羊腸或斷。雲如鵬翼。忽已垂天。樹若桂華。翻能拂日。是以飛錫遙來。度杯遠至。疏山鑿洞。鬱爲淨土。拜燈王于石室。乃假馭風。禮花首于山龕。方資控鶴。大都督李允信者。藉于宿植。深悟法門。乃于壁之南崖。梯雲鑿道。奉爲亡父。造七佛龕。似刻浮檀。如攻水玉。從容滿月。照曜青蓮。影現須彌。香聞忉利。如斯塵野。還開說法之堂。猶彼香山。更對安居之刹。昔者如來。追福有報。恩之經。菩薩去家。有思親之供。敢緣斯義。乃作銘曰。

鎮地鬱盤。基乾峻極。石關十上。銅梁九息。百仞崖橫。千尋松直。陰兔假道。陽鳥迴翼。載輦疏山。穿龕架嶺。糾紛星漢。迴旋光景。壁累經文。龕重佛影。彫輪月殿。刻鏡花堂。橫鑄石壁。閤鑿山梁。雷乘法鼓。樹積天香。嗽泉珉谷。吹塵石牀。集靈真館。藏仙冊府。芝洞秋房。檀林春乳。冰谷銀沙。山樓石柱。異嶺共雲。同峯別雨。

冀城餘俗。河西舊風。水聲幽咽。山勢崆峒。法雲常住。慧日無窮。方域芥盡。不變天宮。

庾子山東宮行雨山銘綱

矣。纖

山名行雨。地異陽臺。佳人無數。神女羞來。翠幔朝開。新粧旦起。樹入牀頭。花來鏡裏。草綠衫同。花紅面似。開年寒盡。正月遊春。俱除錦帔。併脫紅綸。天絲劇藕。蝶粉多塵。橫藤礙路。垂柳低人。誰言洛浦。一箇河神。

庾子山東宮玉帳山銘清

麗。

玉帳寥廓。崑山抵鵲。總葉成帷。連珠起幕。玉蕊難移。金花不落。隱士彈琴。仙人看博。巖留舊鼎。竈聚新荆。煮石初爛。燒丹欲成。桑田屢變。海水頻盈。長聞鳳曲。永聽簫聲。

庾子山至仁山銘尙有

拙致。

峯橫鶴嶺。水學龍津。瑞雲一片。仙童兩人。三秋雲薄。九日寒新。眞花暫落。畫樹常春。橫石臨砌。飛簷枕嶺。壁繞藤苗。窗銜竹影。菊落秋潭。桐疎寒井。仁者可樂。將由愛靜。

庾子山望美人山銘秀

句。

高唐礙雨。洛浦無舟。何處相望。山邊一樓。峯因五婦。石是三侯。嶮踰地肺。危陵天柱。禁苑斜通。春人常聚。樹裏聞歌。枝中見舞。恰對粧臺。諸窗晝開。斜看已識。直喚便迴。豈同織女。非秋不來。

庾子山明月山銘賦

小

竹亭標嶽。四面臨虛。山危簷迴。葉落窗疎。看椽有笛。對樹無風。風生石洞。雲出山根。霜朝唳鶴。秋夜鳴猿。堤梁似堰。野路疑村。船橫埭下。樹夾津門。寧殊華蓋。詎識桃源。

崔子玉草書勢○非索靖一輩不足語此。

書契之興始自頡皇。寫彼鳥跡以定文章。爰暨末葉典籍彌繁。時之多僻。政之多權。官事荒蕪。勦其墨翰。惟作佐隸。舊字是刪。草書之法益又簡略。應時諭指。用於卒迫。兼功並用。愛日省力。純儉之變。豈必古式。觀其法象。俯仰有儀。方不中矩。員不副規。抑左揚右。望之若崎。竦企鳥跂。志在飛移。狡獸暴駭。將奔未馳。或踟駐點。點狀似連珠。絕而不離。畜怒怫鬱。放逸生奇。或凌邃惴慄。若據高臨危。旁點邪附。似蝸蟻揭枝。絕筆收勢。餘縈糾結。若杜伯捷毒。綠蠟騰蛇。赴穴頭沒。尾垂是故遠而望之。隴焉若沮岑崩崖。就而察之一畫不可移。機微要妙。臨時從宜。略舉不較。髣髴若斯。

蔡伯喈篆勢○非祇小篆。殆為大篆古。文言。古文苑祇十句。

鳥遺跡蒼頡循。聖作則制斯文。體有六篆。為真形要妙。巧入神。或龜文鉞列。櫛比龍鱗。紆體放尾。長短復身。頰若黍稷之垂穎。蘊若蟲蛇之棼縕。揚波振擊。鷹峙鳥震。延頸脅翼。勢似凌雲。或輕舉內投。微本濃末。若絕若連。似水露緣絲。凝垂下端。從者如懸。衡者如編。抄者邪趣。不方不圓。若行若飛。跂跂翾翾。遠而望之。象鴻鵠羣遊。絡繹遷延。迫而視之。端際不可得見。指揮不可勝原。研桑不能數其詰屈。離婁不能覩其卻間。般倕揖讓而辭巧。籀誦拱手而韜翰。處篇籍之首目。粲彬彬其可觀。擿華艷於紈素。為學藝之範先。嘉文德之宏懿。蘊作者之莫刊。思字體之俯仰。舉大較而論旃。

蔡伯喈隸勢○所謂如數家珍。

鳥跡之變。乃惟佐隸。蠲彼繁文。崇此簡易。厥用既宏。體象有度。奐若星陳。鬱若雲布。其大徑尋。細不容髮。

隨事從宜。靡有常制。或穹窿恢廓。或櫛比鍼列。或砥平繩直。或蜿蜒繆戾。或長邪角趣。或規旋矩折。修短相副。異體同勢。奮筆輕舉。離而不絕。纖波濃點。錯落其間。若鐘虞設張。庭燎飛煙。嶄富巖嵯。高下屬連。似崇臺重宇。層雲冠山。遠而望之。若飛龍在天。近而察之。心亂目眩。奇姿譎誕。不可勝原。研桑所不能計。辛賜所不能言。何草篆之足算。而斯文之未宣。豈體大之難覩。將祕奧之不傳。聊俯仰而詳觀。舉大較而論旃。

衛巨山字勢

謂古汲郡冢中古文。讀此如見文。

黃帝之史。沮誦倉頡。眺彼鳥跡。始作書契。紀綱萬事。垂法立制。帝典用宣。質文著世。爰暨暴秦。滔天作戾。大道既泯。古文亦滅。魏文好古。世傳邱墳。歷代莫發。真僞靡分。大晉開元。宏道敷訓。天垂其象。地耀其文。其文乃耀。粲矣其章。因聲會意。類物有方。日處君而盈其度。月執臣而虧其旁。雲委蛇而上布。星離離以舒光。禾卉萃尊以垂穎。山嶽峨嵯而連岡。蟲跂跂以若動。鳥似飛而未揚。觀其錯筆綴墨。用心精專。勢和體均。發止無間。或守正循檢。矩折規旋。或方圓靡則。因事制權。其曲如弓。其直如弦。矯然特出。若龍騰于川。森爾下頽。若雨墜于天。或引筆奮力。若鴻雁高飛。邈邈翩翩。或縱肆阿部。若流蘇懸羽。靡靡綿綿。是故遠而望之。若翔風厲水。清波漪漣。就而察之。有若自然。信黃唐之遺跡。爲六藝之範先。籀篆蓋其子孫。草隸乃其曾元。觀物象以致思。非言詞之所宣。

成公子安隸書體

八分與隸。晉代已相出入。近來以有波發無波發別之。亦恐不盡然。但賢于割八之說。

假墨抵押毫芒。彪煥礫落。形體抑揚。芬葩連屬。溢分羅行。爛若天文之布耀。蔚若錦繡之有章。或輕拂徐振。緩案急挑。挽橫引從。左牽右繞。長波鬱拂。微勢縹緲。二巧難傳。善之者少。應心應手。必繇意曉。爾乃動纖指。舉弱腕。握素紉。染元翰。彤管電流。雨下雹散。點點折忱。掣挫安案。繽紛駱驛。華藻粲爛。縑網卓犖。一何壯觀。繁縟成文。又何可玩。章周道之郁郁。表唐虞之輝煥。若乃八分璽法。殊好異制。分白賦黑。碁布星列。翹首舉尾。直刺邪掣。繾綣結體。剩彩奮節。或若虬龍盤游。蜿蟬軒翥。鸞鳳翱翔。矯翼欲去。或若鷺鳥將擊。并體抑怒。良馬騰驤。奔放向路。仰而望之。鬱若宵霧。朝升游煙。連雲俯而察之。凜若秋風。厲水漪瀾。成文垂象。表式有模。有楷。形功難詳。聊舉大體。

鮑明遠飛白書勢

此體
遂絕

秋毫精勁。霜素凝鮮。審此瑤波。染彼松煙。超工八法。盡奇六文。鳥企龍躍。珠解泉分。輕如游霧。重似崩雲。絕峯劍摧。驚勢箭飛。差池鷺起。振迅鴻歸。臨危制節。中險騰機。圭角星芒。明麗爛逸。絲縈髮垂。平理端密。盈尺錦兩。片字金溢。故仙芝煩弱。既匪足雙。蟲虎瑣碎。又安能匹。君子品之。是最神筆。

駢體文鈔卷二十三

【碑記類】

漢修西嶽廟記一作碑○○○

醇質近先秦

山經曰。秦華之山。削成四方。其高五千仞。廣十里。周禮職方氏。華謂之西嶽。祭視三公者。以其能興雲雨。產萬物。通精氣。有益於人。則祀之。故帝舜受堯歷數。親自巡省。設五鼎之奠。升柴燎煙。致敬神祇。又用昭明。百穀繁殖。黎民時雍。鳥獸率舞。鳳皇來儀。暨夏殷周。未之有改也。其德休明。則有禎祥。荒淫臊穢。篤災必降。秦違其典。璧遺鄠池。二世以亡。高祖應運。禮遵陶唐。祭則獲福。奕世克昌。亡新滔逆。鬼神不享。建武之初。彗掃頑凶。更率舊章。敢用元牲。牲怪必充。天惟醇祐。萬國以康。光和二年。有漢元舅。五侯之冑。謝陽之孫。曰樊府君。諱毅。字仲德。承考讓國。家于河南。究職州郡。辟公府。除防東長中都令。誅強醜。撫瘠民。二鄙以清。命守斯邦。威隆秋霜。恩踰冬日。景化既宣。由復夕惕。惟窺祿之報。順民之則。孟冬十月。齊祀西嶽。以傳窄狹。不足處尊卑。廟舍舊久。牆屋傾亞。世室不修。春秋作譏。特部行事。苟班與縣令。先黨以漸補治。設中外館。圖珍奇。畫怪獸。嶽瀆之精。所出禎秀。役不干時。而功已著。暨勞久逸。神永有憑。自古太山。邱邑猶存。五嶽尊同。哀此勤民。獨不賴福。乃上復十里內。工商嚴賦。克厭帝心。嘉瑞仍奮。風雨應卦。澱潤品物。君舉必書。況乃盛德。惠及神人。可無述焉。於是功曹郭敏。主簿魏襲。戶曹史許禮等。遂刊元石。銘勒鴻勛。

垂曜靈軫。存有昭識。其辭曰。二儀剖判。清濁始分。陽凝成山。陰積爲川。泰氣推否。洪波況臻。堯命伯禹。決江開汶。川靈既定。恩覆兆民。乃刊祀典。辨于羣神。因瀆祭地。嶽以配天。世主遵循。永享歷年。赤銳煌煌。受茲介福。京夏密清。殊俗賓服。令問不違。可謂至德。德音孔昭。實惟我后。出自中興。大漢之舅。本枝惟百。延慶長久。俾守西嶽。達奉神祀。改傳飾廟。靈有攸齊。降瑞會祚。景風凱悌。惟風及雨。成我稷黍。稽民用章。建父室宇。刊銘記誦。克配梁甫。如玉在璞

張昶西嶽華山堂闕碑銘○

易曰。天地定位。山澤通氣。然山莫尊於嶽。川莫盛於瀆。山嶽有五。而華居其一。瀆有四。而河在其數。其靈也至矣。聖人廢興。必有其應。故岱山石立。中宗繼統。太華授璧。秦胡絕緒。白魚入舟。姬武建業。寶珪出水。子朝喪位。布五方則處其西。列三條則居其中。若廣袤奇蟲。山經有紀矣。是以帝王巡狩。親五嶽而告至。覲方后而考禮。故經有望秩之禋。典有生殖之祀。蓋所以崇山川而報功也。四海一統。天子秉其禮。諸侯立政。彊國攝其祭。奉其邑曰華陰也。久矣。乃紀於禹貢。而分秦晉之境。奉鄙晉之西。則曰陰晉。邊秦之東。則曰寧秦。邑旣遷徙。禮亦如之。二國力爭。以奉以祭。其城險固。基趾猶存。故老之言。未殞於民也。逮至大漢。受命克亂。不愆不忘。舊名是復。率禮不越。故祀是尊。歷葉增修。虔恭又備。一禱三祀。終歲而四。以迄于今。而世宗又經集靈之宮於其下。想喬松之疇。是遊是憩。郡國方士。自遠而至者。充巖塞崖。鄉邑巫覡。宗祀乎其中者。盈谷溢谿。咸有浮飄之志。愉悅之色。必雲霄之路。可升而越。果繁昌之福。可降而致也。故殖

鎮遠將軍領北地太守闔鄉亭侯段君諱煨字忠明自武威占此土憑託河華二靈是與故能以昭烈之德享上將之尊銜命持重屯斯寄國討叛柔服威懷是示羣凶既除郡縣集寧家給人足戶有樂生之歡朝釋西顧之慮而懷關中之恃雖昔蕭相輔佐之功功冠羣后弗以加也遂解甲休士陣而不戰以逸其力修飾享廟壇場之位荒而復辟禮廢而復興又造祠堂表以參闕建神路之端首觀壯麗乎孔徹然後旅祀祈請既有常處雖雨露衣而禮不廢於是邑之士女咸曰宜之乃建碑刻石垂示後裔其辭曰於穆堂闕堂闕昭明經之營之不日而成匪奢匪儉惟德是程匪豐匪約惟禮是榮虔恭禮祀黍稷芬香神具醉止降福穰穰語致跌蕩若素波之淪漣

王延壽桐柏廟碑○

延熹六年正月八日乙酉南陽太守中山盧奴張君處正好禮尊神敬祀以淮出平氏始於大復潛行地中見於陽口立廟桐柏春秋宗奉災異告譴水旱請求位比諸侯聖漢所尊受珪上帝太常定甲郡守奉祀務潔沈祭從郭君以來二十餘年不復身到遣行承事簡略不敬明神弗歆災害以生五嶽四瀆與天合德仲尼慎祭常若神在君準則大聖親之桐柏奉見廟祠崎嶇逼狹開拓神門立闕四達增廣壇場飾治華蓋高大殿宇穹齊傳館石獸表道靈龜十四衢庭宏敞宮廟高峻祇慎慶祀一年再至躬進牲牷執玉以沈爲民祈福靈祇報祐天地清和異祥昭格禽獸碩茂草木芬芳黎庶預祉民用作頌其辭曰
泝泝淮源聖禹所導湯湯其逝惟海是造疏穢濟遠柔順其道弱而能強仁而能武聖賢立式明哲所取

定爲四瀆。與河合矩。烈烈明府。好古之則。虔恭禮祀。不愆其德。惟前廢弛。匪恭匪力。災眚以興。陰陽以忒。陟彼高岡。臻茲廟側。肅肅其敬。靈祇降福。雍雍其和。民用悅服。穰穰其慶。年穀豐植。望君輿駕。扶老攜集。慕君塵軌。奔走忘食。懷君惠貺。思君罔極。于胥樂兮。傳於萬億。溫潤

漢成陽靈臺碑

○彌拙

惟帝堯母昔者慶都兆含穹精。氏姓曰伊。體蘭石之操。履規矩之度。則乾《》之象。通三光之曜。游觀河濱。感赤龍交如生堯。厥後堯求祖統。慶都告以河龍。堯歷三河。有龍授圖。躬行聖政。以育苗萌。火陽之盛。先闡後明。遂以侯伯。迹踐帝宮。慶都僊歿。蓋葬于茲。欲人莫知。名曰靈臺。上立黃屋。堯所奉祠。下營以水。神龍所烹。靈龜隱刑。汾涌波流。比目鯢魚。擢鱗通泉。元礫菟蘆。生莖臺涯。貫長歷久。崇如□□。三代改易。荒廢不修。五蓮精還。漢受濡期。興威繼絕。如堯爲之。承祠基年。鯢魚復生。故有靈臺。嗇夫魚陟。衛仕驛憲。鯢魚服之。莖壽□□之際。道小衰沮。遂遭亡新。禮祠絕矣。於是故廷尉仲定。深惟大漢隆盛。德被四表。大平未至。靈瑞未下。四夷數侵。軍甲數擾。匪皇啓居。日禩不夏。案經考典。河洛祕奧。漢感赤龍。堯之苗冑。當修堯祠。追遠復舊。復治黃屋。推原聖意。災生變見。天以譴告。前後奏上。陳敍大義。招祥塞咎。爲漢來祚。朝廷克省。帝納其謀。歲以春秋。奉大牢祠。時廷尉選位。連自表奏。詔莢嘉命。遂見聽□□爲大中大夫。歸治黃壘。令月吉日。圖立規塋。興業會工。厥處夷平。上合天意。下應□□□□。飭五色華精。上闕通天。戶嚮少陽。前設大壘。俟神之堂。地致石壇。其下清涼。可舞八□。以□大章。時濟陰太守魏郡審冕。成陽令博陵菅

靈甘雨時降。百穀孰成。幽荒率服。徐方來庭。萬國蒙祉。黎元賴榮。莫不被德。咸歌頌聲。其辭曰。於赫慶都。德壘大兮。承神精燿。統赤裔兮。爰生聖堯。名蓋世兮。上受苻命。迷帝制兮。廣被之恩。流荒外兮。歷紀盈千。垂遺愛兮。陵廟復崇。享大祭兮。上來多怙。降福沛兮。萬國禱寧。孰不賴兮。光宣美助。永□幣兮。垂視罔極。億萬歲兮。濟陰太守。魏郡陰安。審君諱晃。字元讓。從公車令來。成陽令博陵。蓋吾菅君諱遵。字君臺。從東明門司馬來。丞潁川新汲尹茂。字伯舉。遷下邳尉。潁川襄城楊調。字君舉。仲訢伯海。從右中郎將。遷鉅鹿太守。仲球伯儀。從太尉掾。遷呂長。仲選孟高。辟司徒府。遷徙不絕。皆興治大聖黃屋之力。蔡伯喈陳留東昏庫上里社碑。○劉彥和云。理扶質以立幹。魏晉而後。絕不見此體矣。

佳在無飾辭。

社祀之建。尚矣。昔在聖帝。有五行之官。而共工子句龍爲后土。及其末也。遂爲社祀。故曰。社者。土地之主也。周禮建爲社位。左宗廟。右社稷。戎醜攸行。於是受脤。土膏恆動。于是祈農。又頒之于兆民。春秋之中。命之供祠。故自有國。至于黎庶。莫不祀焉。惟斯庫上里。古陽武之戶牖鄉也。秦時有池子華爲丞相。漢興。陳平由此社宰。遂佐高帝。克定天下。爲右丞相。封曲逆侯。孝平之世。虞延爲太尉。司空。封公。至延熹。延弟曾孫放。字子卿。爲尚書令。外戚梁冀。乘寵作亂。首策誅之。王室以績。封呂都亭侯。太僕太常。司空。毗天子。而維四方。克措其功。往烈有常。于是司監。爰暨邦人。僉以爲宰相。繼踵。咸出斯里。秦一漢三。而虞氏世焉。雖有積善之慶。修身之致。亦斯社之所相也。乃相與樹碑作頌。以示後昆云。

唯王建祀。明事百神。乃顧斯社。于我兆民。明德惟馨。其慶聿彰。自嬴及漢。四輔代昌。爰我虞宗。乃世重光。元勳既立。錫茲土疆。乃公乃侯。帝載用康。神人協祚。且巨且長。凡我里人。盡受嘉祥。刊銘金石。永世不忘。

王仲宣荊州文學記

雖亦成章斐然。而氣已茶矣。

有漢荊州牧劉君。稽古若時。將紹厥績。乃曰。先王之爲世也。則象天地。軌儀憲極。設教導化。敍經志業。用建雍泮焉。立師保焉。作爲禮樂。以作其性。表陳載籍。以持其德。上知所以臨下。下知所以事上。官不失守。民聽無悖。然後大階平焉。夫文學也者。人倫之守。大教之本也。乃命五業從事。宋衷所作文學。延朋徒焉。宣德音以贊之。降嘉禮以勸之。五載之間。道化大行。耆德故老。綦毋闔等。負書荷器。自遠而至者。三百有餘人。於是童幼猛進。武人革面。總角佩觿。委介免冑。比肩繼踵。川遊泉涌。疊疊如也。兢兢如也。遂訓六經。講禮物。諧八音。協律呂。修紀歷。理刑法。六路咸秩。百氏備矣。

天降純嘏。有所底授。臻於我君。受命既茂。南牧是建。荆衡作守。時邁淳德。宣其丕繇。厥繇伊何。四國交阻。乃赫斯威。爰整其旅。虔夷不若。履戡寇侮。誕啓洪軌。敦崇聖緒。典墳既章。禮樂咸舉。濟濟縉紳。盛茲階宇。祁祁髦俊。亦集爰處。和化普暢。休徵時敍。品物宣育。百穀繁蕪。勳格皇穹。聲被四宇。

聞人牟準衛敬侯碑陰文

韻語古法。句格亦傳。季友任彥昇所祖。

敬侯所葬之先域。城惟解梁。地卽郟首。山對靈足。谷當猗口。勢高而趣幽。形垣而背阜。鑿室而可以蔽藏。不墳而所冀速朽。珍琦素白。而靡尙。衣服隨時。而則有故。吏述德於隧前。門生紀言於碑後。白季居亭而

上尊號奏及受禪石表文並在許繁昌尊號奏鍾元常書受禪表覬並金針八分書也太祖文帝等臨詔令雜駁議上封事一百餘條誠子等散在人間及碑石可見樹碑人郡國縣道姓名具如于後

晉造戾陵遏記○紀遏制度使千載下如見所謂有用之文

魏使持節都督河北道諸軍事征北將軍建城鄉侯沛國劉靖字文恭登梁山以觀源流相潔水以度形勢嘉武安之通渠羨秦氏之殷富乃使帳下督丁鴻軍士千人以嘉平二年立遏於水導高梁河造戾陵遏開車箱渠其遏表云高梁河者出自并州潞河之別源也長岸峻固直截中流積石籠以爲主遏高一丈東西長三十十當丈南北廣七十餘步依北岸立水門門廣四丈立水十丈山水暴發則乘遏東下平流守常則自門北入灌田歲二千頃凡所封地百餘萬畝至景元三年辛酉詔書以民食轉廣陸廢不贖遺謁者樊晨更制水門限田千頃刻地四千三百一十六頃出給郡縣改定田五千九百三十頃水流乘車箱渠自薊西北逕昌平平東盡漁陽潞縣凡所潤含四五百里所灌田萬有餘頃高下孔齊原隰底平疏之斯溉決之斯散導渠口以爲濤門灑瀆池以爲甘澤施加于當時敷被于後世晉元康四年君少子驍騎將軍平鄉侯宏受命使持節監幽州諸軍事領護烏丸校尉寧朔將軍遏立積三十六載至五年夏六月洪水暴出毀損四分之三剩北岸七十餘丈上渠車箱所在漫溢追惟前立遏之勳親臨山川指授規略命司馬關內侯逢暉內外將士二千人起長岸立石渠修主遏治水門門廣四丈立水五尺興復載利通塞之宜準遵舊制凡用功四萬有餘焉諸部王侯不召而自至緘負而趨事者蓋數千人詩載經始勿

亟。易稱民忘其勞。斯之謂乎。于是二府文武之士。感秦國思鄭渠之績。魏人置豹祀之義。乃遐慕仁政。追述成功。元康五年十月十一日。刊石立表。以紀勳烈。并記遐制度。永爲後式焉。

王簡棲頭陀寺碑。

○辭不汎濫。漢魏義法未淪。名理之言。出以回薄。紀敘之體。貫以乎遠。此爲南朝有數名篇。活灑唐初。何能青勝。

蓋聞挹朝夕之池者。無以測其淺深。仰蒼蒼之色者。不足知其遠近。况視聽之外。若存若亡。心行之表。不生不滅者哉。是以掩室摩竭。用啓息言之津。杜口毗邪。以通得意之路。然語彜倫者。必求宗於九疇。談陰陽者。亦研幾於六位。是故三才旣辨。識妙物之功。萬象已陳。悟太極之致。言之不可以已。其在茲乎。然爰繫所筌。窮於此域。則稱謂所絕。形乎彼岸矣。彼岸者。引之於有。則高謝四流。推之於無。則俯宏六度。名言不得。其性相隨。迎不見其終始。不可以學地知。不可以意生及。其涅槃之蘊也。夫幽谷無私。有至斯響。洪鐘虛受。無來不應。況法身圓對。規矩冥立。一音稱物。宮商潛運。是以如來利見。迦維託生。王室憑五行之軾。拯溺逝川。開八正之門。大庇交喪。於是元關幽鍵。感而遂通。遙源濬波。酌而不竭。行不捨之檀。而施治羣。有唱無緣之慈。而澤周萬物。演勿照之明。而鑒窮沙界。導亡機之權。而功濟塵劫。時義遠矣。能事畢矣。然後拂衣雙樹。脫屣金沙。惟恍惟惚。不皦不昧。莫繫於去來。復歸於無物。因斯而談。則棲遑大千。無爲之寂。不撓焚燎。堅林不盡之靈。無歇大矣哉。正法旣沒。象教陵夷。穿鑿異端者。以違方爲得一。順非辯僞者。比微言於目論。於是馬鳴幽讚。龍樹虛求。並振頽綱。俱維絕紐。蔭法雲於真際。則火宅晨涼。曜慧日於康衢。則重昏夜曉。故能使三十七品。有樽俎之師。九十六種。無藩籬之固。旣而方廣東被。教肆南移。周魯二

眺城邑百雉紆餘東望平皋千里超忽信楚都之勝地也宗法師行潔珪璧擁錫來游以爲宅生者緣業空則緣廢存軀者惑理勝則惑亡遂欲捨百齡於中身殉肌膚於猛鷲班荆蔭松者久之宋大明五年始立方丈茅茨以庇經象後軍長史江夏內史會稽孔府君諱覬爲之薙草開林治經行之室安西將軍郢州刺史江安伯濟陽蔡使君諱興宗復爲崇基表刹立禪誦之堂焉以法師景行大迦葉故以頭陀爲稱首後有僧勤法師貞節苦心求仁養志纂修堂宇未就而沒高軌難追藏舟易遠僧徒闕其無人椽椽毀而莫構可爲長太息矣惟齊繼五帝洪名紐三王絕業祖武宗文之德昭升嚴配格天光表之功宏啓興復是以惟新舊物康濟多難步中雅頌驟合韶濩炎區九譯沙塲一候粵在於建武焉乃詔西中郎將郢州刺史江夏王觀政藩維樹風江漢擇方城之令典酌龜蒙之故實故肅刑清於是乎在寧遠將軍長史江夏內史行事彭城劉府君諱誼智刃所遊日新月故道勝之韻虛往實歸以此寺業廢於已安功墜於幾立慨深覆篲悲同棄井因百姓之有餘間天下之無事庀徒揆日各有司存於是民以悅來工以心競互邱被陵因高就遠層軒延袤上出雲霓飛閣逶迤下臨無地夕露爲珠網朝霞爲丹牖九衢之草千計四照之花萬品崖谷共清風泉相渙金姿寶相永藉閒安息心了義終焉游集法師釋曇珍業行淳修理懷淵遠今屈知寺任永奉神居夫民勞事功旣鏤文於鐘鼎言時稱伐亦樹碑於宗廟世彌積而功宣身愈遠而名劬敢寓言於彫篆庶髣髴乎衆妙辭曰

銘詞
秀出

質判元黃氣分清濁涉器千名含靈萬族淳源上派澆風下黷愛流成海情塵爲岳皇矣能仁撫期命世

乃睠中土。聿來迦衛。奄有大千。遂荒三界。殷鑒四門。幽求六歲。亦旣成德。妙盡無爲。帝獻方石。天開淥池。祥河輟水。寶樹低枝。通莊九折。安步三危。川靜波澄。龍翔雲起。耆山廣運。給園多士。金粟來儀。文殊戾止。應乾動寂。順民終始。法本不然。今則無滅。象正雖闌。希夷未缺。於昭有齊。式揚洪烈。釋網更維。元津重樞。惟此名區。禪慧攸託。倚據崇巖。臨睨通壑。溝池湘漢。堆阜衡霍。撫撫亭皋。幽幽林薄。媚茲邦后。法流是挹。氣茂三明。情超六入。眷懷靈宇。載懷興茸。丹刻暈飛。輪奐離立。象設旣闕。睟容已安。桂深冬燠。松疎夏寒。神足游息。靈心往還。勝幡西振。貞石南刊。文士但能作百姓有餘天。下無事語。已爲雞羣之鶴。

沈休文桐柏山金庭館碑銘

○亦少陵所謂清詞麗句而大體平夷矣。

文士但能作百姓有餘天。下無事語。已爲雞羣之鶴。

夫生靈爲貴。有識斯同。道天云及。終天莫反。故仙學之祕。上聖攸尊。啓玉笈之幽文。貽金壇之妙訣。駐景濛谷。還光上枝。吐吸烟霞。變煉丹液。出沒無方。升降自己。下棲洞室。上賓羣帝。覩靈岳之驟啓。見滄波之屢竭。望元洲而駿驅。指蓬山而永驚。芝蓋三重。駕螭龍之蜿蜒。雲車萬乘。載旗旆之逶迤。此蓋棲靈五嶽。未暨夫三清者也。若夫上元奧遠。言象斯絕。金簡玉字之書。元霜絳雪之寶。俗士所不能窺。學徒不敢輕慕。且禁示嚴重。志業艱劬。自非天稟上才。未易可擬。自惟凡劣。識鑿鮮方。徒抱出俗之願。而無致遠之力。卑尙幽棲。屏棄情累。留愛巖壑。託分魚鳥。塗愈遠而靡倦。年旣老而不衰。高宗明皇帝。以上聖之德。結宗元之念。忘其菲薄。曲賜提引。來自夏汭。固乞還山。權憩汝南縣境。固非息心之地。聖主纘歷。復蒙繫維。永泰元年。方遂初願。遂遠出天台。定居茲嶺。所憩之山。實惟桐柏。實靈聖之下都。五縣之餘地。仰出星河上。

結懇志於元都。望霜谷於雲路。仰宣國靈。介茲景福。延吉祥於清廟。納萬壽於神躬。又願道無不懷。澤無不至。幽荒屈膝。戎貊稽顙。息鼓輟烽。守在海外。因此自勉。兼遂微誠。日久勤劬。自強不已。翹心屬念。晚臥晨興。餐正陽於亭午。念孔神於中夜。將三芝而延佇。飛九丹而宴息。乘鳧輕舉。留鳥忘歸。以茲丹穀。表之元極。無曰在上。日鑒非遠。銘石靈館。以旌厥心。其辭曰。

道無不在。若存若亡。於惟上學。理妙羣方。用之日損。言則非常。儵焉靈化。羽衣霓裳。九重曉帆。主山璀璨。日爲車馬。芝成宮觀。虹旂拂月。龍翰漸漢。萬春方華。千齡始旦。伊余菲薄。竊慕隱淪。尋師講道。結友問津。東探震澤。西遊漢濱。依稀靈眷。髣髴幽人。帝明紹歷。惟皇纂位。屬心鼎湖。脫屣神器。降命凡底。仰祈靈祕。瞻彼高山。興言覆簣。啓基桐柏。厥號金庭。喬峯迴峭。擘漢分星。臨雲置壇。駕岳開櫺。欄塗塞產。林麓蔥青。誰謂應遠。神道微密。慶集宮闈。祥流罕畢。其久如地。其恆如日。壽同南山。與天無則。更生變戀。外示無功。少君飛轉。密與神通。因資假力。輕舉騰空。庶憑嘉誘。永濟微躬。

梁簡文帝招真館碑

○長笛短簫。一何清綺。簡文自是文章之秀。四六之體。至梁而成。昭明尙有樸致。元帝簡文益巧構矣。

夫東瀛淥水。三變成田。西嶽靈桃。千年未子。尙以星起牽牛。部首迢遞。律生甲子。氣數杳冥。況復上遊玉清。損之又損。高排金闕。元之又元。豈言象之能詮。非時節之所辨。海虞縣者。則虞農都尉。太康置其宰境。有虞山。越絕書云。巫咸之所出也。高巖鬱起。帶青雲而作峯。瀑水懸流。雜天河而俱灑。雖日門採藥之地。楚望懷椒之歌。湯反流沙之魂。錦飾汾陰之鼎。無以喻焉。其峯則有石城石門。虛崦自然。不度句吳之馬。

神功挺起。豈似岡陵之畫。魏后冰城。夜陣權息。長安慈石。浴鐵暫流。較跡比期。優劣斯遠。道士沛郡張君。諱道裕。字宏真。卽漢朝天師陵十二代孫。天監二年。來至此岫。棲遁十有餘載。夜忽夢見聖祖云。峯下之地。而勢閒寂。宜立館宇。可以卜居。裕師潘洪。隱始寧四明山。無何。有人耳長髮短。云從虞山招真治來。言訖。忽然不見。潘馳信報君。君因辭山舊居。而以夢中所指峯下之地。卽以爲治。故號招真。高堂迴立。有類玉臺之山。長廊宛轉。還如步廊之岫。柱削芳桂。豈俟開陽木飛材。選海檀。無勞豫章神拔。黃庭司命之府。有類玲瓏。米陵赤石之觀。同符宏敞。遠望仲雍。而高墳蕭瑟。旁臨齊女。則衰壠蒼茫。蘚尋千仞之木。氣叶星晷。華飛五香之草。形圖宮室。帷葉綵花。卷舒蹊逕。陽桃侯棗。榮落巖崖。樹息金烏。簷依銀鳥。鳳將九子。應吹能歌。鶴生七歲。逐節成舞。旭日晨臨。同迎若華之色。夕陽斜影。俱成拂鏡之暉。玉礎微潤。應山雲於高牖。鳴籟徐響。引和風於空谷。方當專氣致柔。入無爲之境。周行不殆。窮混成之致。茅子算歸。輟轡無已。魏姬宴罷。留駕不還。何止持節變淮南之金。傳符蒔北鐘之稻。明月蛟龍之騎。驅之使鬪。四銖七子之鏡。引以成刀。散季齋之羽。起雄鳴之霧而已哉。乃爲銘曰。

玉龜二始。金書八會。道浹地心。功浮天外。故帝可小。唯真能大。德起同塵。善生塞兌。物寶自然。人符交泰。掩映綠蘿。穹隆紫蓋。仙治之美。此焉爲最。雄柱千步。陽臺百丈。水均下矚。山踰高掌。野寂雲興。禽繁山響。升虹莫棲。豐雷朝上。元陽作石。竹龍成杖。書藏玉匣。藥蘊銀筒。燒鉛雜鯉。折桂和蔥。羽衣可服。雲駢易通。斧柯雖朽。碑石無窮。無語不工。然尙以氣運。

道由慈善應起靈覺是以無方之迹隨機示現無緣之力因物成感晉建興元年癸酉之歲吳郡婁縣界淞江之下號曰滬瀆此處有居人以漁爲業掛此簷綸無甄小鮪布斯九戩常待六鼈遙望海中若二人象朝視沈浮疑諸蜃氣夕復顯晦乍若潛火于是謂爲海神卽與巫祝同往祈候七盤圓鼓先奏盛唐之歌百味椒漿屢上東皇之曲遂乃風波駭吐光景晦明咸起渡河之悲竊有覆舟之懼相顧失色于斯而返又有受持黃老好尙神仙職在三洞身帶八景更竭丹款復共奉迎尊像沈軀沒而不見經歷旬日遐邇普聞吳縣華里朱膺清信士也獨謂大覺大慈將宏化迹乃沐浴清齋要請同志與東靈寺帛尼及胡伎數十人乘船至滬瀆口頂禮歸依歌咀贊德于時微風送棹淑景浮波雲舒蓋而未移浪開花而不噴雖舟子招招弗能遠驚而靈相峨峨漸來就浦仰觀神像巖然雙泛非因鷁首詎假龍橋豈藉銀連寧須玉軸背各有題一名維衛一名迦葉于是時衆踊躍得未曾有復懼金仙之姿非凡所徙試就提捧豁爾勝舟指燕宮而西歸望葑門而一息道俗側塞人祇協慶膺家住近通元寺迺孫權爲乳母陳氏之所立也亦一邦之勝地胥山之神塔乃遷像于此寺武夫數百咸不能勝共怪曰朱膺帛尼二人之力而能捧持不覺爲異今人工甚盛確乎不移此必精誠弗能致也乃復竭心同時稽顙然後乃動至自舟中故知據井夜飛實無以異石不能重有覺憑焉後有外國沙門釋法開來稱彼國衆聖所記云東方有二石像及阿育王塔若能恭往禮覲滅無量罪免離三塗禮已而去中大通四年歲在壬子臨口汝靈侯奉勅更造銅光二枚其一高九尺其一高八尺五寸銅邁丹陽恥論劉向之術區選攻金無俟嵇康之鍛旣鑄旣

鏤是磨是銑。曄如光定。湛似日輪。亦當遠照三千。普瞻色像。遙觀十方。俱聞說法。豈止惜命小鳥。欣入影中。重罪衆生。還逢愛日而已哉。吳郡僧正慧法師。深修五定。淨持七支。于三寶中。盡力宏護。立摩尼之勝殿。製飛行之寶塔。至于莊嚴妙色。實有厥徵。夫魯聖云亡。尙追儀于有若。楚臣殞世。亦託似于優孟。放勳之后。更圖長樂之畫。文命之君。不□稽命之禊。或傳諸往牘。或布在前司。或贊述盈耳。或壽宮虛置。況遠追應身。近規靈迹。不銘不勒。何以稱揚。乃爲銘曰。每一波瀾。輒儼事相比。傳前人云。如宋刻玉玩。雙層浮起。最爲此道祕鑰。然非多讀書者。不能。巍巍天象。堂堂最勝。慧日獨圓。無生永證。愍此魚鉤。傷茲螺孕。乍動慈舟。時延寶乘。留住待緣。獨有傳應。傳應伊何。寶茲靈像。履冰晨遊。凌濤夜上。七衆有憑。九垓咸仰。照此真容。開斯俗網。千輪足起。萬字胸書。身橫五分。衣刻三銖。嗟爾末俗。心王所驅。顙浮水沫。命役馳駒。宜宏希嚮。必盡勤劬。覩相塵滅。聞聲惑祛。湛然神跡。長處全吳。

梁元帝荊州放生亭碑

不完

魚從流水。本在桃花之源。龍處大林。恆滄浮雲之路。豈謂陵陽垂釣。失雲失水。莊子懸竿。吞鉤吞餌。雖復元龜夜夢。終見取於宋王。朱鷺晨飛。尙張羅於漢后。譬如黃雀伺蟬。不知隨彈。應至青鷗逐兔。詎識杠鼎。方前北海之餐鸚鵡。未始非人。西王之使傳信。誰云賤鳥。故知魚鳥一觀。俱在好生。欲使金牀之雁。更反衡陽之侶。雪山之鹿。不充食萍之宴。碎金斷錦

梁元帝皇太子講學碑

鏡高堂。衢尊待酌。瞻後忽前。博文約禮。將東極長男之宮。不獨銘于銀牓。南皮太子之序。豈徒擅于金碑。
徐孝穆司空徐州刺史侯安都德政碑○袍帶氣漸重而後來燕許方以此名家

巖巖天柱。大矣周山之峯。桓桓地軸。壯哉崑崙之阜。三光懸而不墜。九土鎮以無疆。承乾合德之君。則天體元之后。所以並咨四鎮。咸建五臣。業配蒼祇。功成寓縣。至於流名雅頌。著美風詩。年代悠然。寂寥無紀。其能繼茲歌詠者。司空侯使君乎。自文昭武穆。祚土開家。濮水盛其衣簪。滎波分其緒秩。仁義之道。夷門美於大梁。儒雅之風。司徒重于強漢。自通人許劭。託命于江湖。高士袁忠。寄身于交越。俱違建安之難。獨處衡山之陽。祖天資秀傑。世載雄豪。卓富擬于公侯。班佃必于旌鼓。父光祿大夫。邑里開通德之門。州鄉無抗禮之客。自茫茫禹迹。赫赫宗周。家滅驪戎。國亡夷羿。我高祖武皇帝。迎河圖于浪泊。括地象于炎州。南興涿鹿之師。北問共工之罪。天生宰輔。堯年致白虎之祥。神賜英年。殷帝感蒼龍之傑。公亦觀時佇聖。嘯咤風雲。跪開黃石之書。高詠元池之野。沈吟梁甫。自比管仲之才。惆悵莘郊。久負伊生之歎。自羯虜侵華。羣蠻縱軼。後皋桂部之地。四戰五達之郊。郡境賢豪。將謀禦難。長者僉論。推公主盟。義士雄民。星羅霧集。公旣膺五聘。方啓六韜。率是驍徒。仍開嶺嶠。自大討瀟湘。同茲樊鄴。下軍違命。上策不宣。敗我王師。受拘勅盜。大陳格於文祖。咸秩具神。率土依風。羣靈稟朔。公亦忠爲令德。天纂之謀。吳帳斯開。衛風無擁。雖復季孫還魯。隨武濟河。國慶民歡。相儔匪若。卽授使持節。開府儀同三司。丹陽尹。昔光武不尤於馮異。穆公深禮於孟明。終報王官之師。遂舉咸陽之地。斯乃聖主之宏略。而名臣之遠圖者焉。皇帝以陶唐啓國。

致玉版于河宗。顯項承家。佐金天于江水。經綸草昧。定鼎之業居多。締構權輿。斷鼈之功相半。固以英聲馳于海外。信義感于寰中。主器攸歸。當璧斯在。公于是抗表長信。清宮未央。從億兆以同心。引公卿而定策。馳輕軒於輪轡。奉待駕於中都。七廟之基于焉。永固萬邦之本。由此克寧。乃復進司空公。南徐州刺史。于是鎮之以清靜。安之以惠和。望杏敦耕。瞻蒲勸穡。室歌千耦。家喜萬鍾。陌上成陰。桑中可詠。春鷓始嘯。必具籠筐。秋蟀載吟。競鳴機杼。或肅拜靈祀。躬瞻舞雩。去駕擁於風塵。還旌阻於飄沐。京坻歲積。非勞楚堰之泉。倉廩年豐。無用秦渠之水。雖復東過小縣。夏雨逐其輕輪。南渡滄江。秋濤弭其張蓋。固不得同年而語矣。若夫聽採民訟。昏曉必通。召引軒樞。躬親辨決。立授符於前案。無留詣於後曹。接務高城之中。非異甘棠之下。欣欣美俗。濟濟都塵。以賈琮郭賀之風。行建武永平之化。於是州民散騎常侍王瑒等。拜表宮闕。請揚茲美化。樹彼高碑。民欲天從。允彰絲誥。銘曰。

鬱鬱三象。茫茫九州。綿天慘沴。浹地虔劉。赫矣高祖。爰清國讐。元勳佐命。力牧風后。亦旣旋歸。邦家有暉。宮亭蠡浦。奮翅高飛。電捲勛寇。風行國威。文身被髮。作貢來綏。我皇纂武。攀號東序。謁渭同周。迎門惟呂。流矢爲暴。撓搶斯舉。喋喋蒼黎。危危刀俎。自我徂征。妖氛克平。爰驅大旄。實翦長鯨。北震巢浦。南俘灌城。青羌卷介。赤狄迴兵。蹈舞難踰。歌謠靡宣。曰我黎庶。俱祈上元。山移兩越。海變三田。公爲上相。復倍斯年。

碑志之文。以徐爲正。庚爲變。孝穆骨勝。子山情勝。

徐孝穆晉陵太守王勵德政碑○

章法有淺深。寶主可翫。

遠慶。豈惟桓氏之鳴玉。張家之珥貂。袁姓之朱衣。揚宗之華轂。又有攸飛遮列。班弓夾門。濯龍俯望。緹騎盈道。奕世如此。何其盛哉。君以藍田美玉。大海明珠。灼灼美其聲芳。英英照其符彩。丰神雅淡。識量寬和。既有崔琰之鬚眉。非無鄭元之腰帶。爛爛如高巖下電。騷騷若長松裏風。勢利無擾于胸襟。行藏不槩于懷抱。家門雍睦。孝友爲風。上友不諂。下交不瀆。脫貂救厄。情靡矜吝。釋馬窮途。唯濟危殆。至于網羅。圖籍脂粉。藝文學侶。挹其精微。詞宗稱其妙絕。出爲仁武將軍。晉陵太守。五雞三兔。動息有方。問羊知馬。鉤鉅兼設。濟北移樹。累政之所未治。汝南爭水。連年之所無斷。一朝明決。曾不留滯。四民商販。咸用殷阜。銘曰。康哉寶運。美矣良臣。渭自灃水。源于洛濱。公侯世及。宰輔相因。曰我民秀。山川降神。風情穆穆。孝友恂恂。學則經笥。文爲世珍。高風遠矣。曠代難倫。鼎鉉虛職。台階未臻。安知霜霰。遽天松椿。碣石斯表。民情旣陳。徒然下拜。何報陽春。

駢體文鈔卷二十四

【墓碑類】

蔡伯喈胡公碑銘○○中郎文每有弱語拙語而質樸以立體故不爲累後人不可藉口凡用韻處古意可法

表墓之文中郎爲正宗凡可爲規範者皆在所錄不善學之千篇一律

公諱廣字伯始南郡華容人也其先自嬀姓建國南土曰胡子春秋書焉列于諸侯公其後也考以德行純懿官至交趾都尉公寬裕仁愛覆載博大研道知幾窮理盡性凡聖哲之遺教文武之未墜罔有不綜年二十七察孝廉除郎中尙書侍郎左丞尙書僕射內正機衡允釐其職文敏暢乎庶事密靜周乎樞機帝用嘉之遷濟陰太守公乃布愷悌宣柔嘉通神化導靈和揚惠風以養真激清流以盪邪取忠肅於不言消奸宄於爪牙是以君子勤禮小人知恥鞠推恩於官曹刑戮廢於朝市餘貨委於路衢餘種棲于畝畝遷汝南太守增修前業考績旣明入作司農實掌金穀之淵藪和均關石王府以充遂作司徒昭敷五教進作太尉宣暢渾元人倫輯睦日月重光遭國不造帝祚無主援立孝桓以紹宗緒用首謀定策封安樂鄉侯戶邑之數加于羣公入錄機事聽納總己致位就第復拜司空敷土導川俾順其性功遂身退告疾固辭乃爲特進爰以休息又拜太常典司三禮敬恭禮祀神明嘉歆永世豐年聿懷多福復拜太尉尋申前業又以特進逍遙致位又拜太常遭疾不夷遜位歸爵遷於舊都徵拜太中大夫延熹末年聖主革正幸臣誅斃引公爲尙書令以二千石居官委以閫外之事蓋改度量以新國家宏綱旣整袞闕以補乃

拜太僕車正馬閑六驕習馴遷太常司徒成宗晏駕推建聖嗣復封故邑與參機密寢疾告退復拜太傅錄尚書事于時春秋高矣繼親在堂朝夕定省不違子道旁無几杖言不稱老居喪致哀率禮不越其接下答賓雖幼賤降等禮從謙尊尊而彌恭勞思萬機身勤心苦雖老萊子嬰兒其服方叔克壯其猷公旦納于台屋正考父俯而循牆曷以尚茲夫烝烝至孝德本也體和履忠行極也傅聞周覽上通也勤勞王家茂功也用能七登三事篤受介祉亮皇業於六王嘉不績於九有窮生人之光寵享黃耆之遐紀蹈明德以保身與福祿乎終始年八十有二建寧五年春壬戌薨于位天子悼痛贈策賜諡曰文恭如前傅之儀而有加焉禮也故吏司徒許栩等相與欽慕崧高蒸民之作取言時計功之則論集行跡銘諸琬琰其詞曰伊漢元輔時惟文恭聰明叡哲思心瘁容畢力天機帝休其庸賦政于外有邈其蹤進作卿士粵登上公百揆時序五典克從萬邦黎獻共唯時雍勳烈旣建爵士乃封七被三事再作特進宏唯幼冲作傅以訓赫赫猗公邦家之鎮澤被華夏遺愛不渝日與月與齊光並運存榮亡顯沒而不泯

蔡伯喈太傅文恭侯胡公碑

公諱廣字伯始交趾都尉之元子也公應天淑靈履性貞固九德咸修百行必備遭家不造童而夙孤上奉繼親下慈弱弟崎嶇儉約之中以盡孝友之道及至入學從訓歷觀古今生而知之聞一覩十兼以周覽六經博總羣議旁貫憲法通識國典年二十七察孝廉除郎中尚書侍郎尚書左丞尚書僕射幹練機事綱繆樞極忠亮唯允簡于帝心智略周密冠于庶事遷濟陰太守其爲政也寬裕足以容衆和柔足以安物剛毅足以威暴體仁足以勸俗故禁不用刑勸不用賞其下望之如日月從之如影響思不可忘度

不可革。遺愛結於人心。超無窮而垂則。徵拜大司農。遂作司徒。遷太尉。以援立之功。封安樂鄉侯。錄尚書事。稱疾屢辭。策賜就第。復拜司空。功成身退。俾位特進。又拜太尉。復以特進致命休神。又拜太尉。遜位歸爵。旋于舊土。徵拜太中大夫。尚書令。太僕。太常。司徒。永康之初。以定策元功。復拜前邑。錄尚書事。疾病就第。又授太傅。入參機衡。五蹈九列。七統三事。諒闇之際。三據冢宰。和神人於宗伯。理水土於下台。訓五品於司徒。耀三辰于上階。光弼六世。歷載三十。自漢興以來。鼎臣元輔。耆耄老成。勳被萬方。與祿終始。未有若公者焉。春秋八十二。建寧五年三月壬戌。薨于位。天子悼惜。羣后傷懷。詔五官中郎將任崇奉冊贈以太傅。安樂鄉侯印綬。拜室家子一人郎中。賜東園祕器。賜絲帛含歛之備。中謁者董翊弔祠護喪。錢布賻賜。率禮有加。賜諡曰文恭。昭顯行迹。四月丁酉。葬于洛陽塋。故吏濟陰池喜。感公之義。率慕黃鳥之哀。推尋雅意。彷徨舊土。休績不烈。宜宣于此。乃樹石作頌。用楊德音。詞曰。於皇上德。懿鑠孔純。大孝昭備。思順履信。膺期命世。保茲舊門。淵泉休茂。彪炳其文。爰贊天機。翼翼唯恭。夙夜出納。紹跡虞龍。賦政于外。神化元通。普被汝南。越用熙雍。帝曰休哉。命公三事。乃耀柔嘉。式是百司。股肱元首。庶績咸治。二氣燮雍。五徵來備。勳格皇天。澤洽后土。封建南藩。受茲介祐。玉藻在冕。毳服艾輔。輅車雕騶。四牡修扈。贊事上帝。祇祀宗祖。陟降盈虧。與時消息。既明且哲。保身遺則。同軌旦奭。光充區域。生榮死哀。流統罔極。

蔡伯喈太傅胡公碑

合以上三篇觀其部勒變動之法

維漢二十有一世。建寧五年春三月。既生魄。八日壬戌。太傅安樂鄉侯胡公薨。越若來四月辛酉。葬我君文恭侯。於是掾太原王允。鴈門畢整。屬扶風曾宙。潁川殷歷等。僉謂公之德也。柔而不犯。威而不猛。文而

不華實而不樸。靜而不滯。動而不躁。總天地之中和。覽生民之上操。聰明膚敏。兼質先覺。涉觀憲法。契闢文學。睹皋陶之闡闢。探孔子之房奧。然而約之以禮。守之以恭。寬之以納衆。汎愛多容。其誘人也。恂恂焉。怡怡焉。能使蒙惑開析。僞戾優順。逸惰勤信。及其創基發跡。機密聖朝。其知其能。夙夜惟寅。以允帝命。是以頻繁機極。三升而不出焉。乃還譚其舊章。彌綸古訓。貫萬品。研精微。用補前臣之所闕。十年而無愆。強記同乎富平。周慎逸於博士。偶山甫乎喉舌。匹虞龍而納言。唯帝命公以二郡。其爲政也。導人以德。帥物以己。敦以忠肅。勵以知恥。人悅其化。天樂其和。士相勉於公朝。民勸行於私家。徽纒縈而靡係。鞭撲棄而無加。洋洋乎若德。宣治嚴以爲威。寬以爲福而已哉。五作卿士。七蹈相位。太僕司農。太傅司空。各一司徒。特進各二。太常太尉各三。光輔六世。歷載三十有餘。其致治也。通水泉於潤下。蕃后土於稼穡。訓五品於羣黎。參人物於區域。耀三辰於渾元。協太中於皇極。傳舊德於幼沖。率且奭於舊職。譬彼四時。功成則退。在盈思沖。升降以順。建封域於南土。踐殊號於特進。榮祚統業。垂乎來允。公自二郡及登相位。凡所辟用。遂至大位者。故司徒中山祝恬。其餘登臺閣。據賦政策勳。樹功流化者。蓋不可勝載。惟我末臣。頑蔽無聞。仰慕羣賢。惡乎可及。自公寢疾。至於薨斃。參與嘗禱。列在喪位。雖庶物戮力。不愆于禮。進睹墳塋。几筵空設。退顧堂廡。音儀永闕。感悼傷懷。心肝若割。相與累次德行。撰舉功勳。刊之于碑。用慰哀思。其詞曰。煥文德。伊胡后。應期運。作漢輔。嘉中興。膏民庶。澤洪淳。亶攸序。亘地區。充天宇。麟高逵。踵遐武。揚景烈。垂不朽。仰邃古。耀昆後。

雖諛贊亦必肖似其人雖履繩亦能變化其體合三篇而觀之可考見後人章句所師法

蔡伯喈楊公碑

○危世抗節之大臣直書其事亦生氣遠出

微裔。胄無緒。暨漢興。烈祖楊喜。佐命征伐。封赤泉侯。嗣子業。絀冕相繼。公之不考。以忠蹇亮。弼輔孝安。登司徒。太尉。公承夙緒。世篤儒教。以歐陽尙書。京氏易。誨授四方學者。自遠而至。蓋踰三千。初辟司空。舉高第。拜侍御史。遷豫州。兗州。刺史。任城相。徵入勸講。拜太中大夫。左中郎將。尙書。出補右扶風。留拜光祿大夫。遭權嬖貴盛。六年守靜。外戚火燔。爾乃遷太僕。太卿。公事絀位。浹辰之間。俾位河南。憤疾豪強。見違姦黨。用嬰疾廢。起家復拜太常。遂陟三司。沙汰虛冗。料簡貞實。抽援表達。與之同蘭芳。任鼎重。從駕南巡。爲朝碩德。然知權過於寵。私富侔國。大臣苛察。望變復還。條表以聞。啓導上怒。其時所免州牧郡守五十餘人。饜戾是黜。英才是列。善否有章。京夏清肅。在位七載。年七十有四。延熹八年五月丙戌薨。朝廷惜焉。寵賜有加。公自奉嚴勅。動遵禮度。量材授任。當官而行。不爲義細。疾是苛政。益固其守。廚無宿肉。器不鏤雕。夙喪嬾儷。妾不嬖御。可謂立身無過之地。正直清儉。該備者矣。昔仲尼嘗垂三戒。而公克焉。故能匡朝盡直。獻可去奸。忠侔前後。聲塞宇宙。非黃中純白。窮達一致。其惡能立功立事。敷聞于下。昭升于上。若茲巍巍者乎。於是門人學徒。相與刊石樹碑。表勒鴻勳。讚懿德。傳億年於戲。公唯嶽靈。天挺德翼。赤精神。網縑仁哲。生應台階。作邦楨。帝欽亮。訪典刑。道不忒。迄有成。光遐邇。穆其清。

蔡伯喈司空文烈侯楊公碑

華尙書語後人疵之。三楊碑文烈篇稍弱。

曰漢有國師。司空文烈侯楊公。公唯司徒之孫。太尉公之允子。皇祖考以懿德。胥及肆勤。式建丕休。勳啓洪範。公祇服宏業。克不堂構。小乃不敢不慎。大亦不敢不戒。用罔有擇言失行。在于其躬。泊在辟舉。先志

載言罔不攸該。乃自宰臣以從王事。立功不有。用辭其祿。逮作御史。允執國憲。納于侍中。在帝左右。爰董武事。王師孔閑。羣公以舊德碩儒。道通術明。宜建師保。延入華光。侍宴露寢。敷典誥之精旨。達聖王之聰叡。帝以機密齊栗。常伯劇任。鮮克知臧。以釐其采。命公再作少府。俾率其屬。以熙庶績。天地作險。國家丕承。軍門祛禁。式遏寇虐。命公再作光祿。亦總其熊羆之士。不貳心之臣。保乂帝家。巖巖大理。惟制民命。命公作廷尉。惟刑之恤。旁施四方。惟明折獄。蔽罪于憲之中。亦惟三禮六樂。國之元幹。命公作太常。明德惟馨。八音克諧。神人以和。永世豐年。溥天率土。而衆莫外。命公作司空。公唯戢之。翊明其政。時惟休哉。惟天陰隲下民。彝倫所由。順序。命公作司徒。而敬敷五教。以親百姓。父義母慈。兄友弟恭。子孝。時惟休哉。昭孝于辟雍。命公作三老。帝躬以祇敬。遵有虞于上庠。茫茫大運。垂光烈曜。命公作太尉。璇璣運周。七精循軌。時惟休哉。帝欲宣力于四方。公則翼之。辟道或回。公則弼之。虔恭夙夜。不敢荒寧。用對揚天子丕顯休命。天子大簡其勳。用授爵賜。封侯于臨晉。功成化洽。景命有傾。帝乃震慟。執書以泣。命于左中郎將郭儀。作策賜公驃騎將軍。臨晉侯印綬。兼號特進。諡以文烈。寵命畢備。而後卽世。肆其孤彪。敢儀古式。昭銘景烈。銘曰。

天鑒有漢。誕生元輔。世作三事。勛在王府。乃及伊公。克光前矩。悉心畢力。允其祖武。化洽羣心。澤霑區宇。帝曰文烈。朕嘉君功。爲邑河渭。建茲土封。申備九錫。以祚其庸。位此特進。於異羣公。昔在申呂。匡佐周宣。崧高作頌。大雅揚言。今我文烈。帝載用熙。參光日月。比功四時。身歿名存。永世慕思。

光于前朝。祖司徒。考太尉。繼蹟宰司。咸有助烈。公承家崇軌。受天醇素。欽承奉構。閑于伐柯。烈風維變。不易其趣。文藝典籍。尋道入奧。操清行朗。潛晦幽閒。不答州郡之命。辟不將軍府。不得已而應之。遷陳倉令。公乃因是行。退居廬。公車特徵。以病辭。司空舉高第。拜侍中。越騎校尉。帝篤先業。將問故訓。公以羣公之舉。進授尚書。于禁中。遷少府。光祿勳。敬揆百事。莫不時序。庶尹知恤。闔闔推清。列作司空。地平天成。陰陽不忒。公遂身避。託疾告退。又以光祿大夫受命司徒。敬敷五品。宣洽人倫。變和化理。股肱耳目之任。靡不克明。及至太尉。四時順動。三光耀潤。羣生豐遂。太和交薄。三作六卿。五蹈三階。受爵開國。應位特進。非盛德休功。假于天人。孰能該備寵榮。兼包令錫。如公之至者乎。公體資明哲。長於知見。凡所辟選。升諸帝朝者。莫非瑰才逸秀。并參諸佐。惟我下流。二三小臣。穢損清風。愧于前人。乃糾合同寮。各述所審。紀公勳績。刊石立銘。以慰永懷。銘曰。

天降純嘏。篤生柔嘉。俾允祖考。光輔國家。三業在服。帝載用和。粵暨我公。尤執忠貞。在棟伊隆。于鼎斯寧。德被宇宙。華夏以清。受茲介福。履祚孔成。爲邑河渭。袞冕絳珽。以佐天子。祇事三靈。丕顯伊德。萬邦作程。爰銘爰贊。式昭懿聲。

蔡伯喈朱公叔墳前石碑

○公叔名人。碑文簡質。不溢。後人不能。

維漢二十一世。延熹六年。粵四月丁巳。忠文公益州刺史朱君。名穆。字公叔。卒于京師。其五月丙申。葬于宛邑北萬歲亭之陽。舊兆域之南。其孤野受顧命曰。古者不崇墳。不封墓。祭服雖三年。無不於寢。今則易

之吾不取也。爾其無拘于俗，無廢予誠。野欽率遺意，不敢有違。封墳三板，不起棟宇，乃作祠堂于邑中南陽舊里，備器鑄鼎，銘功載德，懼墳封彌久，夷于平壤，於是依德像，緣雅則，設茲方石，鎮表靈域，用慰其孤罔極之懷。乃申詞曰：

歆惟忠文，時惟朱父，實天生德，丕承洪緒。彌綸典術，允迪聖矩。好是貞厲，疾彼強禦。斷剛若仇，柔亦不茹。仍用明夷，遘愍受侮。帝曰休哉，朕嘉乃功。命汝納言，允汝祖蹤。父拜稽首，翼翼惟恭。篤棊不忘，夙夜在公。旱天不弔，降茲殘殃。不遺一父，俾屏我皇。我皇悼心，錫詔孔傷。位以益州，贈之服章。用刊彝器，宣昭遺光。子子孫孫，永載寶藏。

蔡伯喈陳太邱碑

○文有道氣，漸近自然，推崇至極，猶若不盡。少時誦習，頗有違言，亦兒童之見也。

先生諱實，字仲弓，潁川許昌人也。含元精之和，應期運之數。兼資九德，總修百行。於鄉黨則恂恂焉，斌斌焉。善誘善導，仁而愛人。使夫少長咸安懷之，其爲道也。用行舍藏，進退可度。不微訐以干時，不遷貳以臨下。四爲郡功，曹五辟豫州。六辟三府，再辟大將軍。宰聞喜半歲，太邱一年。德務中庸，教敦不肅。政以禮成，化行有謚。會遭黨事，禁錮二十年。樂天知命，澹然自逸。交不諂上，愛不黷下。見幾而作，不俟終日。及文書赦宥，時年已七十。遂隱邱山，懸車告老。四門備禮，閑心靜居。大將軍何公司徒袁公前後招辟，使人曉諭。云欲特表，便可入踐常伯。超補三事，紆佩金紫。光國垂勳，先生曰絕望已久。飾巾待期而已。皆遂不至。宏農楊公東海陳公每在袞職，羣僚賀之。皆舉首曰潁川陳君，命世絕倫。大位未躋，慚于文仲。竊位之負，故

士陳君稟嶽瀆之精。苞靈曜之純。天不愍遺一老。俾屏我王。梁崩哲萎。于時靡憲。縉紳儒林。論德謀績。諡曰文範。先生傳曰。郁郁乎文哉。書曰。洪範九疇。彝倫攸斁。文爲德表。範爲士則。存誨沒號。不亦宜乎。三公遣令史祭以中牢。刺史敬弔。太守南陽曹府君命官作誄曰。赫矣陳君。命世是生。含光醇德。爲士作程。資始既正。守終有令。奉禮終沒。休矣清聲。遣官屬掾吏前後赴會。刊石作銘。府丞與比縣會葬。荀慈明韓元長等五百餘人。總麻設位。哀以送之。遠近會葬。千人以上。河南尹种府君臨郡。追歎功德。述錄高行。以爲遠近鮮能及之。重部大掾以成斯銘。可謂存榮沒哀。死而不朽者也。乃作銘曰。

峨峨崇嶽。吐符降神。於皇先生。抱寶懷珍。如何昊穹。既喪斯文。微言圯絕。來者曷聞。交交黃鳥。爰集于棘。命不可贖。哀何有極。以微言圯絕爲歎。苟非若人。則失實。

蔡伯喈郭有道林宗碑 ○ 陳郭兩賢。如見其人。中郎諸碑皆在此後。梗柎之幹。琴瑟之音。李氏云中郎爲表墓正宗。此二篇尤上品也。

先生名泰。字林宗。太原界休人也。其先出自有周。王季之穆。有號叔者。實有懿德。文王咨焉。建國命氏。或謂之郭。卽其後也。先生誕膺天衷。聰叡明哲。孝友溫恭。仁篤柔惠。夫其器量宏深。姿度廣大。浩浩焉。汪汪焉。奧乎不可測。已若乃砥節勵行。直道正辭。貞固足以幹事。隱括足以矯時。遂考覽六籍。探綜圖緯。周流華夏。游集帝學。收文武之將墜。拯微言之未絕。于時纓綏之徒。紳佩之士。望形表而景附。聆嘉聲而響和者。猶百川之歸巨海。鱗介之宗龜龍也。爾乃潛隱衡門。收朋勤誨。童蒙賴焉。用祛其蔽。州郡聞德。虛己備禮。莫之能致。羣公休之。遂辟司徒掾。又舉有道。皆以疾辭。將蹈洪崖之遐跡。紹巢由之絕軌。翔區外以舒。

翼超天衢以高時。稟命不融。享年四十有三。以建寧二年正月乙亥卒。凡我四方同好之人。永懷哀悼。靡所置念。乃相與惟先生之德。以謀不朽之事。僉以爲先民旣沒。而德音猶存者。亦賴之于見述也。今其如何而闕斯禮。于是建碑表墓。昭銘景行。俾芳烈奮乎百世。令聞顯于無窮。其詞曰。

於休先生。明德通元。純懿淑靈。受之自天。崇壯幽濬。如山如淵。禮樂是悅。詩書是敦。匪惟摭華。乃尋厥根。宮牆重仞。允得其門。懿乎其純。確乎其操。洋洋搢紳。言觀其高。棲遲泌邱。善誘能教。赫赫三事。幾行其招。委辭召貢。保此清妙。降年不永。民斯悲悼。爰勒茲銘。擿其光耀。嗟爾來世。是則是效。碑文亦垂亦縮。仍是一筆書銘詞語。語可味。

蔡伯喈貞節先生范史雲碑

骨堅後人不能到。頗開方便法門。

先生諱丹。字史雲。陳留外黃人。陶唐氏之後也。其在周室。有士會者。爲晉大夫。以受范邑。遂以爲氏。漢文景之際。爰自南陽。來家于成安。生惠及延二子。官至司農。廷尉君則其後也。君受天正性。志高行潔。在乎幼弱。固已藐然有烈節矣。時人未之或知。屈爲縣吏。亟從仕進。非其好也。退不可得。乃託死遁去。親戚莫知其謀。遂隱竄山中。涉五經。覽書傳。尤篤易與尚書。學立道通。久而後歸。遊集太學。知人審友。苟非其類。無所容納。介操所在。不顧貴賤。其在鄉黨也。事長惟敬。養稚惟愛。言行舉動。斯爲楷式。郡縣請召。未嘗屈節。其有備禮招延。虛已迓止。亦爲謀奏。盡其忠直。以處士舉孝廉。除郎中。萊蕪長。未出京師。喪母。行服。故事服闋後。還郎中。君遂不從州郡之政。凡其事。君過則弼之。闕則補之。通清夷之路。塞邪枉之門。舉善不

而晚節禁寬。困於屢空。而性多檢括。不治產業。以爲卜筮之術。得因吉凶。道治民情。以受薄償。且無咎累。乃嚮卦于梁宋之域。好事者覺之。應時輒去。禁旣蠲除。太尉張公。司徒崔公。前後四辟。皆不就仕。不爲祿。故不牽於位。謀不苟合。故特立於時。是則君之所以立節。明行亦其所以後時。失途也。年七十有四。中平二年四月卒。太尉張公。兗州劉君。陳留太守淳于君。外黃令劉君。僉有休命。使諸儒參按典禮。作誄。著諡。曰貞節先生。昭其功行。錄記所履。謀於耆舊。刊石樹銘。光示來世。銘曰。

於顯貞節。天授懿度。誕茲明哲。允迪德譽。如淵之清。如玉之素。溷之不濁。涅之不汙。用行思忠。舍藏思固。伯夷是師。史鮪是慕。榮貧安賤。不慊窮迂。甘死善道。遺名之故。身沒譽存。休聲載路。

蔡伯喈袁滿來墓碑

○存備一法

茂德休行。曰袁滿來。太尉公之孫。司徒公之子。逸才淑姿。實天所授。聰遠通敏。越齷在闕。明習易學。從誨如流。習百家治易。孟氏遇目能識。事不再舉。問一及三。具始知終。情性周備。夙有奇節。孝智所生。順而不驕。篤友兄弟。和而無忿。氣決泉達。無所凝滯。雖冠帶之中。士校材考行。無以加焉。允公族之殊異。國家之輔佐。衆偉其器。士嘉其良。雖則童稚。令聞芬芳。降生不永。年十有五。四月壬寅。遭疾而卒。旣苗而不穗。凋殞華英。嗚呼悲夫。乃假碑旌于墓表。嗟其傷矣。唯以告哀。

蔡伯喈胡夫人黃氏神誥

○來以不歸葬爲主。開後法。

夫人江陵黃氏之季女。字曰列羸。其先出自伯翳。別封于黃。以國氏焉。高祖父汝南太守。曾祖父延城大

尹祖父番禹令。父以主簿。嘗證太守。事奉明君。以立臣節。漢南之士。以爲美談。初都尉君娶于故豫州刺史。卽黃君之姊。生太傅安樂侯廣。及卷令康。而卒。繼室以夫人生童紀未齠。而夭。夫人懷聖善之姿。蹈因母之仁。撫育二孤。導以義方。思齊先姑。神罔時恫。故能迄用有成。誕膺繁祉。廣歷五卿。七公。再封之祿。康亦由孝廉。宰牧二城。九鼎之義。夫人是享。爰暨稚孫。更仕三宮。或典百里。或作虎臣。銀艾貂蟬。近侍顯尊。受茲介福。于我夫人。自郡尉仕于京師。及廣兄弟。式敍漢朝。夫人居京師。六十有餘載。其乘輅執贄。朝皇后。探柔桑于蠶宮。手三盆于繭館者。蓋三十年。上有帝室龍光之休。下有堂宇斤斤之祚。心耽其榮。體安其玄。遠圖長慮。用遺舊居。欲留此焉。康寧之時。亟以爲言。太夫人年九十一。建甯二年。薨于太傅府。是月辛酉。公之季子陳留太守碩。卒于洛陽左池里舍。公銜哀悼。祇慎其屬。遵奉遺意。不敢失墜。乃俾元孫顯。咨度羣儒。以考其衷。僉曰。昔帝舜沒於蒼梧。殯於虞郊。二妃薨於江湘。不卽兆于九疑。延陵季子。實惟吳人。長子道終。卜葬嬴博。夫遭時而制。不遠遷徙。魂氣所之。不繫邱壠。帝舜以之神罔時怨。季札以之仲尼嘉焉。鑒帝籍之高論。綜精靈之幽情。稽先人之遐迹。順母氏之所寧。茲事體通而義同。允不可替。於是公乃爲辭。昭告先考。然後卜定宅兆。龜筮襲從。遂營窀穸之事。舉封樹之禮。十月旣望。粵翌日己酉。葬我夫人黃氏。及除留太守碩。于此高原。雒陽東界關亭之阿。天子使中常侍謁者李納弔。且送葬。持賻錢二十萬。布二百疋。再以中牢祠。羣后畢會。榮哀孔備。于時濟陽故吏舊民。中常侍勾陽于肅等。二十三人。思應慕化。推本議銘。著斯碑石。俾諸昆裔瞻仰。以知禮之用。是爲神誥。乃申頌曰。於穆夫人。家邦之媛。昔在嬴

仁。追稽先典。厝茲洛濱。齊蹟湘靈。配名古人。休矣耀光。于億斯年。

蔡伯喈胡夫人靈表

○以子婦姑喪爲主

夫人編縣舊族。章氏之長女也。字曰顯章。令儀小心。秉操塞淵。仁孝婉順。率禮無違。體季蘭之姿。蹈思齊之跡。永初二年。年十有五。爰初來嫁。誕成家道。仰奉慈姑。竭歡致敬。俯誨膝下。化導周悉。至德修於幾微。徽音暢於神明。故能參姪妯之功。兼生人之榮。朝春路寢。贊桑蠶宮。光寵有暈。祭服有珣。前後奉斯禮者。三十餘載。夫人生五男。長曰整。伯齊。次曰千億。叔韡。次曰寧。穉。次曰碩。季淑。伯仲各未加冠。遭厲氣。同時夭折。叔讓。郡孝廉。及季。更歷州郡。寧舉茂才。葉令京。令爲議郎。季以高第。爲侍御史。諫議大夫。侍中。虎賁中郎將。陳留太守。皆早卽世。夫人哀悼劬悴。由是被疾。遭太夫人憂篤。年七十七。建寧三年薨。夫人之存也。契闊中饋。婉孌供養。依生奉仁。紹述雅意。者閏月。附于太夫人。窀穸于茲地。魂而有靈。欽明定省。神心欣焉。其實寧之。元女金盈。追慕永思。懼怛罔極。遂及斯表。鑄著堅珉。頌曰。悲母氏之永兮。懷殷恤以摧傷。惟子道之無窮兮。惜聞誨之未央。庶黃耆以期頤。胡委我以夙喪。恆思心以激切。亦割肝以絕腸。昔先聖之遺辭。言仁者其壽長。嗟母氏之憂患。體愷悌以慈良。失延年之報祐。獨何棄於穹蒼。日月忽以將暮。抱長結以含愁。尋修念之在昔。原疾病之所由。遭元子之弱天。心傷悴以自憂。暨叔季之殞終。哀情結以彌綢。皇姑沒而中感。遂大漸兮速流。疾餒餒而日遣。氣微微以長浮。銷精魂以遐翔。曾不可乎援留。爾乃順旨於冥冥。繼存意於不違。爰耐靈於皇姑。尙魂魄之有依。潛幽室之黯漠。惜昭明之景輝。一往超以未及。傾徂邈其彌遲。顧新廟以累欷。伏几筵而增悲。嗟旣逝之益遠。眇悠悠而莫追。

蔡伯喈議郎胡公夫人哀讚

○以寢疾遺子之官
主讚語皆爲顯言

議郎夫人趙氏字曰永姜。允有令德，秉心寒淵，舒詳閒雅，儀節孔備。女師四典，窈窕德象，罔不習熟。以供婦道。議郎早世，檢誨幼孤，義方以導，其性中禁，以閑其情。孤顯儉節，以免吝悔。少辟侍中，襲先公之爵，以議郎出爲濟陰太守。是時夫人寢疾未薨，而國家方有滎陽寇賊，震驚帝師，簡選州辟，授任進衛，不得辭。王命親醫藥，夫人乃自矜精稟氣力，俛起若愈，以勸遣顯。到官月餘，所疾暴盛。春秋五十八，中平四年薨于京師。顯有剖符之寄，偪於國典，疾篤不得顧親，增感氣絕，不能自宥。慎終之事，闕焉永廢。雖不毀以隨沒，亦困悴而傷懷。知我如此，不如勿生。號咷告哀，以乞骸骨。踰年然後獲聽，追惟考君存時之命，迎棺舊土，同穴此城。孤心摧割，靡所底念。仰瞻二親，或有神誥靈表之文，敢曰亮闇，敝我憂痛。作哀讚書之于碑，愍予小子，夙罹凶艱，嚴考殞沒，我在齟年。母氏鞠育，載矜載憐，殷斯勤斯，慈愛備存。匪惟驕之，範我軌度。教誨嚴肅，昭示好惡，俾我克類，畏威忌怒，用免咎悔。踐繼先祖，卽爵其土。二將是臨，與帝剖符，守于濟陰。夫人寢疾，榮此寵休，疾用歡痊，翊日斯瘳。將征將邁，從養陶邱。景命徂逝，不愍少留。疾大漸以危，亟兮精微微而浸衰。逼王職於憲典兮，子孫忽以替違。目不臨此氣絕兮，手不親夫含飯。陳衣衾而不省兮，合綆棺而不見。昔予考之卽世兮，安宅兆于舊邦。依存意以奉亡兮，遷靈柩而同來。考妣痛以慄兮，離乖神柩集而移兮。增哀黃壚密而無問兮，出入闐其無門。昇柩在茲兮，不知魂景之所存。悼孤衷之不遂兮，思情慄以傷肝。幽情淪於后坤兮，精哀達乎昊乾。

王仲寶褚淵碑文

○尙有生氣，逐事鋪敘中，僅堪摘句。文章至是不能無待于起哀。

逐節敷敘。中郎遺矩。羌無鎔裁。但苦詞費。仲寶休文。尙疎雋可觀。

夫。太。上。有。立。德。其。次。有。立。功。此。之。謂。不。朽。所。以。子。產。云。亡。宣。尼。泣。其。遺。愛。隨。武。既。沒。趙。文。懷。其。餘。風。於。文。簡。公。見。之。矣。公。諱。淵。字。彥。回。河。南。陽。翟。人。也。微。子。以。至。仁。開。基。宋。段。以。功。高。命。氏。爰。逮。兩。漢。儒。雅。繼。及。魏。晉。以。降。奕。世。重。暉。乃。祖。太。傅。元。穆。公。德。合。當。時。行。比。州。壤。深。識。臧。否。不。以。毀。譽。形。言。亮。采。王。室。每。懷。沖。虛。之。道。可。謂。婉。而。章。志。而。晦。者。矣。自。茲。厥。後。無。替。前。規。建。官。惟。賢。軒。冕。相。襲。公。稟。川。嶽。之。靈。暉。含。珪。璋。而。挺。曜。和。順。內。凝。英。華。外。發。神。茂。初。學。業。隆。弱。冠。是。以。仁。經。義。緯。敦。睦。於。閨。庭。金。聲。玉。振。寥。亮。於。區。宇。孝。敬。淳。深。率。由。斯。至。盡。歡。朝。夕。人。無。間。言。逍。遙。乎。文。雅。之。囿。翺。翔。乎。禮。樂。之。場。風。儀。與。秋。月。齊。明。音。徽。與。春。雲。等。潤。韻。宇。宏。深。喜。愠。莫。見。其。際。心。明。通。亮。用。言。必。由。於。己。汪。汪。焉。洋。洋。焉。可。謂。澄。之。不。清。撓。之。不。濁。袁。陽。源。才。氣。高。奇。綜。覈。精。裁。宋。文。帝。端。明。臨。朝。鑒。賞。無。昧。袁。既。延。譽。於。遐。邇。文。亦。定。婚。於。皇。家。選。尙。餘。姚。公。主。拜。駙。馬。都。尉。漢。結。叔。高。晉。姻。武。子。方。斯。蔑。如。也。釋。褐。著。作。佐。郎。轉。太。子。舍。人。濯。纓。登。朝。冠。冕。當。世。升。降。兩。宮。實。維。時。寶。具。瞻。之。範。既。著。台。衡。之。望。斯。集。出。參。太。宰。軍。事。入。爲。太。子。洗。馬。俄。遷。祕。書。丞。贊。道。槐。庭。司。文。天。閣。光。昭。諸。侯。風。流。藉。甚。以。父。憂。去。職。喪。過。乎。哀。幾。持。毀。滅。有。識。留。感。行。路。傷。情。服。闋。除。中。書。侍。郎。王。言。如。絲。其。出。如。綸。恪。居。官。次。智。效。惟。穆。于。時。新。安。王。寵。冠。列。蕃。越。敷。邦。教。毗。佐。之。選。妙。盡。國。華。出。爲。司。徒。右。長。史。轉。尙。書。吏。部。執。銓。以。平。御。煩。以。簡。裴。楷。清。通。王。戎。簡。要。復。存。於。茲。此之謂秦。始。之。初。入。爲。侍。中。曾。不。移。朔。遷。吏。部。尙。書。是。時。天。步。初。夷。王。途。尙。阻。元。戎。啓。行。衣。冠。未。緝。內。贊。謀。謨。外。康。流。品。制。勝。既。遠。涇。渭。斯。明。賞。不。失。勞。舉。無。失。德。績。簡。帝。心。聲。敷。物。聽。事。寧。領。太。子。右。衛。率。固。讓。不。拜。尋。領。驍。騎。將。軍。以。帷。幄。之。功。膺。

庸祇之秩。封零都縣。開國伯。食邑五百戶。既秉辭梁之分。又懷寢邱之志。所受田邑。不盈百井。久之。重爲侍中。領右衛將軍。盡規獻替。均山甫之庸。緝熙王旅。兼方叔之望。丹陽京輔。遠近攸則。吳興衿帶。實惟股肱。頻作二守。竝加蟬冕。政以禮成。民是以息。明皇不豫。儲后幼沖。貽厥之寄。允屬時望。徵爲吏部尚書。領衛尉。固讓不拜。改授尚書右僕射。端流平衡。外寬內直。宏二八之高謨。宣由庚而垂詠。太宗卽世。遺命以公爲散騎常侍。中書令。護軍將軍。送往事居。忠貞允亮。秉國之均。四方是維。百官象物而動。軍政不戒而備。公之登太階而尹天下。君子以爲美談。亦猶孟軻致欣於樂正。羊職悅賞於士伯者也。丁所生母憂。謝職。毀疾之重。因心則至。朝議以有爲爲之。魯侯垂式。存公忘私。方進明準。爰降詔書。敦還攝任。固請移歲。表奏相望。事不我與。屈己宏化。屬值三季。在辰戚蕃。內悔桂陽失圖。窺窬神器。鼓棹則滄海振蕩。建旗則日月蔽虧。出江派而風翔。入京師而雷動。鳴控弦於宗稷。流鋒鏃於象魏。雖英宰臨戎。元渠時殄。而餘黨實繁。宮廟憂逼。公乃總熊羆之士。率不貳心之臣。戮力盡規。克寧禍亂。康國祚於綴旒。振王維於已墜。誠由太祖之威風。抑亦仁公之翼佐。可謂德刑詳。禮義信。戰之器也。以靖難之功。進爵爲侯。兼授尚書令。中軍將軍。給班劍二十人。功成弗有。固秉撝挹。改授侍中。中書監。護軍如故。又以居母艱。去官。雖事緣義感。而情均天屬。顏丁之合禮。二連之善喪。亦曷以踰。天厭宋德。水運告謝。嗣主荒怠。於天位。彊臣憑陵。於荆楚。廢昏繼統之功。龜亂寧民之德。公實仰贊宏規。參聞神算。雖無受賑出車之庸。亦有甘寢秉羽之績。乃作司空。山川攸序。兼授衛軍。戎政輯睦。旣而齊德龍興。順皇高禪。深達先天之運。匡贊奉時之業。弼諧允正。徽猷宏遠。樹之風聲。著之話言。亦猶稷契之臣。虞夏荀裴之奉。魏晉自非坦懷。至公永監。崇替孰能光。

輔五君。夤亮二代者哉。大啓南康。爰登中鉉。時膺土宇。固辭邦教。今之尙書令。古之冢宰。雖秩輕於袞司。而任隆於百辟。暨遂冲旨。改授朝端。邇無異言。遠無異望。帝嘉茂庸。重申前册。執五禮以正民。簡八刑而罕用。故能騁績康衢。延慈哲后。義在資敬。情同布衣。出陪鑾躅。入奉帷殿。仰南風之高詠。餐東野之祕寶。雅議於聽政之晨。披文於宴私之夕。參以酒德。間以琴心。曖有餘暉。遙然留想。君垂冬日之温。臣盡秋霜之戒。肅肅焉。穆穆焉。於是見君親之同致。知在三之如一。太祖升遐。綢繆遺寄。以侍中司徒錄尙書事。稟玉几之顧。奉綴衣之禮。擇皇齊之令典。致聲化於雍熙。內平外成。實昭舊職。增給班劍三十人。物有其容。徽章斯允。位尊而禮卑。居高而思降。自夏徂秋。以疾陳退。朝廷重違謙光之旨。用申超世之尙。改授司空。領驃騎大將軍。侍中錄尙書如故。景命不永。大漸彌留。建元四年八月二十一日。薨於私第。春秋四十有八。昔柳莊疾棘。衛君當祭而輟禮。晏嬰既往。齊君趨車而行哭。公之云亡。聖朝震悼於上。羣后恇慟於下。豈惟哀纏一國。痛深一主而已哉。追贈太宰。侍中錄尙書如故。給節。羽葆鼓吹。班劍爲六十人。諡曰文簡。禮也。夫乘德而處。萬物不能害其貞。虛己以遊。當世不能擾其度。均貴賤於條風。忘榮辱於彼我。然後可兼善天下。聊以卒歲。經始圖終。式免祇悔。誰云克備。公實有焉。是以義結君子。惠霑庶類。象所未形。述詠所不盡。故吏某甲等。感逝川之無捨。哀清暉之眇默。餐輿誦於邱里。瞻雅詠於京國。思衛鼎之垂文。想晉鍾之遺則。方高山而仰止。刊元石以表德。其辭曰。

辰精感運。昂靈發祥。元首惟明。股肱惟良。天鑑璿曜。踵武前王。欽若元輔。體微知章。永言必孝。因心則友。仁洽兼濟。愛深善誘。觀海齊量。登嶽均厚。五臣茲六。八元斯九。內謨帷幄。外曜台階。遠無不肅。邇無不懷。

如風之偃。如樂之諧。光我帝典。緝彼民黎。率禮蹈謙。諒實身幹。跡屈朱軒。志隆衡館。眇眇元宗。萋萋辭幹。義既川流。文亦霧散。嵩構云頽。梁陰載缺。德猷靡嗣。儀形長遞。悵悵餘徽。鏘洋遺烈。久而彌新。用而不竭。

如元白長律詩平易近人亦是檢點有法度

沈休文齊故安陸昭王碑文

○似健于仲寶前後諛頌已甚敘歷仕措注有勢銘詞復述則昌黎以前通病

公諱緬字景業南蘭陵人也稷契身佐唐虞有大功於天地商武姬文所以膺圖受籙蕭曹扶翼漢祖滅秦項以寧亂魏氏乘時於前皇齊握符於後靈源與積石爭流神基與極天比峻祖宣皇帝雄才盛烈名蓋當時考景皇帝含道居貞卷懷前代公含辰象之秀德體河岳之上靈氣蘊風雲身負日月立行可模置言成範英華外發清明內昭天經地義之德因心必盡簡久遠大之方率由斯至挹其源者游泳而莫測懷其道者日用而不知昭昭若三辰之麗於天滔滔猶四瀆之紀於地六幽允洽一德無爽萬物仰之而彌高千里不言而斯應若夫彈冠出仕之日登庸蒞事之年軍麾命服之序監督方部之數斯固國史之所詳今可得而略也水德方衰天命未改太祖龍躍俟時作鎮淮泗如仁夕惕之志中夜九迴龜世拯亂之情獨用懷抱深圖密慮衆莫能窺公陪奉朝夕從容左右蓋同王子洛濱之歲實惟辟疆內侍之年起予聖懷發言中旨始以文學遊梁俄而入掌綸誥蘭桂有芬清暉自遠帝出于震日衣青光方軌茅社俾侯安陸受瑞析珪遂荒雲野式掌儲命帝難其人公以宗室羽儀允膺嘉選協隆三善仰敷四德博望之苑載暉龍樓之門以峻獻替帷辰實掌喉唇奉待漏之書銜如絲之旨前暉後光非止恆授公以密戚上賢俄而奉職出納惟允劍璽增華伊昔帝唐九官咸事熊豹臨戴納言是司自此迄今其任無爽爰自

近侍式贊權衡。而皇情眷眷。慮深求瘼。姑蘇奧壤。任切關河。都會殷阜。提封百萬。全趙之衮服叢臺。方此爲劣。臨淄之揮汗成雨。曾何足稱。乃鴻鸞舊吳。作守東楚。宏義讓以昂君子。振平惠以字小人。撫同上德。綏用中典。疑獄得情。而弗喜。宿訟兩讓。而同歸。雖春申之大啓封疆。鄧攸之緝熙氓庶。不能尙也。夏首藩要。任重推轂。衿帶中流。地殷江漢。南接衡巫。風雲之路千里。西通鄖鄧。水陸之塗三七。是惟形勝。閩外莫先。建麾作牧。明德攸在。乃暴以秋陽。威以夏日。澤無不漸。螻蟻之穴靡遺。明無不察。容光之微必照。由近而被遠。自己而及物。惠與八風俱翔。德與五才並運。遠無不懷。邇無不肅。邑居不聞夜吠之犬。牧人不覩晨飲之羊。譽表六條。功最萬里。還居近侍。兼饗戎秩。侯府寄隆。儲端任顯。東西兩晉。茲選特難。羊琇願言而匪獲。謝琰功高而後至。升降二宮。令績斯俟。禁旅尊嚴。主器彌固。禹穴神臬。地將分陝。江左以來。常遞斯任。東渚距海。南望秦稽。淵藪胥萃。萑蒲攸在。貨殖之民。千金比屋。郭壘之內。雲屋萬家。刑政繁舛。舊難詳一。南山羣盜。未足云多。渤海亂繩。方斯易理。公下車敷化。風動神行。誠恕旣孚。鈎距靡用。不待赭汗之權。而姦渠必剪。無假里端之籍。而惡子咸誅。被以哀矜。孚以信順。南陽葦杖。未足比其仁。潁川時雨。無以豐其澤。公攬轡升車。牧州典郡。感達民祇。非待期月。老安少懷。塗歌里詠。莫不歡若親戚。芬若椒蘭。靡飾每反。行悲道泣。攀車臥轍之戀。爭塗忘遠。去思一借之情。愈久彌結。方城漢池。南顧莫重。北指崑潼。平塗不過七百。西接嶢武。關路曾不盈千。蠻陬夷徼。重山萬里。小則俘民略畜。大則攻城剽邑。晉宋迄今。有切民患。烽鼓相望。歲時不息。椎埋穿掘之黨。阡陌成羣。傲法侮吏之人。曾莫禁禦。累藩咸受其弊。歷政所不能裁。加以戎羯窺窬。伺我邊隙。北風未起。馬首便以南向。寒草未衰。嚴城於焉早閉。永明八載。疆場大駭。

天子乃心北眷。聽朝不怡。揚旆漢南。非公莫可。於是驅馬原隰。卷甲遄征。威令首塗。仁風載路。軌躅清晏。車徒不擾。牛酒日至。壺漿塞陌。失義犬羊。其來久矣。微賦嚴切。惟利是求。首鼠疆界。災蠱彌廣。公扇以廉風。孚以誠德。盡任棠置水之情。宏郭伋待期之信。金如粟而弗覩。馬如羊而靡入。雖雉必懷。豚魚不爽。由是傾巢舉落。望德如歸。椎髻鬢首。日拜門闕。卉服滿塗。夷歌成韻。禮義旣敷。威刑具舉。彊民獷俗。反志遷情。風塵不起。囹圄寂寞。富商野次。宿乘停菑。蝮蝗弗起。豺虎遠跡。北狄懼威。關塞謐靜。偵諜不敢東窺。駝馬不敢南牧。方欲振策燕趙。席卷秦代。陪龍駕於伊洛。侍紫蓋於咸陽。而遘疾彌留。欵焉大漸。耕夫釋耒。桑婦下機。參請門衢。竝走羣望。維永明九年夏五月三十日辛酉薨。春秋三十有七。城府颯然。庶僚如賈男女老幼。大臨街衢。接響傳聲。不踰時而達於四境。夷羣戎落。幽遠必至。望城拊膺。震動郛邑。竝求入奉靈輶。藩司抑而弗許。雖鄧訓致勞。面之哀。羊公深罷市之慕。對而爲言。遠有慙德。神駕東還。號送踰境。奉觴奠以望靈。仰蒼天而自訴。震響成雷。盈塗咽水。公臨危審正。載貽話言。楚囊之請。惟幾而彌固。衛魚之心。身亡而意結。二宮軫慟。遐邇同哀。追贈侍中領衛將軍。給鼓吹一部。諡曰昭侯。時皇上納麓在辰。登庸伊始。允副朝端。兼掌屯衛。聞凶哀震。感絕移時。因遘沈痾。緜留氣序。世祖日夜憂懷。備盡寬譬。勉膳禁哭。中使相望。上雖外順皇旨。內殷私痛。獨居不御酒肉。坐臥涕霑衣。若此移年。瘳瘳改貌。天倫之愛。振古莫儔。及俯膺天眷。入纂絕業。分命懿親。台牧竝建。對繁弱以流涕。望曲阜而含悲。改贈司徒。因諡爲郡王禮也。惟公少而英明。長而宏潤。風標秀舉。清暉映世。學徧書部。特善元言。輦輓之麗。篆籀之則。窮六藝於懷抱。究八體於豪端。奕思之微。秋儲無以競巧。取睽之妙。流睇未足稱奇。至公以奉上。鳴謙以接下。撫僚

庶盡盛德之容。交士林忘公侯之貴。虛懷博納。幽關洞開。宴語談笑。情瀾不竭。譽滿天下。德冠生民。蓋百代之儀表。千年之領袖。曾不憚留。梁摧奄及。豈惟僑終蹇謝。興謠輟相而已哉。凡我僚舊。均哀共戚。怨天德之無厚。痛棠陰之不留。思所以克播遺塵。敵之穹壤。乃刊石圖徽。寄情銘頌。其辭曰。

天命元鳥。降而生商。是開金運。祚始玉筐。三仁去國。五曜入房。亦白其馬。侯服周王。本枝派別。因采命氏。涉徐而東。義均梁徙。自茲以降。懷青拖紫。崇基巖巖。長瀾瀾瀾。惟聖造物。龍飛天步。載鼎載革。有除有布。高皇赫矣。仰膺乾顧。景皇蒸哉。實啓洪祚。喬嶽峻峙。命世興賢。應期誕德。絕後光前。幾以成務。覺在民先。位非大寶。爵乃上天。爰始濯纓。清猷濬發。升降文陛。逶迤魏闕。惠露霑吳。仁風扇越。涉夏踰漢。政成期日。用簡必從。月新爲盛。在上哀矜。臨下莊敬。草木不夭。昆蟲得性。我有芳蘭。民胥攸詠。羣夷蠢蠢。巖別嶂分。傾山盡落。其從如雲。挈妻荷子。負戴成羣。迴首請吏。曾何足云。昔聞天道。仁罔不遂。彼蒼如何。興山止蕢。四牡方馳。六龍頓轡。斯民曷仰。邦國殄瘁。齊殞晏平。行哭致禮。趙徂昌國。列邦揮涕。況我君斯。皇之介弟。哀感徒庶。慟興雲陛。階毀留攢。川汎歸軸。競羞野奠。爭攀去轂。遵渚號追。臨波望哭。無絕終古。惟蘭與菊。塗由帝渚。朱軒驪駕。東首瑩園。卽宮長夜。逝川無待。黃金難化。鐘石徒刊。芳猷永謝。

庾子山周太子太保步陸逞神道碑

○使事跌宕。子山擅場。

子山諸篇。密藻麗思。無以復過。而每以纖仄爲累。

公諱逞。字季明。本姓陸。吳郡人也。君子至止。旣紹虞賓。鳳凰于飛。實興齊國。南越使者。解漢帝之衣。西陵將軍。覆吳王之蓋。曾祖載。爲宋王司馬。留鎮關中。赫連之亂。仗劍魏室。黃河參凌。或亡追路。烏江艤船。更

無歸迹。今爲河南洛陽人也。高祖冠軍將軍。營州刺史。吳人有降附者。悉領爲別軍。自是官帥擁鐸。更爲吳越之兵。君子習流。別有樓船之陣。父政。驃騎大將軍。儀同三司。恆州刺史。中都獻公。太祖扶危濟傾。經綸夷阻。報君之恥。遠襲平原。以高平霸業所基。委命留事。關中餽食。非直滎陽之師。河內供軍。豈但淇園之竹。公秉照晉之靈。降神明之德。猛虎振檻。七年不驚。羝羊觸蕃。九齡能對。諸兄以公先君愛子。稱之曰仁。推而襲封。雖復年未大成。矢心守節。旣遭燻穴。翻從壓紐。太祖初封函谷。始合諸侯。以公辭令。參謀機密。故得戎政克宣。師言無漏。賜姓步陸孤氏。委鹿輅而論都。入鴻門而舞劍。方之吹律。綽有餘榮。出身羽林。監輕車將軍。除尙書右丞。官聯會計。務應平準。水衡貫朽。長平粟紅。授使持節。車騎大將軍。儀同三司。增邑千戶。尋遷駕部中大夫。領吏部中大夫。歷蕃部御伯。東京鼎寶。先加鄧騫之勳。西晉官人。多用山濤之啓。豈若五王登朝。必司賓主之禮。六龍御轡。取定鸞和之節。御正以官觸父名。不拜。會稽有王會之名。其子不爲太守。博陵有王沈之封。其兒不爲刺史。遷驃騎大將軍。開府。入掌納言。治司宗伯。又爲軍司馬。職居常伯。勤問於南宮。位管王言。連官於北斗。豈止郊天祀地。龍門嶰谷之聲。贊鼓頌旗。白露涼風之月。暗夜。有人餉羅數十匹。公閉門不受。行人于觸。具以聞奏。朝野稱之。太尉楊震。直推故吏之金。涼州張奐。高揖羌人之馬。清畏人知。我無慙德。齊國通和。封人受使。以公有出境之才。見命張廬之禮。旣珠盤插血。定楚國之連名。七首登壇。反齊人之侵地。是謂使乎。固稱光國。三輔公侯。五陵鐘鼎。銅街柳市。塵起風飛。乃授京兆尹。增邑。通前一千六百戶。餘官如故。上林兵息。蘭池盜靜。不學正陽。平生鑄金之術。未同張敞。

於道。持留掛樹。方之今日。異代同風。俄遷司會。治小司馬。重總六軍。再操八柄。考績入於歲成。論功書之年表。尋授都督宜州諸軍事。宜州刺史。露冕觀風。停車待雨。百城解印。憚朱穆之威。千里相迎。愛王基之德。曾未期月。被勅追還。眷眷吏民。不無河內之請。依依故老。實念黎陽之別。少陽養德。前星守器。尊師讓齒。必俟賢能。乃授太子太保。方之劉實。道高於大邦。譬以山濤。榮深於小輩。本有消渴之疾。常餌金石。自理舊疾。微增。奄捐館舍。茂陵之下。不留封禪之書。校尉之營。惟餘服食之器。嗚呼哀哉。春秋四十有七。建德二年五月十一日也。天子以大臣之喪。躬輟聽訟。東朝以師傅之尊。親臨攢祭。詔贈大將軍。諡某公。禮也。以今三年正月十日。葬於京兆之高陽原。夫人郁久閩。西遇王姬。愛敬肅恭。言容令淑。有聞箴盟。無廢紘緼。爰在盛年。先從大夜。今節婦開墳。松柏已拱。季孫成寢。邱陵始同。況復圖畫賢妃。方在甘泉之室。瘞埋才子。卽用高陽之原。公儀表外明。風神內照。器量深沈。階基不測。事君惟忠。事親惟孝。言爲世範。行爲士則。留連墳素。悃悵文詞。霜府錄於尙書。天官總於司會。出入匡贊。常帶數職。身具六龜。腰恆四綬。陳平密謀。旣非天子所見。荀彧上策。又非諸侯所聞。其爲郡也。惟取赤土封書。其爲州也。惟以青鹽換粟。留家則千樹無資。遺子則一經而已。嫡子操。至性過禮。純孝不遺。墳前之樹。染淚者先枯。庭際之禽。聞悲者則下。銘曰。

山連日觀。水枕滇機。富春沙起。開陽柱飛。大夫屈節。將軍振威。南越受吏。西陵解圍。昔我烈祖。垂翼秦中。白馬無路。烏江不通。笛吟鄉里。琴哀土風。營州恆州。擁旄世載。壯節旃衿。人雄關塞。直河穿趙。平雲臨代。生謂立功。沒爲留愛。降茲嶽瀆。誕此貞明。祥符雲氣。慶合星精。宮帷定策。殿柱書名。忠泉暗漏。孝笋寒生。

世屬殷周。時逢楚漢。天下三分。鴻溝一半。以我明略。來參匡贊。日乃再中。天成兩旦。遞參三事。歷副六卿。天師光宅。地載謨明。春官定禮。夏官治兵。讖言默識。溫樹無名。謙恭周密。言行無乖。忠公兕殫。陰德蛇埋。軍國紛總。部領填階。馬不入廐。金不入懷。具瞻惟德。高山惟仰。甲觀初登。龍樓初上。東國桓榮。西京疎廣。年齡俄頃。風電相摧。銘旌兩沒。池柳雙迴。熒熒允子。在疚銜哀。身彰野火。心懼天雷。日月其除。榮終哀始。馬歸司隸。書還太史。歷對天星。墳連地市。山勢接飛。松形蓋起。德音無絕。平原忽矣。

庾子山周大將軍司馬裔碑

○有奔軼之氣。愴惻之情。銘詞不獨意複。並仍用碑文中史事。他家所無。

公諱裔。字遵允。河內溫人也。昔顓頊之命始。則南正司天。重黎之後。又以羲和掌歷。夏陽適晉。得隨會而。同奔東海。避秦。與毛公而俱隱。其後金行受命。玉笥南遷。帝系極於輿圖。中朝至於江表。曾祖楚之。晉太傅錄尚書。揚州牧。會稽文孝王之次子。元顯之幼弟也。元顯見害之後。桓元篡逆之初。爰自齟齬。客身屠釣。河內道左。抱劍長號。代郡城前。慟悲靈祭。江淮志節之士。汝穎風塵之客。感激一言。咸多依附。旣而雲生伏鼈。星出鯨魚。太白經天。蚩尤映野。公乃收合餘燼。泣血登陴。臨武牢之關。據成皋之坂。擁衆萬家。歸於魏室。魏明元皇帝。遙授平南大將軍。荊州刺史。襲封瑯琊郡王。尚河內公主。命王承制。從賓國之儀。於時宋兵憑陵。旗鼓侵逼。虎牢不封。金墉無援。魏太武皇帝。授王使持節。侍中。安南大將軍。開府儀同三司。給前後部鼓吹。元戎啓行。志雪冤恥。登壇慷慨。三軍掩泣。黃河漕粟。已出石門。白馬連旗。將臨野坂。旣而雲中柝起。代郡烽然。反旆南園。途窮北略。贈征西大將軍。都督梁益秦寧荆兗青豫鄂洛十州諸軍事。揚

刺史漁陽莊侯。以荊州刺舉。時值亂離。疊起蕭牆。遂終非命。公遺腹載誕。流離寇逆。復壁襁負。深山擁樹。程嬰之匿趙武。從役家臣。王成之藏李燮。爲傭酒市。遭太夫人憂。苦草墳塋。以終灰燧。形骸毀瘠。逾於喪禮。年十有五。始幹家事。楹前鑿柱。卽取遺書。石上開松。仍求故劍。出身司徒府參軍。除中堅將軍。員外散騎常侍。值魏室多難。所在蜂起。孟津以北。無復封畿。嵩山以南。卽爲鋒鏑。公建議修武。立柵溫城。函谷西封。河橋北斷。長亭籍馬。並入武城。百里租車。咸輸溫縣。太祖文帝。締構關都。經綸夷阻。招攜以禮。懷遠以德。馬文淵之擇主。去隴坻而歸身。竇周公之入朝。在河西而奉詔。大統七年。蒙授平東將軍。北徐州刺史。十年。河內故義。四千餘家。願立忠誠。須公衣錦。乃授使持節。領河內太守。加前將軍。懷州拓境。兩鎮奔波。柳泉轉戰。三城授首。十三年。太祖召山東諸立義之將。能率衆入關者。有加重賞。公率先而至。領戶千室。卽以爲封。固辭不受。其菽粟之賜。或以指困。馬牛之賞。將同量谷。朝廷以華陽西極。漢水東流。歎孟達之奔兵。怪劉封之失策。魏前元年。移鎮漢中。除白馬城主。領華陽郡守。昔稱導漾。今聞上瀦。煙沈火井。雨歇雲門。其年。授大都督。加散騎常侍。柱國蜀國公。開金牛之道。通牧馬之關。公卷甲北塞。懸軍束馬。遂得策預葭萌。勳參綿竹。封龍門縣開國子。蒲州刺史。仍領新州。尋授使持節。車騎大將軍。儀同三司。大中正。隆周授圖。天保定。以公才望。仍爲舊臣。遂乃義深追遠。恩隆繼絕。卽改封瑯琊縣公。邑五百戶。仍遷驃騎大將軍。開府儀同三司。都督巴州諸軍事。巴州刺史。武成二年。被勅赴援信州。魚復道阻。屢却岑彭。荆門水急。幾沈吳漢。公乃月峽先登。瞿唐直上。天子以公操履忠勤。儀刑亮直。乃徵爲大御伯。尋轉大御正。邑一千一百戶。樞機近侍。出納絲言。所謂多識舊章。殿中無雙者矣。四年。大軍東討。公所領義衆。先守枳關。

授都督懷州諸軍事。懷州刺史。假師張幕。河陽牧馬。雖接戰於富平。已連營於官渡。五年。詔追還。拜始州刺史。更討信州賊山彰。尋寶渝。恃險峽路五尺。絙釣纜通。縣水三門。橋飛齊渡。旣而風行草偃。谷靜山空。前後平十一城。獲九千餘口。馬歸平樂。金輸水衡。天保二年。除信州刺史。都督信州諸軍事。朝發白帝。暮宿江陵。氣振巴邱之兵。威警建平之戍。五年。遷漳州刺史。益州柱國公。降帝子之重。鎮天井之星。延閣擬於叢臺。岷山方於代郡。公仰稟雄謀。參謀遠略。故得身預舞陽之功。位極長平之寵。六年。授使持節。大將軍。大都督。西寧州諸軍事。西寧州刺史。方欲關沫若。徼牂牁。見夜郎之侯。習昆彌之戰。而飛鳶墮水。馬援去而無歸。金馬騁光。王褒行而不反。嗚呼哀哉。七年正月十日薨。春秋六十有五。詔贈使持節。大將軍。懷邵邠晉四州諸軍事。懷州刺史。夫人襄城公主。魏獻帝之曾孫。趙穆王之季女。王姬肅恭。禴翟禮典。四教競莊。三星令淑。有光隆慮之賢。足表平陽之盛。生則從夫以秩。死則同穴以禮。建德元年八月十二日。合葬於武功三時原。大夫墓樹以柏。諸侯墳高於雉。吁嗟滕公。來居此里。詔謚定公。禮也。公資忠履孝。蘊義懷仁。直幹千尋。澄波萬頃。蓬蒙射法。力牧兵書。星辰高下之占。風雨逢迎之氣。故得帥出以律。天幸將軍者也。至如官曹案牘。未嘗煩壅。戎馬交馳。不妨餘裕。足使四岳彌峻。三台更明。在朝四十一年。身經一百餘戰。凡任四郡。歷八州。未嘗以貨殖經懷。去如始至。渭南千畝之竹。更懼盈滿。池陽二頃之田。常思止足。身歿之日。家無餘財。素車白馬。狹室崎嶇。黃腸元甲。階庭仄陋。有詔冬官。爲營寢室。朱邑祭醑。無所。漢后是以賜金。陳表妻子露立。吳王爲之開館。嗚呼哀哉。世子侃。孝家忠國。揚忠顯親。是以勒此豐碑。懼從陵谷。植之松柏。不忍凋枯。銘曰。

欽若歷象。平秩寅賓。少梁奔華。地入咸秦。族夷興馬。書窮獲麟。玉鏡云始。金行乃構。象浦通關。龍沙開候。上糝石起。河陽水鬪。五馬南浮。三星冬宿。太傅作牧。奄有江沱。司徒避亂。承制荆河。南勞推轂。猶思枕戈。龍媒被野。蒼兕凌波。莊侯季年。禍機相接。誕公遺嗣。崎嶇懷挾。山竄趙武。家藏李燮。伍員道阻。燕丹路遙。南奔楚塞。北避秦橋。水流登隴。寒風度遼。有功都護。則重嫖姚。懷書上馬。習禮從容。陣圖六甲。兵占八風。藏松實劍。射柳瑠弓。推誠賈復。屈節廉公。八翼頻飛。六條亟乘。勇此仁義。行茲寬猛。持印山開。洗黎盜靜。取甲無邱。均田不井。懋功賜爵。上將賞官。軍中受詔。塞外登壇。方屠參合。更麀皋蘭。渝川毒水。燹道災氣。地亡都尉。灘悲使君。谷寒無日。山空足雲。北風吹旄。秋霖泣軍。遺奠雙設。銘旌兩布。沁水同墳。平陽合墓。悲哀嗣子。攀號靡訴。慟甚風枝。悲深霜露。自此何世。從斯幾年。麒麟欲鬪。華表中然。地形樓起。松心蓋圓。茫茫邱壠。代代英賢。

庾子山周柱國長孫儉神道碑

激澁有氣
然已佻薄

蓋聞放勳立而義和昇。重華登而元凱用。思皇多士。旣成西伯之功。俊德克明。乃定南巢之伐。是知惟賢非后勿食。惟后非賢弗又。若夫君臣一德。啓心沃心。見之昌寧文公矣。公諱儉。初名慶明。恆州高陸人也。北岳天孫之星。燕河帝子之國。故多奇節。甚茂華風。高闕圖南。二王齊軫。長城拔本。十族分源。高祖太尉北平王光輔五君。允釐百揆。恆衛旣從。淮沂其乂。祖豹龍驤將軍。恆州刺史。常山刺舉。非無取代之符。龍驤總戎。或似平吳之號。父馘年止弱冠。榮終解印。公以五常蘊智。六氣資德。乘天則策馬。秉靈降神。則牽狼應象。直心于物。水火恬然。無負于天。雷霆不懼。富貴自取。豈資唐舉之言。聲名有聞。無勞李膺之識。年

十八。解褐員外散騎侍郎。尋授輕車將軍羽林監。太祖文皇帝。駕馭天綱。苞羅英傑。選公才德。光佐尙書。諸葛亮之西歸。玉壘成三分之業。管夷吾之入仕。葵邱有一匡之功。天水黠羌。漁陽羣盜。乃遷秦州長史。防城大都督。封信都縣開國伯。三年。滑州蟻聚。保障沈命。靡旗亂轍。乘冰渡河。丞相大行臺。假節撫軍。行滑州刺史。大統元年。授持節。西夏州刺史。加散騎常侍。郅支抱馬。如聞耿秉之戰。單于願識。似畏王商之威。五年。遷使持節。鎮東將軍。都督東北三夏諸軍事。西夏州刺史。增邑千戶。改伯爲公。旣而江漢遼遠。車書寂寞。蜀主的顛。未出檀溪之水。秦王飛雉。猶向南陽之城。六年。以公爲使持節。都督三江三襄南雍平。信江隨郢浙十二州諸軍事。荊州刺史。東南道行臺僕射。楚城鄰境。實有讓田。吳人對營。無妨贈藥。部內屬城。爲人所訟。公遂集文武。肉袒自罰。兄弟不讓。延壽責躬。吏民有過。翁歸引咎。天子異之。璽書勞問。贈賄加幣。王人接踵。大丞相書云。此之美事。耳目之所未經。歎尙無極。故遣專使。公善于撫馭。長于接引。山藪無棄。苞苴不行。示人赤心。與人顏色。盜不敢發。民不忍欺。至是將校耆老。于州城之南。起清德之樓。勒賢臣之頌。杜鎮南之作。牧當世樹碑。寶車騎之臨戎。生年刻石。方之今日。彼獨何人。于時戶口日增。荒萊畢墾。華實紛敷。黔黎茂豫。但恐衰職有闕。待公而補。鼎飪未和。須公而正。是以漢殷民望。荆南杞梓。並皆上書。詣闕。連名乞留。河內之借寇恂。更慙謁帝。交州之請士燮。還著上表。九年。授車騎大將軍。儀同三司。十二年。除大行臺尙書。仍爲大丞相司馬。以公識度嚴明。志節清儉。遂改公名儉。字慶明。非關書月。詎待看碑。幸得千畝。不同二山無廢。十三年。加開府。餘官如故。十四年。除尙書右僕射。加侍中。進驃騎大將軍。居上星執法。在文昌之位。以公才望兼而有之。十五年。更除東南道行臺僕射。都督十五州諸軍事。行荆

州事十六年。大丞相總十六軍。剋清河洛。公又中分麾下。參謀幃幄。高選霸僚。公爲長史。其年。加都督南道三十六州諸軍事。餘官如故。南陽文學。更遇王基。章華袞衣。還迎郭賀。昔日伐蜀之謀。張儀與秦昭計。合平吳之利。羊祜與晉武意同。太祖始定成都。卽有江陵之志。公密獻其策。懸符深旨。糧運久積。梯衝立備。一戰而舉。鄢郢再戰而燒。夷陵遂得。席卷三荆。此又公之勳也。詔賞奴婢三百口。太祖與公書云。由公立計。果如所謀。令公作鎮江陵。以安蜀地。後魏二年。改武川昌寧郡開國公。歷陽居里。非惟景丹之封。曲逆戶口。豈但陳平之國。其年。授大將軍。太和之中。曹真于府內受冊。元封之末。衛青于軍中卽拜。公之此比。綽有餘榮。詔曰。吳人未復。須助謀謨。今使梁王兵馬。受公節度。三年。加都督東南道五十二州諸軍事。增邑萬戶。維周革命。光宅欽明。作貳天官。允諧邦治。元年。授小冢宰。保定二年。治蒲州刺史。檢校六防諸軍事。四年。治襄州。仍授柱國大將軍。餘官如故。秩登四岳。階平六府。豈不功重昭陽。名高蔡賜。控駢五十州。風行數千里。拔園葵而去織婦。無三惑而絕四知。一室之中。未免虛白。日膳之資。三杯而已。詔賜繒綵一千段。粟麥二千斛。天和元年。陝州刺史。都督八州二十防諸軍事。解荊州總管。餘悉如故。路出王官城。臨河曲。戍清陝右。高視棠陰。部領宴煩。晦明爲疾。天和四年。謝病故京。薨于私第。春秋七十有八。鑿蹕降臨。軒懸輟樂。九旒龍旆之錫。三河騎士之送。詔贈太保。涼夏靈銀長河。鄴甘瓜十州諸軍事。涼州刺史。諡曰文。公狀貌邱墟。風神磊落。玉山秀立。喬松直上。煙霞之涯際莫尋。江海之波瀾不測。少遭荼苦。在山服終。攀柏樹枯。侵松獸死。盡忠事國。竭力從政。其門如市。其心若水。奇策密謀。百僚仰止。忠貞亮直。明王敬焉。至如風后陰陽之占。力牧星辰之度。魏公子之兵書。李將軍之射法。莫不成誦在心。取爲時用。居常服

翫或以布被松牀盤案之間。不過桑杯石鼎。遣令山陵。一無所用。公私贈綵。並不得受。止依太祖陵側。無忘事君。墩等兄弟。並至性善居喪。號慕墳塋。奉遵遺訓。是以衛青之塚。仍陪漢武之陵。管仲之墳。卽接齊桓之墓。天和六年。天子以四海未寧。三方鼎峙。有懷將帥之志。言念封疆之臣。旣畫雲臺。乃題麟閣。更贈公爲鄒國公。邑五千戶。追崇列辟。事極神魂。再改銘旌。恩隆封墓。公在民留愛。身後見思。吉日良辰。郊祠野祭。儀同趙超等六百九十七人。表求立廟。陳請象魏。有詔許焉。桂陳杏梁。綠墀青瑣。按歌會舞。鳳蓋霓裳。南浦送而行雲。東風颯而零雨。是知漢陽郡前。非徒武侯之廟。臨淄城下。豈獨欒公之社。嗚呼哀哉。乃爲銘曰。

道鍾屯剝。世屬雲雷。地軸左轉。天關北開。客車周室。繫馬秦臺。乃齊七政。爰啓三才。烈祖燮諧。九龔梁棟。取才逢獵。求賢入夢。匡贊官雲。謀猷紀鳳。律定公族。珪分職貢。乃惟嗣德。實秉英靈。身圖斗宿。面繞樞星。青衿敬業。童子離經。信陵虛右。干木分庭。忠孝純深。樞機周密。孔光不言。曹參勿失。溫席扇枕。承顏悅膝。凍浦魚驚。寒林笋出。肅肅風正。沈沈器局。直似貞筠。溫如瑞玉。清不置水。明不舉燭。馬願如羊。金須似粟。上將克昇。元戎旣序。夏陽三捷。夷陵一舉。憑軾下齊。陵江入楚。鼎反歷室。鐘歸大呂。六卿咸事。天官是司。二南作伯。棠陰實治。清風有頌。綠竹聞詩。贈行之冊。超然帝師。昔侍蘭苑。今陪杏林。死生契濶。無違一心。風雲積慘。山陣連陰。陵田野寂。松徑寒深。夏嬰之隴。橋元之墓。馬見千年。車回三步。左無長樂。前非武庫。直望高碑。增悲行路。

庾子山周車騎將軍賀婁公神道碑 ○句調往往自襲使事亦熟處難忘

昔者軒邱命氏。初分兄弟之姓。若水降居。始建諸侯之國。自是以官爲族。因地爲宗。水派枝分。其可知矣。公諱慈。字元達。本姓張。清河東武城人也。仕于周。張仲爲孝友。謀于晉。張彥爲賢臣。韓有開地。則五世強國。趙有孟談。則三卿不戰。祖慶少習邊將。仗智勇。雖復五車竹簡。不取博士之名。一卷兵書。卽以將軍自許。角端在手。必無齊魯之侵。蓮花插腰。甚得蛟龍之氣。爲車騎大將軍。儀同三司。散騎常侍。霸城縣開國伯。贈河州刺史。父璨。公子公孫。有鑑基于天下。良弓良冶。有世業于家風。書則百家可知。劍則千人可敵。三槐以龜鼎象物。知其神姦。五等以桓珪班瑞。守其宮室。君以才望兼而有之。終于使持節。車騎大將軍。儀同三司。散騎常侍。武定縣開國公。贈池州刺史。惟公乘山岳之靈。受星辰之氣。年在髫髮。甫就勝衣。竹馬來迎。已知名于郭伋。羊車在道。卽見賞于王澄。豈直童子明經。書生說卦而已。至如禪河清論。秋水高談。故以辨折龜林。聲馳鹿野。國家官族。君爲首姓。起家車騎大將軍。儀同三司。襲爵爲公。增邑合一千六百戶。弱冠登朝。傳呼甚寵。漢魏台鼎。故無此比。中朝方伯。罕有其年。大冢宰任總機衡。是勤王略。惜君忠壯。委以爪牙。乃領左廂親信。出爲梁州防主。華陽西極。漢水東流。巴濮旣寧。沈黎卽靜。保定四年。王師北伐。以君驍勇。被召將兵。師下宜陽。身登函谷。將燒白馬之城。以覆烏巢之壘。旣而中途甚雨。未獲圍原。軍師聞喪。不成侵宋。柱國趙王。今上之第九弟也。文則河間上書。武則任城置陣。作鎮岷邱。揚旆錦水。白虎之俗難安。黃龍之盟不定。以君智略。入佐中權。天和元年。授使持節。大都督。上柱國總府司錄。仍轉司馬。餘官封如故。相如西喻。鏤石于靈山。武侯南征。浮船于瀘水。方之今日。彼獨何人。九品課工。爲上之下。四年入朝。歸事宰旅。卽受載師大夫將命。齊國尋盟。出境卽用和鄰之儀。入國聞喪。仍從會葬之禮。可使南

面此之謂乎。尋以本官入治軍正。至如渭水兵書。在心爲志。軒邱陣法。聚石成圖。旣得師不疲勞。兵無怨讟。入陪中禁。更領儀同。邸客城池。門闌戶籍。咸資巡警。並用司存。帝城近臣。公室密戚。如逢司隸。似畏都官。旣而孤城鄭嫗。不相其年。巴水涪翁。不醫其疾。春秋三十有三。奄捐官舍。呂子明之疾甚。歎軫吳王。阮元瑜之長逝。悲深魏主。有詔贈某官禮也。以建德四年三月日。歸葬于河州苑川郡之禁山。公六郡良家。西河鼎族。地壯金行人。雄寒氣。兵書七卷。河水浮來。射法三篇。天弧夜下。鋒旗不息。刁斗恆驚。猶得馬上讀書。軍中習禮。太史子義。善于謀策。諸葛公休。長于撫馭。四代儀同三司。七世河州刺史。鐘鼎成列。冠蓋連陰。所謂生爲貴臣。死爲貴神者也。但以游魂久客。反葬途遠。道阻山長。妻孤子幼。哀聲滿野。愁氣連雲。況復松檟飄飄。方臨武威之戍。邱陵迢遠。直對臨洮之城。馬撥亡于武溪。尸柩反于魏里。梁鴻死于會稽。妻子歸于平陵。嗚呼哀哉。崎嶇遠矣。昔者繁昌祠前。卽有黃金之碣。德陽墓下。猶傳青石之碑。是謂勒功。乃爲銘曰。

七葉佐漢。五世相韓。忠臣入仕。孝友當官。青城仙洞。黃石祠壇。臺堪走馬。書足迴鸞。武定風颿。霸城嚴肅。並馳雙傳。俱分兩竹。重世刺舉。連鑣袞服。草靡青邱。風馳赤谷。世不乏賢。挺茲上嗣。孝有三德。忠無二志。劔足身挺。書堪面試。旂節旣乘。高蟬且珥。龜轉印函。螭盤綬笥。左右將軍。前後常侍。繼踵五侯。因循三事。旂旃九坂。鱸舫雙流。還驅木馬。更引金牛。江波錦落。火井星浮。樽酒望帝。安歌蜀侯。受脈河陽。偏師洛浦。署陣成皋。連旗廣武。朝兵滅寇。夜營多鼓。箭起六麋。鋒推九虎。倏忽人世。俄然今古。崇發兩星。豎驚二豎。游魂通夢。言反舊塋。紫泥賜冊。黃腸贈行。途登石紐。路入金城。寒關樹直。秋塞雲平。劍埋合柱。書藏鑿楹。

武侯爲廟。欒公爲社。雲蓋低臨。霓裳紛下。碑枕金龜。松橫石馬。永矣身世。留名華夏。

溫鵬舉常山公主碑

○冷冷叩玉之音

啓泰微之層構。闢閭闔之重扉。據天下以爲家。苞率土而廣宅。然則昆山西峙。爰有夜光。漢水東流。是生明月。公主秉靈宸極。資和天地。芳芬有性。溫潤成質。自然祕遠。若上元之隔絳河。直置清高。類姮娥之依桂樹。令淑之至。比光明於宵燭。幽閒之盛。匹穠華於桃李。託體宮闈。而執心撝順。婉然左辟。率禮如賓。執華燭以宵征。動鳴佩而晨去。致肅雍於車乘。成好合於瑟琴。立行潔於清冰。抗志高於黃鶴。停輪表信。闔門示禮。終能成其子姓。貽厥孫謀。而鐘漏相催。日夜不息。川有急流。風無靜樹。奄辭身世。從宓妃於伊洛。遽捐館舍。追帝子於瀟湘。銘曰。

龍轡莫援。日車遂往。奄離形神。忽歸邱壤。祖歌薤露。出奏巫山。永厝中埜。終掩窮泉。蕭瑟神道。荒涼墓田。松檟徒列。琬琰空傳。